

IRA MATEO ISANGUENATOCOQUERI JESOQUIRISITO, ATI ICANTA IRIRO CARA YOGABISAICOONTI

Isanguenaquero iripajiro imatsiguengajegui Jesusos.

(Ir 3.23-38)

¹ Yamai nasanguenataiguëmiro iripajiro pague icharineegui jirai Jesoquisisito. Irirori imatsiguenga David aisati Abaram.

² Aro jirai itimi Abaram. Ainta itomi ira jitacha Isac. Aisati Isac itomintacari Jacob. Jacob itomintaigari ira Jorá aisati ireintiegui. ³ Jorá ijinantacaro Tamar. Itomintacari Baris aisati Tsara. Baris, iriro iriri Esiromo. Esiromo iriri Aram. ⁴ Aram itomintacari ira Aminarab. Aminarab iriri Nasón. Nasón iriri Saramón. ⁵ Saramón itomintaari ira Bos. Iniro Bos ojita Rajab. Itomi Bos ijita Oberi. Iniro Oberi jitacha Irot. Oberi iriri Isaí. ⁶ Itomi Isaí jitacha David, ira itingomi joríojegui. Cara Abaranquë irooti David ainta icarati 14 sërari. Yaguimintacari Orías David, itomintaari Saromón. ⁷ Saromón iriri Roboam. Itomi Roboam, Abías. Itomi Abías, Asa. ⁸ Asa itomintaari ira Josabá. Itomi Josabá irianti Joram. Itomi Joram, Osías. ⁹ Osías iriri Joatam. Itomi Joatam jitacha Acás. Acás iriri Esequías. ¹⁰ Ira itomi Esequías, Manasés. Itomi Manasés: Amón. Amón iriri Josías. ¹¹ Josías itomintaari ira Jeconías aisati ireintiegui. Aro cara

Daviriqüë irooti Jeconías, ainta 14 sërari. Cara itimi Jeconías, ipocaiqüë tojai soraro paniaigacha Babironiaqüë, yágaiganaqueri omagaro joríojegui canta Babironiaqüë.

¹² Aique iconijapë Saratieri itomi Jeconías. Itomi Saratieri irianti Sorobabé. ¹³ Sorobabé iriri Abió. Itomi Abió: Eriaquim. Eriaquim iriri Asoro. ¹⁴ Asoro itomintaari Saroco. Itomi Saroco, Aquim. Aquim iriri Erió. ¹⁵ Itomi Erió: Eriasari. Eriasari iriri Matán. Itomi Matán irianti Jacob, ¹⁶ ira tomincari José ojimetsari María. María iniro Jesos Ira aisati jítacha Quirisito Agabisaicoontatsiri. ¹⁷ Ainta 14 sërari cara yágaiganaqueri joríojegui canta Babironiaqüë irooti cara iboguë Quirisito.

Cara iboguë Jesoquisito.

(Ir 2.1-7)

¹⁸ Yamai nongomantëmi ati ocanta jirai cara inë Jesoquisito. Ainta José aisati iinatsari ojita María. Aroque iquengaigaca irágobaguima, carari teraiquerai iraneiro. Iroero cantënguicha poguë María, itasongancaro Isëre Tosorintsi. ¹⁹ Cara igóquero José cara poguë María iquengasëretaca: “Te onganinate ca poguë. Ainiro oniaguetiri sërari. Quero náguero. Nojocajironi comanonni. Quero nocomantiri omatsiguenga. Paniro nanganquero: ‘Nojocajimini yamai’ ”. Irianti caninari José, icoque ingábintsero María, te iraninte iragui pasiguitiro. ²⁰ Iroontita iquianca José irojoquero, iriguito yoniagapari ironomire Tosorintsi cara iquisaniqueri. Icantasiringapëri:

—José, obiro imatsiguenga jirai David, quero pitsorogui cara páguëro María tenta

iriro ogaguirone sërari pijinatsari. Ira ojaniquite itasongancaro Isère Tosorintsi.
²¹ Ontsomaaqueñica poro Otomi, pijitiri Jesus Irironta agabisaicoquerine imatsiguenga, irojocajineri ora icantaguëti te onganinate.

²² Antagaisati ocanca nega arota omoncaratima ora icanque Tosorintsi jirai cara isanguenatacaqueri comantantsiri jitacha Isaías:

²³ Ainta omëñibaque tsinane te oneiri sërari, ontso-maaqueri Otomi Ira jitënguichane Emanoel.

Emanoel ocanti irinibarequë jorío: itsibatacái Tosorintsi.

²⁴ Aro icabirica José iquemisanquero ora icomantasiringaqueri ironomire Atingomi. Iátasiquero María, icanquero:

—Aro caraquenta nágasantëmi nobangoquë.

²⁵ Carari terai iraneiro irooti cara ontso-maaqueri Otomi. Cara aroque iboguë ijiqueri Jesus. Aique yágasantëro ijinantacaro.

2

Ipocaignë ogótasantiri jonogasaki iraniaquerini Jesus.

¹ Aro iboguë Jesus canta poeboroquë jitacha Berén cara quibatsiquë jitacha Jorea. Igáantë Erroris itingomi cara Jerosarénquë cara yaretaiga sërari ogótasantiri jonogasaki. Ipaniaca jaanta cara iconyeti paba. ² Yosamitaigapëri Jerosaresati:

—¿Nega ini yamai ira Itingomi joríojegui? Cara nopaniaca naniaigabaqueri ionogasatite, aro nigóiguë, irirai iboguënguitsi. Yamai nipocasitaiguëri nomanocotaiguëri.

³ Cara iquemocotobëri itingomi jítacha Eroris, iquenganeintasantanaca aisati itsoroganë. Itsorogaiganaque aisati omagaro Jerosaresati.

⁴ Aique Eroris yapatotaiguëri antagaisati saserirotipague obatatsiri aisati omagaro iraegui ogomeantiro isanguenare Moisés. Aro yosamitaigabaqueri

—¿Nega iriboguë ira jítënguichane Quirisito?

⁵ Yotabitaiguëri:

—Cara poeboroquë jítacha Berén yaca quibat-sica ojita Jorea. Jirai isanguenatocoqueri ira comantantatsiri jítacha Miqueas:

⁶ Aiti Berén cara Joreaquë. Quero itsoinguiro Berén otiomijani poeoro: querootisati ijiti-ro carantatsiro aronta Berénquë iriboguë Irirosonori, Itingomi omagaro jorío.

⁷ Aique comanoroni Eroris icaimagantaiguëri cogatsi iraneiri Jesus. Yosamitaiguëri:

—¿Ati ocanta cara iconijatompëmi jonogasati cara piniaigabaqueri ora pigóontacari cara iboguë Itingomi? Pingomantasantina.

⁸ Aro icomantaiguëri. Aique Eroris igáqueri aisati:

—Atsi pijáigue yamai. Pingogaigueri Ira Janequi. Pinetsaigueri atiraca itimi aisati atiraca icanta. Aique popigaima yaca, pingomantaigapëna naro. Nocoguini naneiri naro aisati, nantingomimpëmari.

⁹ Aique iáiguë, iniaigairi jonogasati ibaqueri irooti cara yaratingopë jonoica pongotsi cara

ini Janequi. ¹⁰ Cara iniaiguëri jonogasati icaninatasantaiganaque. ¹¹ Icanaque pongotsiquë, iniaigapëri Ira Janequi aisati María iniro. Aro yobat-icagueritotasipari, yamanocotaiguëri, ijitaiguëri Itingomisonori. Aique itatarecoquero itsibogotequë ipasitaigacari maba ora pënatacha tojai: oro, aisati pite casangajengaro. ¹² Aique isamaiguë ira maba matsiguenga. Iquisanitaiguë. Aro Tosorintsi icamanaasiringaqueri, icanqueri:

—Quero pipiganaja Eroriquë. Popiganajima piguebatsitequë cara basiniatiquë abatsi.

Aro iquenantaigaaro basiniati abatsi irooti cara ipaniaca.

Isiganaca José Ejípitoquë, yáganëri Jesus aisati María.

¹³ Aroqueque iátaigai ira ogótasantiri jonogasati aique iquisanique José. Aisati iconijatompëri ironomire Atingomi irisaanganetsite, icomantasiringapëri icampëri:

—José, pingabiritima, páganëri Ira Janequi aisati iniro; pisiganëma cara Ejípitoquë. Pintime irooti cara nongomantaimi, cara popigaima, icoguirinta Eroris Ira Janequi iróguiri.

¹⁴ Aro irooti tsitiniriquë iáiguë. Yáganëri Janequi aisati iniro canta Ejípitoquë. ¹⁵ Canta, itimaigapë irooti cara icamaque Eroris. Aique ipigaigapaa iguebatsitequë. Icanque irooti ora isanguenato-coqueri jirai ira comantantatsiri jitacha Oseas. Atingomi isanguenatacaqueri:

Icanque Tosorintsi: “Itimabeta Notomi canta Ejípitoquë. Nacaimairi iripigapaima aisati”.

Ira Eroris yógagantëri janequipague cara Berénquë.

¹⁶ Cara te iripigaima ira ogótasantiri jonogasati, aro igótanë Eroris cara te inguemisantiri. Aro iguisasanotanaca Eroris, igátaiguëri isorarote, icanqueri:

—Pijáigue cara Berénquë, pógaiguëri antagaisati janequi sërari. Póguiri ira irirai ibogatsi aisati ira agabisatsi pite osarini. Popoguiriaiguëri omagaro.

Icanque negaca Eroris aroquenta icomantasantapëri ira ogótasantiri jonogasati, ati ocanta ini-aiguëri jonogasati. ¹⁷ Jirai isanguenatocoquero oca comantantatsiri jitacha Jeremías.

¹⁸ Oquemocoquengani tsinane ocaimëgotasantëri otomijegui tojai piraicoquëri. Iroronta cantaca Iraquel, piraicotaiguëri ojaniquite cara Iramáquë jirai. Te onganinasëretanae yógaiguërinta otomijegui.

Ipiganaja José Nasarequë, yáganëri Jesus aisati iniro.

¹⁹ Icamaque Eroris. Aro iquisaniquëri José. Iconijatomopëri ironomire Atingomi irisaanganetsite cara Ejípitoquë. ²⁰ Icantasiringapëri:

—José, atsi yamai pijátaje popiganajima piguebatsitequë. Páganëri Ira Janequi aisati iniro aroquenta icamaque ira cogabitacha iróguirime Janequi.

²¹ Aro yáganairi Ira Jesus aisati iniro, iáque cara iguebatsitequë imatsiguenga. ²² Cara yaretaja José iquemocopëri Ariquero itingomi Joreasati.

Ariquerao itomi Eroris ógueri. Aro itsorogopëri. Aisati Tosorintsi icamanaasiringaqueri:

—Pigamemari Ariquerao.

Aro yogaganaca José canta Garireaquë. ²³ Cara yaretaja, itimopë poeboroquë jitacha Nasaret. Aro omoncaraca ora icanque comantantatsiri-pague jirai: Quirisito Nasaresati.

3

Joan baotisantatsiri icomantagueanti cara tera ontimingani.

(Mr 1.1-8; Ir 3.1-18; Jn 1.19-28)

¹ Aro aique iáque Joan baotisantatsiri cara tera ontimingani cara Joreaquë. Icomantague-taigapëri imatsiguenga ² icantopiantë:

—Pingantaigaima yacaqueroca, pijocajiro ora picantaguëti te onganinate, pomasiniatitaje, quero picantaja pibega jirai. Pabentimari Tosorintsi pënibaquenta orequima cara intingomibintaiguëmi Tosorintsi.

³ Jirai ira Joan isanguenatocoqueri comantantatsiri jitacha Isaías. Icanque Isaías:

Ainta ira cajemaquenguitsine cara te ontimingani; inganque: “Coraguetaque Atingomi; págacaninatobëri; pinguemisasantobëri, piganinatio paneingomento pibega cara pobetsicoboguitineri irabo itingomi pigatingatineri”.

⁴ Ora iguitsagare Joan irianti cameyopiti, imatsaguitari imasitsa. Irianti yaagui ira tsiguëriquipague. Aisati itsimiri pitsia.

⁵ Ipocasitaigapëri tojai Jerosaresati iquemisan-taiguëri, aisati omagaro Joreasati, antagaisati ira timaigatsi aronisati nijaaquë jitacha Jorirán.

⁶ Ainta tojai icampëri:

—Aiti nacantaguetiro ora te onganinate. Nocoguini ingábintsena Tosorintsi iragabisaicotajina.

Aique ibaotisataiguëri Joan Joriránquë.

⁷ Aisati iátasitaigabitacari tojai bariseo aisati arosonori saroseo icogabetaigaca imaotisataigue-mame, carari iguisatsataigabaqueri Joan icabëri:

—Te pinganinataigue, obirojegui aisa picantaigacari marangue. ¿Pairo comantaiguëmi pisigopitanëmaro cara iratsipiriacagaiguëmi Tosorintsi cantaquibi maranguepague cara isigopitaigacaro pamari? ¿Pijitasitaiguemame cara quero itsipiriacaguimiro?

⁸ Pinintica nomaotisataiguemi, aro caninataque pintimaigue caninasati arota nogótimi pijocasantëroca ora picantagueti te ongomeite pinguemisasantiri Tosorintsi. ⁹ Quero picantaigui: “Naroegui imatsiguenga Abaram. Iroro iniacaninataguëtaiguëna Tosorintsi; quero iguisina”. Pamatobica obiati. Ingoqueca Tosorintsi, imiaguetiro ocaegui mopë imatsiguenga Abaram carari quero pogabisaicotiri iriro, quero iáti Jonocaguitequë irironta jorío imatsiguenga Abaram. Querootisati pabisaicoti obironta imatsiguenga Abaram.

¹⁰ Carari pënibaque inguisaiguëmi Tosorintsi. Picantaigacaro pibega anchato te ine oguitso; iritotëro casintaro, irojoquero tsitsiquë. Aisa picanta obiro te pinguemisantiri Tosorintsi, te pingantineri, irojocaiguëmi Sharincabeniquë.

11 Aroca nogóque ijocajiro matsiguenga ora icantagueti te onganinate, nobaotisatëri nijaaquë. Carari pënibaquenta iribocapë basini sërari, teni aisa ingantina nibega naro. Ibaquina Irironta Natingomisonori, nitsoingaa naronta cantaca iromeraro Iriro. Naro baotisataiguëmi nijaaquë, carari pinguemisanquerica Iriro ogaiguëmirone Caninaro Isëre Tosorintsi inasërequimi. Aisati ingasitígatëri Sharincabeniquë ira tsoengatsi te inguemisantiri. 12 Aroca omposaguiquero antianquero arosa, aique opoteguiquero. Ataquero omasiqui, iroonti oguitso águë oguëro cara ogantaroriquë. Aisati ingantima Atingomi iraniantimari antagaisati matsiguenga. Ingábintsaiguëri ira quemisantaiguërine, irianti cantaguetiro te onganinate irojoqueri tsitsiquë cara te otsibague.

Cara ibaotisataca Jesus.

(Mr 1.9-11; Ir 3.21-22; Jn 1.31-34)

13 Aique iáque Jesus Joriránquë, ipaniaca Garireaquë. Iátasiqueri Joan cara imaotisatobëri.

14 Te iraninte Joan imaotisatobëri, icabëri:

—Quero nobaotisatimi. Caninataque pomaotistatina naro Obiati. ¿Pairo picogobiti nomaotistatimi Obironta Natingomisonori?

15 Yotabitanëri Jesus:

—Pinintacaguina yamai. Nocogasanti pomaotistatina icocaquinaronta Tosorintsi.

Icanque Joan:

—Aro nomaotisatëmi.

16 Aro ibaotisatëri nijaaquë. Cara yagatanai Jesus, aique iniobëro Isëre Tosorintsi, opaniaca

Jonogaguitequë, pamasobingopë paguëpëri Jesus, ocampari sompaguiti, pinampari. ¹⁷ Iriguito ique-maigabaquitigüiri Tosorintsi canta Jonogaguitequë, icanque:

—Icari ica Notomi nanintasanotirini. Tojai nacandinabentasantobiqueri.

4

Icogabeca camagari irantacaquerime Jesus ora te onganinate.

(Mr 1.12-13; Ir 4.1-13)

¹ Aique Isëre Tosorintsi páganëri Ira Jesus cara tera ontimingani. Cara, icoque camagari irani-antimari. Icoabeca irantacaquerime Jesus ora te onganinate. ² Cara, itica Jesus 40 catagüiteri, te irapëmate pairoraca. Págasantëri itasegane. ³ Aro iátasiqueri Jesus camagari, iraniantëmari. Icantabepari:

—Obirosonorica Itomi Tosorintsi, pomeguero oca mopëca pan, popero.

⁴ Yotabitanëri Jesus:

—Quero nopeguero. Ocanti Sanguenari jirai isanguenati comantantatsiri:

Te patiro intimantimaro pan matsiguenga, carari intimantëmarotisati Irinibare Tosorintsi cara inguemisanqueroca.

⁵ Aique yáganëri camagari cara Jerosarénquë. Cara, yogüeri jonoica oquibe pongotsi irasi Tosorintsi. ⁶ Aro icantabecari:

—Obiroca Itomi Tosorintsi, atsi pomatsecanë osobinta quibatsiquë. Pinguengero ocanti Sanguenari:

Tosorintsi iragáquimiri ironomire irisaanganetsitepague íromisanquemi. Irágaigabaquemi arota quero poparigopë mopëquë.

⁷ Yotabitanëri Jesus:

—Quero picantiri Tosorintsi ora inganque; posamitiri ora icogui inganque. Aisati ocanti Sanguenari:

Quero piniantari Pitingomi Iriantinta Pitosorintsite.

⁸ Aisati yáganëri Jesus camagari jonoquë oquibequë oguitoja. Ijigotëneri omagaro quibatsi, ⁹ ícantabecari:

—Pinetsaiguëri antagaisati timaigatsi quibat-siquë. Aroca pintingominquina naro, pobaticagueritotasiquinaca, aro nomëmiro omagaro, nangantaiguëri antagaisati intaegui cara intingom-intaiguëmi iriro.

¹⁰ Yotabitanëri Jesus aisati:

—Pijáte, jaara, obiro Satanás. Ocantiti Sanguenari negaca:

Pintingomintimari paniro Atingomi Irironta Pitosorintsite. Paniro Iriro pomanocoqueri pinguemisanqueri.

¹¹ Aro íátaji camagari ijocanëri. Aique ipoc-asitaigapëri ironomirepague Tosorintsi irisaanganetsite, imitocotaigapëri Jesus.

Iáque Jesus Garireaquë.

(Mr 1.14-15; Ir 4.14-15)

¹² Cara Jesus iquemocoqueri Joan cara yomi-anquengani, íáque Jesus cara Garireaquë. ¹³ Te

intime Nasarequë, carari iáque Caperinaoquë. Caperinao iroonti poeboro onamijaquë oquibe angaare jitacha Garirea. Aisati pini aronisati iguebatsite Saborón aisati irasi Nejatari. ¹⁴ Aro omoncaraca ora isanguenatocoque Isaías comantantatsiri jirai cara icanque:

¹⁵ Ainta matsiguenga timaigatsi quibatsipaguequë: Saborón aisati Nejatari timatsi onamijaquë angaare jitacha Garirea; aisati aiquero basiniquë angaare oquibeguintesonori; aisa antatinta Jorirán; aisati Garirea canta itimaigui tojai matsiguenga cagarijegui jorío. ¹⁶ Jirai icantabetaigacari ibega iraugui timatsi tsitiniriquë tenta irogógueri Tosorintsi. Iriátaiguëme Sharincabeniquë, carari yamai aisati icantaigari ira timaigatsi cataguiteniquë, aroquenta iquemocotaigabaqueri Jesus.

¹⁷ Aro iparintaca Jesus iquenguitsatomotaiguëri matsiguenga canta, icantaiguëri:

—Pingantaigaima yacaqueroca, pijocajiro ora picantaguëti te onganinate, pabentimari Tosorintsi pënibaquenta orequima iragáantane cara intingomibintaiguëmi.

Jesus icoigaiguëri irogomere.

(Mr 1.16-20; Ir 5.1-11; Jn 1.35-51)

¹⁸ Iroontita yanëisigui Jesus cara onamijaquë angaare jitacha Garirea, iniopëri Simón aisati ireinti, Antiris. Simón aisati ijita Peroro. Isiriatasegui simaguitinta ini. ¹⁹ Iniopëri Jesus aro icampëri:

—Intsome, piguiatanëna. Jirai pitarobacaati pisiriati sima carari nomëmi irorai pitarobacaare; pinguemisantacaguinari matsiguenga.

²⁰ Aito cara ijocanëro isiritite, yoguiataiganaqueri. ²¹ Yogagaiganaca negaqueronta, Jesus iniopëri pite basini, Santiago aisati ireinti, Joan. Iriro pitirooti itomi Sebereo. Yobetsicaigaseguero irisiriamonto cara ibitoquë. Aisati icaimaigapëri Jesus. ²² Aito cara ijocaiganaqueri iriri cara ibitoquë, yoguiataiganaqueri.

Icomantagueanti Jesus cara Garireaquë.

(Mr 1.35-39; 3.7-8; Ir 4.42-44; 6.17-19)

²³ Iquenagueque Jesus cara Garireaquë; yogomeanti omagaro poeboropaguequë cara yapatoitaiga jorío. Aisati iquenguitsatocotagueantëro iragáantane Tosorintsi cara intingomibintaiguëri matsiguenga. Aisati Jesus yogaguibegajiri tojai janaitatsiripague. ²⁴ Iquemocotaiguëri Jesus omagaro Siriasati. Aro yamaigapëri tojai imatsiguenga janaitaguetatsiri aisati catsibaguetatsiri arota iraguibegajiri. Yamapëri Jesusiquë ira inanca camagari, ira tingaraachari, aisati ira emëngari. Yogaguibegajiri antagaisati. ²⁵ Yoguiataigapëri tojaisonori matsiguenga: Garireasati, Tecaporisisati, Jerosaresati, Joreasati, aisati ira paniacha antatinta Jorirán.

5

*Iquenguitsaque Jesus cara oguitojaquë;
icomantëgotaiquëri ira iraganinasëretaiquë
Tosorintsi.*

(Ir 6.20-26)

¹ Cara Jesus iniaiguëri tojai matsiguenga ira botoibiritaigacari, aro itonganaque oguitojaquë, isobigopë. Ishongaigapari irogomerejegui.
² Aique yogometaiguëri, icantaiguëri:

³ –Iraganinasëretaiguëri Tosorintsi antagaisati ira cantatsi: “Nantingomintimari Tosorintsi. Nocoguini irojocajinaro ora nacantaguetomotiri quimingari, iragabisaicotajinata tenta nagabisaicotajima naneni”. Aro iragabisaicotajiri Tosorintsi. ⁴ Iraganinasëretaiguëri Tosorintsi omagaro ira agasëretaigacha, omagaro ira aragacha. Aro inganinasëretagaiganaqueri Tosorintsi. ⁵ Iraganinasëretaiguëri antagaisati ira te inguengasantima, quero iguisabacaga. Aro Tosorintsi ingábintsasanoiguëri, imëri ora caninaro. ⁶ Iraganinasëretaiguëri Tosorintsi omagaro ira cogasantatsi ingante caninasati. Iromitocotaiguëri intime caninasati. ⁷ Iraganinasëretaiguëri Tosorintsi antagaisati ira cantaneintëgotiri ira basini. Aisati ingantaneintëgotasantëri irojogui Tosorintsi. ⁸ Iraganinasëretaiguëri Tosorintsi omagaro ira quingasëretaigacha caninasati aisati cantatsi caninaro. Aro ironijagaiguëmari iriro Tosorintsi. ⁹ Iraganinasëretaiguëri Tosorintsi antagaisati ira aguimairenqueri quisachari. Aro intomintaiguëmari Tosorintsi. ¹⁰ Aroca inguisaiguëmi aroquenta picaninataiguë, pinganinasëretague. Aro iragasobicaiguëmi Tosorintsi cara igáanti Iriro. ¹¹ Aisati inganquimica catsimari, irinibatocotimica ora te onganinate, intsoiguëgotimica aroquenta piquemisantaiguëna, pinganinasëretague. ¹² Jee,

pinganinasëretasantaigue: imaignuëmi Tosorintsi ora caninaro cara Jonogaguitequë aisa icanta ipaignuëri comantantatsiri jirai cara iguisaignuëri imatsiguenga. Iro ro quero pipëgataguëtari, ingantocoquiminta Tosorintsi caninaro.

Ira quemisantatsiri yosiacaro pibega patiari aisati pibega michero.

(Mr 9.50; Ir 14.34-35)

¹³ Aisati icantaiguëri Jesus:

—Pigóiguë obotiatëri ibatsa arota quero isititi. Carari omasangatanëca patiari ora cochotacaguero, quero ocomeitanai, ojoqueroti sotoquë iranëiro ogatiquengani. Obirojegui posiacaro pibega patiari: poganinataiguiri matsiguenga. ¹⁴ Aisati obirojegui picantaro michero yaca quibatsica. Iniaiguëmi matsiguenga ora picantaiguë aisa ocanta iniaiguëro poeboro inatsi oguitojaquë. Quero pimána. ¹⁵ Aisati posangueguitetocotaiguëri matsiguenga ora caninaro aisati picantaro michero. Cara poboverotica, quero pimániro osobica cantiri, carari poguërotica jonoquë arota osangueguitetocotiri omagaro timatsi pongotsiquë. ¹⁶ Aisati obirojegui, pintimaigue caninasati arota iraniaiguemi pomatsiguengajegui cara caninasati picantaiga. Aro iraniacantinaiguëri Pabati Ira timatsi Jonogaguitequë.

Jesús icomantëgotëro isanguenare Moisés.

¹⁷ Përosati yogomeque Jesús:

—Teri iro ro nopocasite nojocaguimiro cara piquemisantaiguëro isanguenare Moisés aisati isanguenare comantantatsiri.

Nipocasique nogometaguëmiro ora icantasanti. Nomoncaraquero. ¹⁸ Aisonori nangantaiguëmiro oca: otsonguëmaca quibatsi aisati Jonogaguite carari quero pitsonga isanguenare Moisés irooti cara omoncaraquima antagaisati ora icanque. ¹⁹ Queroca piquemisasantiro isanguenare, aisati aroca pogometiri pomatsiguenga cara quero iquemisantantiro, quero iniacaninantsantimi Tosorintsi cara iragáantanequë. Carari aroca pinguemisasantëro omagaro isanguenaque aisati pogometaguërica pomatsiguenga inguemisantantiro, aro imëmi Tosorintsi pomitocotaiguëri cara igáanti. ²⁰ ¿Pijitasitaiga Tosorintsi iniacaninataiguëri bariseo aisati ira ogomeantiro Sanguenari? Yamai nongomantaiguëmi, teni iromoncarataiguero ora icocagaigabitari Tosorintsi. Aisati obiro, queroca pabisiri iriro, queroca picaninatasantaiguí, quero piáti obiro cara iragáantanequë Tosorintsi cara itingomibintanti.

Icanque Jesus: “Quero piguisabacaga”.

(Ir 12.57-59)

²¹ Aisati icanque Jesus:

—Pigóiguë icantaiguë jirainisati: “Quero póganti. Aroca póganque, ingasitígatëmi Tosorintsi”. ²² Carari nongomantaiguëmi Naro: quero piguisaneintiri pomatsiguenga. Aroca pinguisaneinqueri, ingasitígatëmi pitingomi. Aroca pinganqueri: “Te pigóte”, inguisaiguëmi obatacagantatsiripague icarati 71. Quero picantëmatiri pairoraca querota pitsipireiro cara Sharincabeniquë. ²³ Cara pijáqueca

ibangoquë Tosorintsi aroca pógüëneri pitaquineri pobira cara itagantariquë, carari piquianca aiti ora iguisëgotantimi pomatsiguenga, ²⁴ atsi pijocanëri pobira cara, pijátasitiri ira quisëgotimi. Pobetsicobagaima, págacaninatobagaima. Aique popigaima ibangoquë Tosorintsi, pógüineri pobira. ²⁵ Aintaca pomatsiguenga irácagantëmi, pobetsicagairi pinguencaguimari. Pingante: “Intsome obetsicobagaima”, queroquerai yáganëmi cara poesitoquë. Aro ira joes iragáqueri soraro: “Páganëri ica”. Aique iromianquemi cara iromingamentoquë. ²⁶ Aique queroca pipënabentiro antagaisati pirebetiri, quero yomisotocajimi aisati.

Icanque Jesus: “Quero pintantopitiro pijina; querootisati pintantopitiri pijime”.

(Mt 18.8-9; 19.9; Mr 9.43-47; 10.2-12; Ir 16.18)

²⁷ Përosati icantaiguëri Jesus:

—Pigóiguë icantaiguë jirai: “Quero pintaguetiro tsinane cagaro pijina. Quero pintaguetiri sërari cagari pijime”. ²⁸ Carari nongomantaiguëmi Naro: pinetseroca tsinane pinebetëmaro, aisati pinguengasëretëro pintëro, aroque pintëro ora te ongomeite. Aroque paguimintimaro pijina. ²⁹ Nosiacagantëmiro: oraca antaquemine piroquisonori ora quimingaro, pijocajiro ora picantagueti te onganinate. Aro pobetsiquiro pisëre aisatime ongantima pinguitsoguirome piroqui, pijoquintirome. Aro quero piáti Sharincabeniquë. ³⁰ Oraca antaquemine pobacosonori ora te onganinate, pijocajiro ora picantagueti te ongomeite. Aro pobetsiquiro

pisëre aisatime ongantima pitotirome pobaco, pijoquintirome. Aro quero piáti Sharincabeniquë. ³¹ Aisati ongangingani jirai: “Aroca pingoque pijocajiro pijina, pisanguenatinero pomero ora pijogantaimaro, aro pijoquero”. ³² Carari nongomantaiguëmi Naro: quero pijoquero pijina. Aroca pijoquero, aisati págae basini, aroque paguimintëmaro pijinasonori, picantaguëti ora te ongomeite. Aisati ira ágairone ora pijoque, aiti irantane ora te onganinate. Aintaca tsinane ojoqueri ojime ágairica basini sërari, aroque ontantopitiri paguimintacari ojimesonori. Iroonti patiro caninataque pijoquero pijina aroca aguimintëmi, quero basini.

Icanque Jesus: “Quero pamatobitiri pomat-siguënga”.

³³ Aisati icanë Jesus:

—Aisati pigóiguë onganti. Aroca pijoquero, aisati págae basini, aroque paguimintëmaro pijinasonori, picantaguëti ngani jirai: “Quero picantasita: ‘Igóque Atingomi nasatironguëro omagaro nacanquimi. Aroca nomatobiquimi, iróguinata’. Aroca pinganque: ‘Igóque nasatironguëro omagaro nacanquimi’, aro pomoncaratima aisonori”. ³⁴ Carari nongomantaiguëmi Naro: quero picantasitëmata. Quero pinibati: “Aisonorica aiti Jonogaguëte, aisa ocanta nanibare, aisonori catingasati nomoncaraquimaro ora nacanquimi”. Nangantaiguëmi Naro: ora Jonogaguëte iroonti iragáantomento Tosorintsi. Igóti aisonorica

pinibati. ³⁵ Querootisati pinibati: “Aisonorica aiti quibatsi, aisati aisonori catingasati ora nacanquimi; nomoncaraquimaro”. Carari ora quibatsi iroonti ora yagatiqui Tosorintsi. Igóque pitsoiganica. Querootisati pinibati: “Aisonorica aiti Jerosarén, aisati aisonori nanibatëmi catingasati”. Carari nangantaiguëmi itingomibintaiguëri Atingomi omagaro Jerosaresati. Igóti Iriro aisonorica pinibati. ³⁶ Querootisati picanti: “Iritoitinata naguisiquë queroca ninibati catingasati”. Nacanquimi te pigóte ati ongantima pingamaque; paniro igóque Tosorintsi. Pintingomintimari Iriro igótinta pitsoiganica. ³⁷ Pinibate catingasati. Quero pitsoiga, querootisati pamatobianti. Caninataque pintëroca pairoraca, pingante: “Jee, nantëro”. Queroca pintiro, pingante: “Quero nantiro”. Aroque. Te onganinate pomitojaiguiro pinibare.

Jesos icanti: “Quero pipëgatari ira basini”.

(Ir 6.29-30)

³⁸ Përosati icanque Jesos:

—Pigóiguë ongantingani jirai: “Aroca pinguitsoguëneri iroqui basini, caninataque iripëgaquimi inguitsoguemiropasi piroqui. Aroca piquëriaitëri pomatsiguenga irai, caninataque iripëgaquimi iriquëriajiquimiro pasipiji”. ³⁹ Carari nongomantaiguëmi Naro: quero pipëgatari ira quisimi; aroca irancho tangaborotëmica cara poboronoriquë, popisitaima pomëtiguimari queroca poboro ingapojaboroquemi aisati. ⁴⁰ Aisati aroca ingoque sërari iráganëmi catingasatiquë joes, ingoque irágotipëmiro

pigamisate, pomeri pobasitoro aisati. ⁴¹ Aroca iromeratëmi paniro, inganquimi: “Páganënar oca nasica poro quirometoro”, aro pigabisëneri pite quirometoro. ⁴² Aroca iromanaquemi pomatsiguenga: “Pomenaro”, aro pomëtiguiri. Aisati aroca inganquimi: “Pomirisitatinaro oca”, aro pomirisitaqueri, quero pometopitari.

Icanque Jesus: “Pinintaiguëri quisaneinquimi, pingábintseri”.

(Ir 6.27-36)

⁴³ Përo icantaiguëri Jesus:

—Piquemaiguë cara pomatsiguenga cantaigatsi: “Pingábintseri pomatsiguenga, carari pinguisaneintiri ira quisaneintimi obiro”. ⁴⁴ Carari nangantaiguëmi Naro: pinintaiguëri omagaro ira quisaneintimi aisati cantasitëgotaguetaiguimi, aisati pomanocotaiguëri iraegui cantëgotaguetimi catsimari arota ingábintsaiguëri iroso Tosorintsi. ⁴⁵ Cara pingantaiguë negaca, poniagaiguëma aisati picantari ibega Tosorintsi, Ira piquemisantaiguë, Ira tomintaiguëmi. Ainta Iroso canta Jonogaguëtequënta, cara yobetsiquiri paba cara yobariaguitetocotaiguëneri antagaisati, ira caninari aisati ira te inganinate. Aisati angani, yobariatëneri antagaisati, ira quemisantatsi aisati ira te inguemisante. ⁴⁶ Aroca pingábintsëri paniro ira cábintsëmi, ¿Pijiqueco iraniacaninatëmi Tosorintsi? ¿Teco aisati ingábintsabacagaiguëma ira coigotaiguëmi piguireguëte, ipagantineri cobeingari cara Iromaquë? ⁴⁷ Aroca pobetsataigabaquimari paniro pomatsiguenga,

¿Pairo picantaiguë caninari? ¿Teco aisati irobot-satobagaiguema ira cagari jorío, ira te irogógueri Tosorintsi? ⁴⁸ Pinganinatasantaiganaque, pingantaiguemari ibega Piri Tosorintsi. Ícaninatasanoti Iriro; inintasantaiguëri omagaro matsiguenga.

6

Yogometaigái Jesus ati angantima angábintsante.

¹ Aisati icantaiguëri Jesus:

—Pigamema. Quero piquemisantomemega arota irianicaninataiguemi matsiguenga aisonori obiro iroontita pamatobitaigaseguiri. Aroca pumatobitaiguëri negaca, quero iniacaninatimi Pabati Tosorintsi canta Jonogaguítequë. ² Cara pomasitaiguëmarica pomatsiguenga ira cogatsi pairoraca quero picomantaguetiri basini. Irooti icanque ira quemisantomemegacha. Cara ipirica pairoraca ira coguitiacha, icomantaiguëri antagaisati. IcoGUI irianicaninataiguëri iriro. Nangantasantaiguëmi oca: iniacaninatabitarica iriro imatsiguenga, quero iniacaninatiri Tosorintsi. Aroque yáguëro iraisati. ³ Carari cara pomasitaiguëmarica ira cogatsi pairoraca, pomániro. Quero pigótacaguiri basini. ⁴ Aro quero igóti pomatsiguenga cara pomitocoqueri ira coguitiacha. Carari irogótocoquimi Tosorintsi, imëmiro ora caninari.

Yogomecái Jesus ati angantima cara omanoco-queri Tosorintsi.

(Ir 11.2-4)

⁵ Përosati yogomeanti Jesus:

—Aisati, cara pomanocotaiguërica Tosorintsi, quero posigari ibega ira quemisan-tomemegachari. Yamanaigasegui iriro cara yapatoitaiga joríojegui aisati cara abatsiquë arota iraniacaninataigueri imatsiguenga. Aisonori nacantaiguëmi oca: aroque yáguëro iraisati. ⁶ Carari cara pomanocotaiguërica Pabati, pinganaque tsomagui, pisitocotanëma, aro pomanocotiri Piri. Iraniaquemi Iriro paniro obiro, iraniacaninatëmi, imëmiro ora caninaro. ⁷ Aisati cara pomanocotaiguërica, quero pinibatasita aisati picantari ibega ira te irogóigueri Tosorintsi. Inibatasitaiga iriro bero bero aronta ijitaigabita inguemaigabaqueri Tosorintsi cara yomitojaiganaquero irinibare. ⁸ Quero posigaigari ibega iriro. Igótasanti Tosorintsi antagaisati ora picogaigui cara queroquerai pamaniri. ⁹ Iroro cara pomanaguërica Tosorintsi, pomanocotiri cantacha negaca: “Pabati nasiatiegui, ainta Obiro Jonogaguitequë, nocogaigui cara iraniacaninataiguemi omagaro matsiguenga Obironta Natingomisonori. ¹⁰ Nocogaigui pigáantasantaguena yaca quibatsica; aisati nocogaigui nanganque antagaisati ora picocagaiguina. Aisati nocogaigui inganque omagaro matsiguengajegui ora picocagaigui aisati ingantaiguëmari iraegui timaigatsi cara Jonogaguitequë icantaigasegui omagaro ora picocagaigui. ¹¹ Pomapinintaiguena noperi antagaisati cataguiteri. ¹² Aiti nacantomotague-quimi ora te onganinate. Pingábintsasantaguena, pijocajinaro quero piquengainaro aisa ocanta

nojocajineri ora icantaguetomotina matsiguenga ora te onganinate, teni nanguisaneintajiri. ¹³ Quero pinintacaguiri camagari cara irantacaguina ora te onganinate. Përosati cara pigáantasantagueti omagaro. Pasintaguitetaro antagaisati. Përosati pitasongantasantagueti Obironta sintsirisonoriguinte. Përosati picobeingaguitetasanti. Aro ocarati, amen”.

“Pijocajineri ira basini ora icantomotaguequimi”.

(Mr 11.25-26)

¹⁴ Aisati icantaiguëri:

—Aitosati aroca pijocajineri ira basini ora icantomotaguequimi te onganinate, ingábintsaiguëmi Pabati Tosorintsi Ira timatsi Jonogaguitequë, irojocajimiro aisati ora picantagueti obiro te onganinte, quero iquengaimiro. ¹⁵ Carari queroca pijocajineri pomatsiguenga ora icanquimi te onganinate, querootisati ijocajimiro Atingomi ora picantagueti cagaro caninatatsi.

Yogomecái Jesus ati angantima cara atitaiguëma.

¹⁶ Përosati yogometaguëri Jesus:

—Cara pititimaca pomanocoqueri Tosorintsi, quero pigótacaguiri basini matsiguenga. Quero aisa picantaigari ibega ira quemisantomemegacha; cara ititopiantaiga iriro, yogasëretomemegaca arota irogóontëmari cara itita, aisati iraniacaninataiguëri matsiguenga. Nacantocotaiguëri oca: aroque yáguëro iraisati. Quero ipiri Tosorintsi. ¹⁷ Carari nacantaiguëmi, cara pititaiguëmaca, caninataque pobetsiquima,

pinguibima pibega cara pametaiga. ¹⁸ Aro quero igócotimi pomatsiguenga cara pitita. Carari irogóquimi Pabati jonoquë, imëmi aisati.

Icanque Jesus: “Pingogue cara imëmi ora pasi canta Jonogaguitequë”.

(Ir 11.34-36; 12.32-34)

¹⁹ Aisati icantaiguëri Jesus:

—Quero pomitojaiguiro ora pasintagueta yaca quibatsica: yaca aiti ora irapë caji, aiti basini oraaquima, basini egatanë, aisati ora ingositëmiro cosirinti. Otsonganaquima omagaro. ²⁰ Carari pingogue iromitojaiguiro tojai ora pasi përonta cara pinë canta Jonogaguitequë, cara quero yapiro caji, quero piraaga, querootisati icositimi, quero pitsonga. ²¹ Aitica ora pasintagueta yaca quibatsica, pinguengasëretapinintiroca ora inatsi yaca quibatsica; carari aitica pasi canta Jonogaguitequënta, pinguengasëretapinintirica Tosorintsi. ²² Aiti piroqui ora piniaanta, ora pigónta. Posiacaro obotagantsi ora poboonta tsitiniriquë, piniantaro. Aroca ocaninatomoquimi, pigóiganaque, ²³ carari queroca ocaninati, quero pinei, quero pigóti, pitimi tsitiniriquë. Aisa ocanta aroca pinguengasëretapininquero ora te ongomeite, quero pigótiri Tosorintsi, përosati pitimi tsitiniriquë.

Icanque Jesus: “Aroca pintanontabitima obiati quero picantiro ora icocaquemi Tosorintsi”.

(Ir 16.13)

²⁴ Aisati basini icanque Jesus:

—Quero picantiro piquemisantiri pite poba-
torote. Aisa ocanta aroca pingantineri Tosorintsi
omagaro ora icocaquemi quero picantanonta
obiati. Aroca pingoque pingantanontima obiati,
quero pintineri Tosorintsi. Quero picantiro pite.
Aroca pinintasantèri Tosorintsi, quero picogui
popobotiri piguireguitè. Aisati pinintirica pigu-
ireguitè, quero piquemisantiri Tosorintsi.

*“Quero pogasèreta Irironta omisantimi Tosor-
intsi”.*

(Ir 12.22-31)

²⁵ Aisati icanque Jesus:

—Yamai nongomantaiguèmi: quero
pogasèretocotaro poperi, pomire, piguitsagare,
pairorapagueraca. Irironta timaquimine
Tosorintsi, ¿Queroco ipaiguimi poperi aisati?
¿Queroco icaaguimi pomanchaqui aisati?
²⁶ Pinetsaiguèri tsimiripague, pingueinguema.
Teni imanguitanontima, teatisati iráguiro
ibanguire iroquero ibangoquè, carari
ipagueiguèri Pabati Tosorintsi iraperi antagaisati
cataguiteri. Aroca yomisantaiguèri tsimiripague,
aisati obirojegui iromisantasantaiguèmi
pabisaiguèrinta tsimiripague. ²⁷ Aroca
pinguengasèretèma, ¿Aroco pomitojaiguèro
posarinite? Quero. Pitsipiriasita cara
piquengasèreta. ²⁸ Aisati ¿Pairo pogasèretocobiritaro
piguitsagare, pairoraca pinguitsagatima?
Pinetsaiguero otegapague tobari. Te onguengue.
Te onguirique, teatisati ontèmate, ²⁹ carari
iroro caninarosonori. Jirai itimi Saromón,
itingomi joríojegui. Iquitsagata caninasati

iguitsagare carari te aisati ingantimaro pibega orapague otega. ³⁰ Tosorintsi aganinatëro otegapague tobari, ora quero ocosamaniti omanapague osiguiricanë, iritaguëro matsiguenga. Cara yoganinatëro otegapague Tosorintsi, ¿Teco iromisantaiguemi obiro aisati; inguitsagataiguëmi? ¿Pairo pitsoingobitaiguëri? ³¹ Irero, quero piquengasëretaguëta quero posamita: “¿Pairo nopë? ¿Pairo nóguëma? ¿Pairo nanguitsagaquima?” ³² Aisati icogaiguero ocapague ira te inguemisante. Quero posigari irirojegui, aroquenta igóquero Pabati Tosorintsi cara Jonogaguitequë ora picogaigui obiro. Iromisanquemi. ³³ Pingogue obitsita quemisantasantërine Tosorintsi, pintingomintasantimari, aisati pingogue iraniacaninatimi. Aique imagueiguëmiro ora picoguitiaiga. ³⁴ Irero, quero piquengasëretaguëta naramani, pairoraca pinganque. Cara orequima naramani, aro pinguengero. Aiti ora piquengasëreti yamai; te onganinate pigasëretima naramani aisati.

7

“Quero pini joes, quero picomantëgotiri basini”.
(Ir 6.37-42)

¹ Përosati inibatë Jesus, icanque:

—Quero pini joes. Quero picomantëgotiri pomatsiguenga. Aroca pingomantëgotëri: “¡Cara icantaguëti iriro ora te onganinate!” aro ingantocoquemi Tosorintsi aisati: “Aiti ora picantaguëti obiro”. ² Aroca pinguisaneinqueri basini, iripëgaquimi obiro inguisaneinquimi

aisati. Aisa ocanta pingábintsëri basini, aisati ingábintsëmi obiro. Cara picomantëgotëri basini matsiguenga, aisa inganquima ingomantëgotëmi obiro Tosorintsi. ³ Aitica picantaguëti obiro te ongomeite, quero picantëmatiri pomatsiguenga: “Aiti picantaguëti quimingaro”. Nosiacagantëmiro; aitica pairoraca oquibe cara piroquiquë, ¿Caninataqueco piniaquero arosata cara iroquiquë pomatsiguenga? Quero. ⁴ ¿Pairo picantobitiri: “Majire pine, nágabitsaquemiroti ora arosata piroquiquë”, carari quero pineiro aitinta oquibe pasi piroquiquë? ⁵ Tojai picantasita. Obitsita joquërone ora oquibe pasi piroquiquë. Aique piniasantë cara pijocajineri pomatsiguenga ora arosata inaaqueri iroquiquë. Aisati picoguica pingantiri pomatsiguenga irojocajiro ora icantaguëti te ongomeite, pobate pijocajiro ora quimingari picantaguëti obiro. ⁶ Te onganinate pomapinintiri otsiti caninari ibatsa tenta ingarasiatimiri; teatisati onganinate pomapinintiri chancho irapëro caninari mopë catari jitacha périra, queronta icogui yapiro. Iratsicabitëmaro, irojoquero, inguisanaquima, iratsicanëmi. Aisati ocanta ocaninatasanti Irinibare Tosorintsi. Caninataque pinguenguitsatomotaguëtiri pomatsiguenga, carari aroca inguisaneintocoquemiro tenta iranintaigue inguemisantiro, quero picomantairi aisati.

Yogomeque Jesus: “Përosati pomanocotopiantiri Tosorintsi”.

(Ir 11.9-13)

⁷ Aisati icantaiguëri Jesus:

—Aroca pomanaqueri Tosorintsi, aro imaignuëmiro. Pomanocotopiantiri, aisa ocanta pingoqueroca pairoraca, aro imaignuëmiro. Aisa ocanta pirequimaca pongotsiquè, pingaimapèri casintaro, “Pisirenaro”, aro irasiriëmiro. Aisati cara pèrosati pomanocotopiantèri Tosorintsi, imaignuëmiro. ⁸ Aisonori imaimi Tosorintsi ora pomanocotopiantèrira. Aisati cara pingogaiguëca iranetsacaquimiro. Cara pingaimapèrica irasitëcoroquè, irasiriëmiro. ⁹ Aroca iromanaquimi pitomi: “Apati, pomena pan”, querosonori popiri mopè. ¹⁰ Aroca iromanaquimi: “Pomena sima najagueni”, quero popiri marangue. ¹¹ Pinetsaigue. Te pinganinatasantaigue obiro, carari pigóiguè pingábintsaiguëri pitomi popabaqueri ora icoguitiaca. Icaninatasanti Tosorintsi, Ira timatsi Jonogaguitequè, igótasanti icábintsaiguëri antagaisati ira manëgotaiguiri. Imaiguëri ora caninaro.

Acanque Jesus: “Pinintobagaiguema”.

(Ir 6.31)

¹² Aisati yogometaignuëri irogomere Jesus, icanque:

—Aroca pingogue ingábintsaiguimi matsiguenga, pingábintsaiguëri obiro. Pinintica ingantaneintëgotimi iriro, aro pingantaneintëgotiri obiro aisati. Iroro ora isanguenataiguë jirai Moisés aisati omagaro comantantatsiri.

Jesus icomantëgotëro pite abatsi.

(Ir 13.24)

¹³ Aisati icomantaiguëri matsiguenga Jesus:

—Aroca pininti pingapë cara itimi Tosorintsi, pingapë otiomijanicuë omoro. Aiti basini omoro oquibe, aisati basini abatsi oquibe cara te omomirintsite iriáiguë matsiguenga, Carari iraegui quenantaro abatsi oquibe iriáiguë cara Sharincabeniquë, iratsipiriantëquero përosati. ¹⁴ Irari quenantaro otiomijanicuë omoro aisati otiomijani abatsi iraretaiguëma cara Jonogaguitequë. Arosonori quenantaigaro oquibe abatsi, carari arosataanti matsiguenga icaigapë omoroquë otiomijani aisati iquenantaigaro otiomijani abatsi.

Jesos icomantëgotëri matobiantatsiri.

(Ir 6.43-44)

¹⁵ Aisati icantaiguëri Jesos:

—Pigamemari matobiantatsiri ingo-mantomemeguëmiro Irinibare Tosorintsi. Ingantabepëmarime ibega oisha; pijitaigabaquero quero icantimi pairoraca. Carari irianti cantapëmarine ibega secari irianti cobeingarisonori.

¹⁶ Pinetsasantaiguero ora icantaguëti, ora pigóontëmari icaninatica. ¿Páguëroco oba cara totseisiquë? Teni. ¿Paguëroco igo cara jirinasiquë? Teatisati. Aisati icantaiga matobiantatsiri: tiguëti ingantiro caninari. ¹⁷ Pigóiguë caninaroca anchato aisati caninaro oguitso. Aisati teca onganinate anchato teatisati ongomeite oguitso.

¹⁸ Ora caninaro anchato tiguëti ongantima onguimingate oguitso. Aisati ora anchato ora te ongomeite tiguëti ongantima onganinate oguitso.

¹⁹ Pigóiguëro anchato te onganinate oguitso, otoquero ataquero aisati. ²⁰ Aisati pigóigabaquero

ati icantaigapa ira cogatsi irogometimi. Pigóiguë itimica caninasati, aisati irogomepëmiro Irinibare Tosorintsi caninasati. Carari teca intiomotimi caninasati, teatisati irogomeante catingasati.

Ira játaiguënguïtsine cara Jonogaguïtequë.

(Ir 6.47-49; 13.25-27)

²¹ Aisati icanai basini Jesus:

—Aintaca pairiraca cantënane: “Natingomi, Natingomi”, quero iáti cara Jonogaguïtequë cara nigáanti Naro. Aintanta inabita inganquina: “Obiro Natingomi, natingomintasantëmi”, carari quero iáti cara nagáantanequë. Irianti játënguïtsine Jonogaguïtequë iraegui quemisanqueri Pabati aisati icantasantineri ora icocaqueri omagaro.

²² Aiquenta cara nopocaje nongomantëgotai gapëri antagaisati matsiguenga, nanganqueri negaraca iriátë aisati pairoraca inganque. Ainta tojai cantasitënane “Natingomi, nocomantëgotëmi. Aisati nacantaiguëri matsiguenga inancari camagari: ‘Naquemisanquerinta Jesoquisito Natingomisonori, iroro pijátopitiri ica, pijocanëri’. Aro iátaji, ijocanëri. Aisati nitasanganti Obironta omitocoquena”. ²³ Carari nangantaigapëri: “Teni nogóiguëmi. Pijáigue jaanta, tenta pinguemisan-tasantina. Piquemisantomemegasita. Tojai picantagueigui ora te onganinate. Picantanonta obiati”.

²⁴ Pinetse, aroca pinguemobëro ora nogometaiguëmira pinguianquero, pinguemisanquero ora nococaquimi, pintaiguëro, aro naniacaninataiguëmi. Obiro pingantimari ibega sërari ogótatsiri yobetsiquëro ibango coshobatsariquë. ²⁵ Opariaque oquibe angani,

pipoque jarini omotoncaatapa, ocoguinti-matasantapë sintsiri. Carari përosati pini ibango iroronta yobetsiquë coshobatsaroquë. Coshori pongotsi. ²⁶ Carari teca pinguemobëro ora nogometaignëmira, te pinguengero, te pinguemisantiro ora nococaquimi, te pingantiro, aro nangantaiguëmi: obiro ibega sërari te irogóte. Yobetsiquëro ibango cara sibitabatsaroquë. ²⁷ Opariatapë oquibe angani, pipoque jarini omotoncaatapa, ocoguintimatasantapë sintsiri. Aito cara pitëanë pongotsi catsiguero; páganëro jarini. Itsipiriasicaro ira obetsicabitano. Aisa onganquima pitsipiriasiquima queroca picantasantiro omagaro ora nococaquimi.

Itonquero Jesus yogomequeri imatsiguenga cara oguitojaquë.

(Mr 1.22)

²⁸ Aroque itonquero Jesus yogometaignabaqueri matsiguenga cara oguitojaquë. Iquenganeintasantaigapëri. Icantobagaiganaca matsiguenga:

²⁹ –Tojai igóti Iriro. Teni asi anguemiro cantacha nega. Yogomeanti aisati icantari ibega Atingomi; teni aisati ingantima ira ogomeantiro isanguenare Moisés.

8

Jesus yogaguibegajiri ira iribatsasetaga.

(Mr 1.40-45; Ir 5.12-16)

¹ Aroqueque icomantanque Jesus cara oguitojaquë, yanongopa. Aro yoguiataiganaqueri arosonori matsiguenga. ² Aro iátasiqueri poro

sërari iribatsasetaga. Yobaticagueritotasipari, yamanopëri:

—Natingomi, pinintica piguëtetainaro nobatsagoro. Nigóque picoguica pigaguibegajina.

³ Aro itimagonaguitasitanacari Jesus yotsagaqueri icanqueri:

—Nocogui yamai; nagabisaicotajimi.

Aito cara opeganaa ora iribatsagoro ibeganaa.

⁴ Aro igáqueri Jesus, icanqueri:

—Quero picomantaguetiri pairiraca, carari pijáte catingasati, poniagapëmari saseriroti, ira nibabintimiri Tosorintsi. Pingantiri: “Nibatsagabeta, carari pinetsena yamai, abisëgotaina”. Aisati pomeri pobira: iróquimiri saseriroti iritaguëneri Tosorintsi cara igáqueri Moisés jirai. Ora irogóontimi cara piquëtetanai.

Jesus yoguibegajiri ironomire capitán.

(Ir 7.1-10)

⁵ Aro yogaganaca Jesus, aisati ira aguiataiguëri, yaretaigacaro poeboro jitacha Caperinao. Ipocasipëri sërari cagari jorío, irianti Iromasati. Iriro capitán, igátaiguëri 100 soraro. ⁶ Icampëri Jesus:

—Natingomi, ainta nonamire cara nobangoquë, emëngatëni. Ainta icatsitasantëni. Nocogui pigabisëgotairi.

⁷ Icanëri Jesus:

—Aro najáque cara, nagaguibegajantiri.

⁸ Carari yotabitanëri capitán:

—Nigóquimi, Obiro Natingomi caninari; nitsoingaa naati, te nanganinate. Quero piáti nobangoquë. Nigóque aroca patiro pinibate, aro irobegajima. ⁹ Ainta agátinari, aisati ainta soraro ira nigátaigui naro. Aroca nagáqueri nosorarote: “Pijáte”, aro iriátë. Aroca nanganqueri basini: “Popoque”, aro iribocapë. Aisatica nagáqueri nomeraro: “Pingantiro oca”, aro inganquero. Aisati ocanta pibega Obiro. Omoncaraquima pairoraca pinibati.

¹⁰ Aro iquenganeintacari Jesus, icantaiguëri iraegui aguiataiguëri:

—Nacantasantaiguimini: tojai iquemisantasanti ica, yabisanaqueri antagaisati joríojegui quemisantatsi. ¹¹ Aiquenta cara igáanti Tosorintsi, iribocaigapë arosonori basiniati matsiguenga paniaigacha omagaroquë quibatsi. Irisobicaigapë intsibataigapëmari nomatsiguengajegui Abaram, aisati Isac, aisati Jacob cara iragáantanequë Tosorintsi.

¹² Carari quero ipoqui tojai jorío cara tenta inguemisantaiguëri Tosorintsi. Ico Gabeca Iriro iriáigue jorío cara iragáantanequë, carari itsoingaguëri Iriro jorío. Iro ro iragátaguëqueri cara otsitinitasanti. Tojai iratsipiriasantaiguë cara aisati iratsitsiaguitetanë.

¹³ Aique icanqueri capitán Jesus:

—Yamai, pijáte pobangoquë. Aroquenta piquemisanquina noguibegajiri ponamire.

Aro irooti ibeganaa ironomire.

*Jesus yogaguibegajiro iraguero Peroro.
(Mr 1.29-31; Ir 4.38-39)*

¹⁴ Cara iáque Jesus ibangoquë Peroro, icanaque iniopëro iraguïro pinariasega osamamentoquë. Ojanaitë ocatsingaeguisigui. ¹⁵ Aro yotsagaquero obacoquë, yoguibegajiro. Aito cara ocabiritaja, opëri iraperi.

Jesus yogaguibegajiri tojai basini janaitaguetatsiri.

(Mr 1.32-34; Ir 4.40-41)

¹⁶ Cara ochapinitanë, iátasitaiguëri, yáganëri tojai matsiguenga ira inanca camagari. Ijocajineri Jesus igamagarite, aisati yogaguibegajiri omagaro janaitaguetatsiri. ¹⁷ Icanquero Jesus negaca arota iromoncaraquero ora isanguenatocoqueri jirai comantantatsiri jitacha Isaías:

Aiquenta iribocapë Quirisito agabisaicoquerine tojai janaitaguetatsi, tojai ingábintsaiguëri.

Icanque Jesus: “Piguiatapëna”.

(Ir 9.57-62)

¹⁸ Cara yapatobiritaigapari Jesus arosonori matsiguenga, icanqueri irogomere:

—Intsome antatinta.

¹⁹ Ainta inasegui paniro ogomeantiro isanguenare Moisés, yotsitipari Ira Jesus, icampëri:

—Ogomeantatsiri, negaraca pijáque nocoguini naguiatanëmi.

²⁰ Yotabitanëri Jesus:

—Aiti imoro somani cara isami, aisati aiti imagosi tsimiripague cara isami, carari te ine nasi nobango cara nanareaquima Naro aronta nopaniaca Jonogaguïtequë, nomatsiguengatapë cara niboguë yaca quibatsica.

21 Ainta basini irogomere icanqueri:

—Natingomi, nocoguini naguiatanëmi, carari pënibaque ingamaque apati. Pinintacaguina natiänëri; aique coshoni naguiatanëmi.

22 Yotabitanëri Jesus:

—Piguiatina obiro. Ainta tsoengatsiri, ira te inguemisantiri Tosorintsi; iritijairita piri.

Jesus yoguimairenquero sintsiri coguentima.

(Mr 4.35-41; Ir 8.22-25)

23 Aro yotetanaca Jesus pitotsiquë, aisati itsibataiganacari irogomere. 24 Aro inariopa Jesus isamapë. Omanapague coraque pipoque oquibe-guinte coguentima, omotoncaatapa, potiatanaca pitotsiquë. Përosati isamasegui Jesus. 25 Aro itsorogasantanë irogomerejegui, icabocapëri icanqueri:

—¡Natingomi, atsiticoiguëni! ¡Pigabisaicotaiguena!

26 Icabirica icantaiguëri:

—¿Pairo pitsorogobitaiguë? ¿Pairo te pinguemisantobitina?

Aique yoguimairentajiro sintsiri coguentima aisati yoguimairenquero angaare aro omairiatasantanai. 27 Inetsaiguëri Jesus irogomere, iquenganeintasantaiganacari, icantobaca:

—¿Ati icanta ica? Inibatë, aro oquemisantasantanëri coguentima aisati angaare.

Jesus yogabisaicoqueri pite matsiguenga inancari tojai camagari.

(Mr 5.1-20; Ir 8.26-39)

28 Aro yaretocotaigaca antatinta quibatsiquë jitacha Garara. Cara ainta pite sërari cara itiagani

igamaga aroque inantaigacari camagari itongui-bocari yotsitipari Jesus. Ira camagari tojai icat-simatacaqueri ira pitirooti sërari. Aro itsorogas-antèri imatsiguenga, te inguenaigae cara itiaiguiri igamaga. ²⁹ Icaimaigapè:

—Obiro nigóquimi, Jesus, Obiro Itomi Tosorintsi. ¿Pairo pipocasibiriquina? ¿Naroco pipocasique yamai pitsipiriacagaiguëna? Terai omoncaratima naro cara natsipiriaque canta Sharincabeniquënta.

³⁰ Ainta inaigasegui arosonori chancho ya-paisigui. ³¹ Aro yamanaiguëri Jesus camagari:

—Aroca pigabisaicoqueri ica sërarica, pigátaiguena cara chanchoeguiquëra ninampëmari iriro.

³² Jesus icantaiguëri:

—¡Pijáiguel!

Aro iáiganaque, inantaigapari ira chanchoegui. Isigaiganaca chancho cara taranguë, imatsematseiganaque angaarequë tobotn tobotn tobotn. Itsiticaiganaque ijogataiganaca omagaro chancho. ³³ Aro ira omisantiri chancho isigaiganaca cara poeboroquë, icomantagueigapëri imatsiguenga omagaro ora iniaque. Aisati icomantëgotëri sërari ira inantabeca camagari. ³⁴ Aro iátasitaiguëri Jesus tojai Gararasati, icantaigapëri:

—Atsi pijáte yamaica. Quero pipocaji yaca aisati.

9

Yogaguibegajiri emëngari Jesus.
(Mr 2.1-12; Ir 5.17-26)

¹ Aro yotetanaca Jesus cara pitotsiquë, iátocoiguë Iriro aisati irogomerejegui cara Caperinaoquë.

² Yamapëri sërari emëngari te iranëibintsataje, yamëgotantaigacari jatasintsi. Igóque Jesus cara iquemisantaiguëri, icabëri:

—Pinganinasërete, nomatsiguenga. Nojocajimiro ora picantaguëti te onganinate. Quero iguisëgotaimiro Tosorintsi.

³ Ainta inasegui irapague ogomeantiro isanguenare Moisés. Icantaneintobaganaca: “Icantocotaguëtasitari Tosorintsi Ica”.

⁴ Igóque Jesus ora iquenganeintaigaca, icantaiguëri:

—¿Pairo picantocobiritaiguëna ora te ongomeite? ⁵ Aroca nanganque oca:

“Yamai noguibegajimi, panëitanae”, ¿Teco pinetsaigabaqueri? Queroca nacantiro, picabíntsátaiguëna. Carari pijitaiguë nacantasita cara nacanqueri: “Nojocajimiro ora picantaguëti te onganinate”.

⁶ Nocogui noniagaiguëmi te nangantassitima. Nopaniaca Jonogaguëtequë, nomatsiguengatapë cara niboguë yaca quibatsica. Icanquena Pabati: “Pijocajineri ira cantaguëtiro te onganinate; aique quero aguisëgotëtajari ora icantaguëti”. Nocogui pigóigue aiti nojocajineri ira cantaguëtiro quimingari yaca quibatsica.

Aique icanqueri ira emëngari:

—Pingabiritima, págairo pijatasi, pijáte pobangoquë.

⁷ Aro icabiritanaca, iátaji ibangoquë.

⁸ Iniaigabaqueri omagaro ira bototaigacha,

iquenganeintasantaigaca iniacanineataiguëri Ira Tosorintsi, icantocotaiguëri:

—Aisonori icanineatasanti Tosorintsi. Icantocotajiri Ica, cara yogaguibegajiri janaitaguetatsiripague.

Icaimëri Mateo Jesus: “Piguiatanëna”.

(Mr 2.13-17; Ir 5.27-32)

⁹ Aro yogaganaca Jesus cara nisobiqui naro, najita Mateo. Iniopëna cara nocoicotaguetiri nomatsiguenga iguireguita, nomagantairi nogobeingarite canta Iromaquë. Icampëna:

—Intsome. Piguiatanëna.

Aro nacabiritanaca, noguiatanëri. ¹⁰ Aique náganëri cara nobangoquë napaaguëri. Yapaiguë basini nagaimane tojai: irogomere Jesus, aisati ira natsibataiga coigotantatsi iguireguita nomatsiguenga ipagantaiguëri cobeingari Iromaquë, aisati ainta basini ira cantaguetiro te onganinate. ¹¹ Aro iniaigapëna bariseoegui, yosamitaigapëri irogomere Jesus:

—Te ingomeite Ogometimiri. Yapëgotaiguëri coigotantatsiri aisati ira cantaguetagatsi te onganinate. ¿Pairo icantobica negaca? Icantaguetiro ora te onganinate Irro.

¹² Cara iquemaigabaqueri bariseo Jesus, icanqueri:

—Ira cajigatatsi te ingoguari jompiantatsi, carari ira janaitatsi iriro coguari. ¹³ Pijáigue, pinguengero ora icanti Tosorintsi, jirai isanguenaquero Oseas:

Te nongogue póguinari pobira, pitaguinari; iroonti nocogui pingábintseri pitimanamireegui pingantaneintëgotiri.

Te iroro nopocasite nangaimagueteri caninatatsiri, irianti nangaimagueque ira cantaguetero te onganinate arota ingantaigaima yacaqueroa.

*Icomantë Jesus pairo te iritibiritima irogomere.
(Mr 2.18-22; Ir 5.33-39)*

¹⁴ Aique ipocasitaiguëri irogomere Joan baotisantatsiri, yosamitaigapëri Ira Jesus:

—Pinetse, nititopianta narogui aisati bariseo. ¿Pairo te iritibiritiguema pasi pogomere?

¹⁵ Yotabitaigabaqueri Jesus:

—Pigóiguë ora ametaiga cara irágantë sërari. Ingaimaiguëri imatsiguenga, irapajaqueri inganinataiganaque omagaro. ¿Pairo te iragasëbiritima igaimane? Carari cara iriátë jaanta ira águërone iina, aro iragasërequima, irititaiguëma. Aisati nacanta Naro, aikuenta najátaje, aro iragasëretocoquina, irititaiguëma nogomere. ¹⁶ Aisati pigóiguë cara pigabitëro inaga piguitsagare, páguëro inagasite manchaguintsisite. Aroca pigabitantimaro iroraisite, cara ámanaquima ontisaraanairo oquibe ora inagasite piguitsagare. ¹⁷ Aisati pigóiguë ametaiga eiro oguëro irorai oja oba cara irirai imasiquë oisha. Cara onguëchotanë obaa iritopiganëma imasi, quero paparaata. Quero pairi ogantarone oja oba irinagamasiquë. Igóque cara onguëchotanë oja oba intonganë irinagamasi, oparaatëma obaa. Aisati oca nogometaiguëmi te onganinate ongonaguero ora yametaiga omatsiguenga jirai.

*Yoguibegajiro araasetatsiri Jesus; aisati yogani-
atairo irisinto Jairo.*

(Mr 5.21-43; Ir 8.40-56)

¹⁸ Iroontita inibatasegui Jesus, ipocasiqueri itingomi jorío ira omisantiro pongotsi cara yapato-taiga, yobaticagueritotasipari, icampëri:

—Yamaica ocamaque nasinto, carari nocogui pijáte cara nobangoquë, potsagatiro piganiatainaro.

¹⁹ Aito cara yoguiataiguëri Jesus aisati irogomere. ²⁰⁻²¹ Ainta tsinane piraaseti cosamani ocarati 12 osarini, piátasiqueri Jesus itisitaquë potsagapëri, oquianca: “Aroca notsagaitëri onamiquë iguitsagare, aroje iragaguibegajina”.

²² Aro yapisitanaca Jesus, iniobëro, icabëro:

—Pinganinate, nomatsiguenga. Piquemisanquinanta, aroque pibeganaa yamai.

Aito cara pibeganaa.

²³ Aro iátaji, yaretaigaca ibangoquë itingomi jorío, iniaigapëri arosonori matsiguenga icobëbensiguiro ogamaga irisinto aisati iragaigaca tojai. ²⁴ Aro icantaiguëri Jesus:

—Pijáigue. Teni ongame oca piraicotaiguica, pisamini.

Icabíntsáigabaqueri Jesus matsiguenga. ²⁵ Cara yomisotocaiguëri iriro Jesus, icanaque tsomagui, yágobagotapëro irisinto itingomi, aro ocabiritanaa.

²⁶ Aique iquemocotaguetaiguëri Jesus antagaisati ira timaguetatsi cara aronisati.

Jesus iniacagajiri pite comarajari.

(Mt 20.29-34)

27 Cara yogaganaa Jesus, yoguiataiguëri pite sërari comarajari icaibataigabaqueri icanque:

—Obiro imatsiguengasonori David jirainisati, pingantaneintëgotaiгуena naro.

28 Icanaque Jesus pongotsiquë, aisati yoguiataiguëri ira pite comarajari. Yosamitaigabaqueri Jesus:

—¿Pijitaiguëna quero naniacagajimi?

Yotabitaiganaqueri:

—Jee, Natingomi. Nigóiguë naro aro pingantaigainaro piniacagajina caninasati.

29 Aro yotsagaiguëri Jesus iroquiquë. Icantaigabaqueri:

—Aro nanganquemi ora pijitobitaiguëna.

30 Aito cara iniasantanai. Aisati icantantaiguëri Jesus:

—Quero picomantiri basinipague: “Iniacagajina Jesus”.

31 Iriro cantënguicha iáiganaque icomantaguetaganaqueri imatsiguenga icanque:

—Iniacagajina Jesus Natingomi.

Inibatagairi Jesus ira te irinibate.

32 Cara isotocaji pite, yamaigapëri Jesusiquë sërari inancari camagari. Te irinibate. 33 Aro yomisotocajineri igamagarite Jesus inibatagajiri caninasati. Iraegui jorio niaiguëri Jesus iquen-ganeintasantaigacari icantobagaiganaca:

—Jirai te aniaigueri sërari cantacha negaca.

34 Carari icantaiguë bariseoegui:

—Imitocoqueri itingomi camagari; iroro ora igátaguëquineri matsiguenga igamagarite.

Icantaneintëgotaiguëri matsiguenga Jesus, icoque inguemisantaiguëri.

(Mr 6.34)

³⁵ Aro iquenagueque Jesus omagaro poeboropaguequë. Yogomeantagueque cara yapatotapinintaiga jorío, aisati icomantëgotantaguequero iragáantane Tosorintsi. Aisati yogaguibegajiri tojai janaitatsiripague.

³⁶ Iniaiguëri Jesus arosonori matsiguenga ira botoibiritari icantaneintëgotaiguëri, icanque:

—Tojai itsipiriaiguë, ijocaigaca aisati icantaigari ibega oisha ira te irine omisantirine.

³⁷ Aique icanqueri irogomere:

—Aisati, icaegui icantaigaro tojai oguitso panguirintsi, carari te irine tojai ira obiguitirone.

³⁸ Pomanocotiri Pitingomi iragátaiguëri tojai comantantatsiri iriáiguë, inguemisantacagaiguëri matsiguenga.

10

Jesus icoigaiguëri irogomere.

(Mr 3.13-19; Ir 6.12-16)

¹ Aique icoigaiguëri Jesus ira irogomere icarati 12. Ipaiguëri itasorintsite ora irojogantaguequimari camagari quimingari. Aisati ipaiguëri iragaguibegajiri iraequi janaitaguetatsi.

² Ainta irogomere icarati 12. Iritsita Simón aisati ijita Peroro, aisati Antiris ireinti Peroro, aique Santiago itomi Sebereo, aisati Joan ireinti Santiago. ³ Aique ainta Jeripe aisati Baritoromé; aique Tomás aisati naro najita Mateo ira coigotantatsiri; aique Santiago itomi Arijeo, aisati Tareo; ⁴ aique

Simón ira nintasantiro ibaísite aisati Joras Carioti-
sati ira ágagantëri Jesus.

*Igátaiguëri irogomere Jesus cara ingoman-
tagueantë.*

(Mr 6.6b-13; Ir 9.1-6)

⁵ Aro igátaiguëri Jesus iraegui irogomere, ican-
taiguëri:

—Quero piáigui basiniatiquë matsiguenga
cagari jorío, querootisati piáti cara iti-
maigui Samariasati. ⁶ Caraanti pijáiguë

joríojeguiquë ira naniaiguë cantaca oisha te
irine omisantaiguërine. ⁷ Atiraca pijáiguë

pinguenguitsatacaguetiri pomatsiguenga:
“Pënibaque orequima cara iragáantëri ira
quemisanqueri Tosorintsi”. ⁸ Piguibegajiri ira

janaitaguetatsiri, piguëtetairi ira iribatsasetaga,
pijocajineri matsiguenga igamagarite. Tojai

nacábintsaiguëmi, carari te nongoicotimi. Yamai
atsi obirojegui, pingábintsaiguëri matsiguenga
quero picoicotiri cara pomitocotaiguëri.

⁹ Quero páganë piguireguitë, ¹⁰ querootisati
páganë pítsaguine, querootisati páganë pite

piguitsagare, querootisati pisapatote querootisati
pigotiqui. Caninataque imasitaiguëmi poperi

ira quemaigabaquëmi aisati ora pingogaiguë.
¹¹ Cara pirequima poeboroquë, pingogopëri

quemisantasantatsiri, pintiomotiri iroso irooti
cara pigaganëma basiniquë poeboro. ¹² Cara

pingapë pongotsi, piniacaninatapëri ira timatsi
cara, pobetsatapëmari caninasati. ¹³ Aroca

iraniacaninataigabaquëmi iroso, pomanocotiri
Tosorintsi ingábintseri casintaro pongotsi,

carari queroca iniacaninataigabaquemi, quero picantiri Tosorintsi icábintsiri. ¹⁴ Queroca iniacaninatobëmi, querootisati iquemisantobëmi, popotetanaineri pojongabatsari pisapatotequë, aro pigaganëma. Pingantiri: “Tenta pinguemisan-tobëna, aiquenta iratsipiriacaquemi Tosorintsi”. ¹⁵ Aisonori nacantasantaiguëmi: itsipiriaiguëro Soromasati aisati Gomorasati, carari aiquenta cara ingomantëgotaiguëri matsiguenga Tosorintsi iratsipiriacagasantaiguëri iraegui te iraniacaninataigabaquemi.

Icanqueri irogomere Jesus: “Aiquenta ingui-saiguëmi matsiguenga”.

(Mr 13.9-13; Ir 12.2-13; 21.12-19)

¹⁶ Përosati icomantaiguëri irogomere Jesus:

—Yamai nagátaiguëmi, carari picantari oisha ira nagáque cara cobeingariquë. Tojai iratsipiriacaquemi tsoengatsiri. Pinguengas-antaiganaquima, pingante ora caninaro. Quero pitsipiriacaguiru pomatsiguenga. ¹⁷ Pigamemari matsiguenga. Irágaiganaquemi catinasati pitingomipaguequë, iratsipiriacagaiguëmi. Aisati irágaiganaquemi matsiguenga cara yapatotaigaca iripasataiguëmi. ¹⁸ Cara irogóiguëca piquemisanquina, irágaiganaquemi cara itingomipaguequë. Aro pinguenguitsatocoquina pigótacaguinari basiniati matsiguenga cagari jorío ati ongantima nagabisaicotajiri cara inguemisanquena. ¹⁹⁻²⁰ Cara irágaiganaquemi quero piquenga quero picanti: “¿Pairoroco nanganqueri?” Irogomeantëmiro Isère Tosorintsi ora pinganque. Quero pigótasita obirojegui

ora pingomantë carari onibataquemi Isëre Tosorintsi. ²¹ Aiquenta tojai inguisëgotaiquëna matsiguenga. Paniro irácagantëri ireinti irócagantëri, basini irócagantëri iraisati itomi, aisati basini irócagantaguequeri ira casintaigari. ²² Piquemisantaiguënanta, inguisaiguëmi matsiguengajegui, carari quero pijoquiro cara piquemisanquina. Aroca përosati pinguemisanquena nagabisaicotaiguëmi nágaiganaquemi cara Jonogaguitequë pintiomotaigapëna.

²³ –Cara inguisaiguëmica irægüi timatsi patiroquë poeboro, aro pisiganëma, pigaganëma basiniquë poeboro. Aisonori nongomantaiguëmi oca: quero piátaguëti omagaroquë poeboro cara itimaiguë joríopague queroquerai nipocaji Naro, Naronta paniënguicha cara Jonogaguitequë, nomatsiguengatapë. ²⁴ Quero ibatiri ira ogometiri irogomere. Querootisati ibatiri ira meratari iromerataga. ²⁵ Aisati irogomere inganquima ira ogometiri, aisati iromeraro ibega ira meratari. Aro yamai tojai iguisaiguëna omatsiguenga ijitasitaiguëna Naro Berisebó itingomi camagari. Piquemisanquinanta, aisati inguisaiguëmi, irajitasitaiguëmi pairiraca, ²⁶ carari quero pitsorogaiguiri. Yamai aiti tojai ora te irogóiguero, carari aiquenta irogóiguë omagaro cara Naro Pitingomi aisati obirojegui nogomere caninari. Aisati irogóiguëro ora icantaguëti antagaisati matsiguenga te onganinate. ²⁷ Yamai patiro nocomantaiguëmi obiro, te irogóiguero tsoengatsiri, carari aiquenta pigótacaqueri. Yamai nimánabecaro, carari

aiquenta pingomantasantaiguëri antagaisati oca nacanquimica. ²⁸ Ainta coguënguistsine iróguimi, carari quero pitsorogaiguiri queronta icantimi igátimi cara Sharincabeniquë. Irianti pintsoroque Tosorintsi: ingoqueca Iriro iróguimi aisati iragáquemi Sharincabeniquë. ²⁹ Pinetse, pigóiguë ipimantagani tsimiripague iraagueri matsiguenga, carari teca iranintacaguiri Pabati Tosorintsi quero icami paniro tsimiri. ³⁰ Aisati igótiro atiraca ocarati piguisi, igótasantëro. ³¹ Pinetse. Tojai pobataiguëri tsimiripague, tojai iquengasëretaiquëmi Tosorintsi. Iroro quero pitsoroguëti. ³² Aroca pinganqueri matsiguenga: “Ira Jesoquirisito Natingomi”, aique cara Jonogaguitequë, nanganqueri Pabati: “Itingominquena iriro, nomatsiguengatacari”. ³³ Carari pinganquerica matsiguenga: “Cagari Jesus Natingomi”, aisati canta Jonogaguitequënta, nanganqueri Pabati: “Tenta intingomintina iriro, iroro te nogótaguëtiri iriro Naro”.

“Popomirintsibentiri Quirisito”.

(Mt 16.24-25; Mr 8.34-35; Ir 9.23-24; 12.49-53; 14.26-27)

³⁴ Aisati icanë Jesus:

—Quero pijitasita cara nipoque irágacanatobagaiguëma omagaro matsiguenga. Quero yágacanatobaga. Nipoque nanganqueri iroonti inguisabacagaiguema. ³⁵ Nipocasique iroonti inguisasëretiri sërari iriri, onguisasëretiro tsinane oniro, onguisasëretiro tsinane aguiro, ³⁶ inguisasëretiri sërari imatsiguengasonori. ³⁷ Pigóiguë caninataque pinintaigueri piri

aisati piniro, carari caninatasantaque pinintasantina Naro. Queroca pinintasantina Naro, quero naniacaninatimi obiro. Caninataque pinintaiguëri pitomi aisati pisinto, carari caninatasantaque pinintasantina Naro. Queroca pinintasantina Naro, quero naniacaninatimi obiro. ³⁸ Nocogui pingantinaro omagaro ora nongocaquemi irooti cara pingamobiquina. Pinintica piguiatanëna pinguemisantasantina, aro pinatanëro pigorosite, quero picantanonta obiati. Cara inguisatsataiguëmi matsiguenga aroquenta piquemisanquina, queroca popomirintsibentina obiro, quero naniacaninatimi Naro. ³⁹ Aroca pingábintsasantëma obiati yamai, pitsipiriasantanë aiuenta. Carari pinguemisantasantinaca yamai, irooti cara iragamagaiguëmi pomatsiguenga, aiuenta pintiomopëna Jonogaguitequë, pintimasanotapë caninasati. ⁴⁰ Antagaisati ira ágacaninataiguëmine obiro, irágacaninatëna Naro aisati. Ira ágacaninatënane Naro, aisati irágacaninatëri Pabati Ira agáquina. ⁴¹ Cara irogóquimica obiro comantëgotëri Tosorintsi, irágacaninataigabaquemi, aro imëri iriro Tosorintsi aisa ocanta imëmi obironta comantantatsiri. Aroca irágacaninatobëmi caninasati obironta caninari, imëri Tosorintsi aisa ocanta imëmi obiro. ⁴² Aisati cara irogóquimica piquemisanquina, iroro imëgotaguëquimi nija catsingajari, iraniaqueri Tosorintsi imëri aroquenta icábintsabaquemi obiro.

Iro ro oca yogomequeri irogomere Jesus.

11

*Joan igáqueri irogomere iraniaqueri Ira Jesus.
(Ir 7.18-23)*

¹ Aro, cara itsonquero Jesus yogometaiguëri irogomere icarati 12, yogaganaca cara poeboropaguequë. Yogometaguequeri ira timaigatsi cara aisati icomantagueiguëri. ² Aroque yomianquengani Joan cara iromingamentoquë. Yamai cara iquemocoqueri Jesus ora icantagueque, Joan igátaiguëri irogomere:

³ –Pijátasitaiguëri Jesus, posamitaigapëri: “¿Obiroco Agabisaicoontatsiri ira noguiaque, basinico naguiaiguë?”

⁴ Aro yaretaigapari Jesus yosamitaigapëri. Yotabitobëri Jesus:

–Popiganajima, pingomantapëri Joan omagaro oca piniaque aisati ora piquemaque.

⁵ Pingantiri cara inianai comarajatabetachari, yanëitanai carancaratatsi, ibeganaa iribatsasetaga iquëtetanai; iquemaiganaji maguemitari, icaniatanai camabitachari, iquemisantaigabaquero Caninaro Nibarintsi ira coguitiacha, yogabisaicotaigairi Tosorintsi.

⁶ Yoganinasëretaiguëri Tosorintsi iraegui te iritsoenguena, te ingomëtina.

*Jesus inibacananatëgotëri ira Joan.
(Ir 7.24-30; 16.16)*

⁷ Cara ipiganaja irogomere Joan, aique inibatëgotëri Joan Jesus. Yosamitaigabaqueri iraegui botoibiricari;

–Cani piátaiguë cara tera ontimingani, piquemisantaiguëri Joan. ¿Pairo piábiritaguë?

Pigóiguërinta iriro caninari sërari, iquemisan-tasantërinta Tosorintsi. Isintsisëreti. Cagari iriro icantaro choco ora posebati coguentima aikuero yaca aikuero cara. ⁸ ¿Pairo piátasitaiguë? ¿Pinaquerico iquitsagaca caninasati? Teni. Pigóiguë cara ira quitsagatacha iguitsagare caninaro sibitaro itimaigui cara ibangoquë itingomi. ⁹ ¿Pairo piábiritaiguë? ¿Teco pigóiguëri iriro comantanquero Irinibare Tosorintsi? Aisonori ora nangantaiguëmi ibataiguëri basiniegui igomantantatsirite Tosorintsi. ¹⁰ Irirori sanguenatëgotënguicha jirai cara ingantocopëna Naro:

Icanë Tosorintsi: “Notomi, aikueta nagáqueri ira obatacaquemine, ingomantaigapëri imat-siguenga: ‘Aique naro coraque Natingomi. Piganinataigueneri paneingomento’ ”.

¹¹ —Nacantasantaiguëmi ora aisonori, ainta tojaisonorri comantantatsiri, carari noguibatëri Joan, ira baotisantantatsiri. Irironta ogótasantëri Tosorintsi, ibataiguëri basini matsiguenga. Carari antagaisati imaiguëmari Tosorintsi, intingomintasantaiguëmari, irobasantaiguëri ira Joan, irogótasantanëri Tosorintsi. ¹² Jirai icomantagueque Joan; yamai nocomantagueetaiganaquemi Naro. Iroro pigóontaiganacari Tosorintsi. Yamai icogasantaigui tojai matsiguenga cara iragabisaicotajiri Tosorintsi, inganaque iragáantanequë, intingomintaiguëmari. ¹³⁻¹⁴ Jirai antagaisati comantantatsiri iquenguitsatocotaiguëri Quirisito, aisa icanta Moisés icomantëgotëri. Icantaiguë: “Queroquerai ipoqui Quirisito,

irobatacaqueri Erías”. Aique yamai ipoque Joan. Iriro aisati icampari ibega Erías. Pijitaigue cara imoncarapëro Joan Sanguenari. ¹⁵ Aitica piguemita ora piquemanta, pinguemisantiro ora nocomantimi.

Caninasati inibatëgotëri Joan Jesus.

(Ir 7.31-35)

¹⁶ Aisati icantaiguëri matsiguenga Jesus:

–Aisati picantaigari janequipague imaguimpitaigui saatëriquë icanqueri basini: ¹⁷ “Natamporatabeca carari te piguiataiguena; nosoncatabitaca carari teatisati piguiatina; nacántatabitaca nogasëretabeca, carari teatisati piragasëretaugema”. ¹⁸ Pinetse, picogaigabitaca ingantaiguërome pomatsiguenga pairoraca picocaqueri. Pinaigabaqueri Joan itica aisati te iróguima piari, aro picantocotaguetasitaigari: “Oo, inancari Joan camagari, iroso ititaguëca”.

¹⁹ Aro nopaniaca Naro Jonogaguitequë, nomatsiguengatapë; te natitima, aisati nógaro piari. Aro picantocoiguëna: “Tojai yapasanti Iriro, aisati Iriro singuitachari, imatsiguengatacari ira coigotantatsi aguireguita aisati itsibataigari ira cantaguetaigatsi ora te onganinate”. Carari igóque Tosorintsi cara icanque Joan caninasati aisati Naro nacanque caninasati antagaisati ora icocaquena; aisati omagaro quemisantina, irogóguëro caninaro ora icocaquena Pabati.

Iroso oca icantaiguëri Jesus.

Iratsipiriaiguë antagaisati ira tsoenguiri Ira Jesus.

(Ir 10.13-15)

20 Aique icomantëgotaiguëri Jesus ira niaigabitari cara itasonganti carari përosati itsoingaiganaqueri. Icanque:

21 —¡Tojai pitsipiriaiguë obirojegui, Coraseisati! ¡Tojai pitsipiriaiguë obirojegui, Betsairasati! Tojai piniagabitëna cara nitasongagueanti, carari te pingantëmatima yacaqueroca, te pinguemisantina. Carari iraniaquiname cara nitasongagueanti Tirosati aisati Sirósati, inguengasëretaiquemame iriro, irojocaguërome ora icantaguëti te onganinate, inguemisantaiguëname, imasiniatiquerome imanchaqui aisati irisobicaiguëme somamoquë arota ironijaguemari imatsiguenga cara iragasërequima.

22 Aiquenta, cara ingomantëgotaiguëri Tosorintsi, iratsipiriacagaiguëri ira Tirosati aisati ira Sirósati tojointa te inganinataigue. Carari iratsipiriasantagaiguëmi obirojegui Coraseisati aisati Betsairasati aroquenta piniagabitobëna cara nitasonganti, carari te pinguemisantina. 23 Aisati obirojegui Caperinaosati pijitasitaigabitaca pijáiguë Jonogaguëtequë, carari pamatobitaigaca obiati përosatinta pitsoingaiguëna. Iroso pijátaguëque canta osobinta. Iraniaiguërome ira Soromasati omagaro iniaiguëro Caperinaosati, inguengasëretaiquemame iriro, querome itsongaiguirime jirai Tosorintsi, inëme iboeborote irootime yamai.

24 Aiquenta Tosorintsi iratsipiriacagaiguëri ira Soromasati aisati, carari tojai iratsipiriasanotagaiguëmi obirojegui Caperinaosati.

Aroque inibatëri tsoengatsiri Jesus.

“Popocasitina”, icanque Jesus.

(Ir 10.21-22)

²⁵ Aique yamanocoqueri Tosorintsi Jesus, icanqueri:

—Pabati, Obiro caninarisonori. Nacarasi-aquemi Obironta Itingomi antagaisati Jonogaguitesati aisati omagaro quibatsisati. Ainta cantasitacha: “Nigótasanti naro”, carari pimánopitaiguëri ati picanta Obiro aisati ati ongantima pigabisaicotaiguëri. Irianti pigótacagaiguëri ira quemisanquena ira te inguengasitima igótasantëmi iriro.

²⁶ Caninataque piganinataiguëri iriro, picoquenta pigótacagaiguëri.

²⁷ Aroque icanqueri Iriri, aique icantaiguëri imatsiguenga Jesus:

—Ira Pabati ipëna omagaro igótacaquina antagaisati. Paniro igótasanaquina Naronta Itomi; te irogótocotina basini matsiguenga. Teatisati pairi ogótirine Iriro. Paniro nigótiri Naro, Naronta Itomi. Irianti Tosorintsi nigótasantacagaiguëri ira nogometaignë. ²⁸ Cara pitsipiriaiguëca, aisati cara omomirintsitomoquimi pairoraca, popocasitina Naro, pingomantinaro antagaisati. Aro nangantaneintëgotaiguëmi, nomagoriasëretagaiguëmi arota quero opomirintsitomotaguimi aisati.

²⁹ Pinguemisantina Naro, pingoguiro ora nogomeantane, aro tojai nangábintsaiguëmi nantsibatëmi tenta nanguengasantima Naati. Nanintasantëmintä, nomagoriasëretagaiguëmi. Aroca pinguemisanquina aro tojai nangan-taneintëgotaiguëmi, nomitocoquemi pabequero pairoraca. ³⁰ Quero nimeratimi quero

nobomirintsitimi, quero natsipiriacaguimi
iroonti nomitocotopiantaiguëmi.

12

Yogometocoquero sábaro Jesus.

(Mr 2.23-28; Ir 6.1-5)

¹ Aro basiniquë sábaro iáiguë Jesus aisati irogomerejegui cara panguirintsisiquë. Itasegaiguë irogomere, yágaiguëro oguitsoterei tirigo yapaiguëro oguitso. ² Cara iniaigapëri bariseo, icantaigapëri Ira Jesus:

—Pinetseri pogomere. Yamai sábaro iroonti cataguiteri comagoriantague, teni ongomeite yamai irobiguitantimaro.

³ Yotabitobëri Jesus;

—¿Teco pinibatapinintiro Sanguenari ora comantëgotaguëri David aisati ira itsibata cara jirai págaiguëri itasegane? ⁴ Aro icanaque ibangoquë Tosorintsi, icampëri saseriroti: “Nitasegaiguëni”. Aiti pan ora yobetsiquineri Tosorintsi aique poguëngani catingasatiquë Iriro. Te iranintacagaiguëri irapero matsiguengapague; irianti saseriroti paiguëro. Carari icábintsaigabaqueri saseriroti, ipaigabaqueri. Aro yapaigapë David aisati ira itsibata. Yamai te pingante: “Te onganinate irape David”, aro ¿Pairo picantobique yamai: “Te onganinate irape icaegui”? ⁵ Aisati isanguenaque Moisés:

Quero pitarobacaati sábaroquë.

Pigóiguë antagaisati sábaroquë iátopianti saseriroti cara ibangoquë Tosorintsi intapinintaiguë, carari te pinguisëgotimari iriro. Piniacaninataiguëri.

⁶ Nacantaiguëmi cara ainta yaca Ira obaquero ibango Tosorintsi. ⁷ Teco pigóiguero oca Sangue-narica jirai:

Icanque Tosorintsi: “Te nongogue póguinari po-bira, pitaguinari; iroonti nocogasanti pin-gantaneintëgotanëri pomatsiguenga”.

—Pinguemisanquerome oca icanque Tosorintsi, querome picantocotirime icantaguëti te ongan-inate icaegui nogomere obiguitëro tirigoguitso. ⁸ Nopaniaca Naro Jonogaguëtequë, nomatsiguen-gatapë cara niboguë yaca quibatsica. Iroro no-comantëgotaguëquero sábaro pairoraca anganque sábaroquë.

Cara sábaroquë yogaguibegajiri ira camabocori Jesus.

(Mr 3.1-6; Ir 6.6-11)

⁹ Aro yogaganaca, icaigapëro pongotsi cara ya-patotaiga jorío. ¹⁰ Ainta sërari camabocori. Ain-tasati bariseo yosamitobëri Ira Jesus:

—¿Caninataqueco piguibegajiri ica camabocorica sábaroquë?

Icogaiguë bariseo cara iragaguibegajiri arota ingantocotasiqumari Jesus: “Itarobacaati Jesus sábaroquë, te inganinate tenta inguemisantiro isanguenare Moisés”. ¹¹ Aro yotabitaiguëri Jesus:

—Pinetse, aroca sábaroquë imariaque omoroquë poishate, ¿Queroco págairi, pomisotocajiri? Caninataque pingábintsairi. ¹² Aroca pingábintsairi oisha sábaroquë, ocaninatasanti angábintsairi mat-siguenga sábaroquë.

¹³ Aique icanqueri ira camabocori:

—Pintimagonaguitima pobaco.

Aro itimagonaguitanaca, ocaninatanai ibaco pibega basini. ¹⁴ Iniaqueri bariseo, iguisaneintaiganaqueri. Iátagueque yosamitobagaigaca:

—¿Ati anganqueri Jesus, agamaguëri?

*Jirai ora Sanguenari ocomantëgotëri Jesus.
(Mr 3.7-12; Ir 6.17-19)*

¹⁵ Cara igóque Jesus cara icogaiguë iróguiri, yogaganaa yoguiataiganaqueri tojai matsiguenga. Aintasati tojai janaitaguetatsiri ira yogaguibiguetaji Jesus antagaisati. ¹⁶ Aro icantaiguëri:

—Quero picomanti: “Yogaguibegajina Jesus”.

¹⁷ Cara icanque negaca, imoncaraquero ora icomantëgotëri jirai comantantatsiri jitacha Isaías. Isanguenaquineri Irinibare Tosorintsi cara icanque Iriro:

¹⁸ Pinetseri Quirisito Ira nogoigane inganque antagaisati nococaqueri. Tojai nanintasantiri, tojai naniacaninatëri. Nagáquineri Nasëre coshoni oguëri, omitocoqueri. Ingomantaiguëri basiniati matsiguenga, cagari jorío, ora caninaro aisati ati ongantima ora naganinatantimari omagaro. ¹⁹ Quero ipëgatsataro pairoraca; quero icaimasita; quero iquemacagari matsiguenga. ²⁰ Quero itsipiriacaguiri agasëretachari ingantaneintëgotëri. Querootisati yamatobitiri ira cogatsi irogótina. Përosati ingábintsantë, irooti cara intingomibintaiguëri antagaisati matsiguenga caninasati. ²¹ Irogótocoqueri basiniati matsiguenga cara iragabisaicontë

Iriro. Aisati intingomintaigabaquimari
Iriro.
Iroro oca icantocoqueri Tosorintsi jirai.

*Ira bariseo icantocotaguetasitaigari Ira Jesus.
(Mr 3.20-27; Ir 11.14-23; 12.10)*

²² Aique yamaigapëri Jesus poro sërari inancari camagari; te iranee, teatisati irinibate. Yogaguibegajiri; iniacagajiri aisati inibatagairi.

²³ Iquenganeintasantaigacari antagaisati ira niaiguëri. Yosamitobagaigaca:

—¿Iriroco Quirisito, imatsiguenga David, Ira ogu-iaiguë?

²⁴ Carari yotabitaiganaqueri bariseopague:

—Imitocoqueri Berisebó aisati ijita Satanás, itingomi camagarijegui. Iroro ijogantaguëcari camagari Ica.

²⁵ Aro igóque Jesus ora iquengasëretaigaca, yotabitaiganaqueri:

—Aroca irógobaguimame matsiguenga timaigatsi quibatsiquë, ¿Queroco ipoguriobaga? Aisa icanta iraegui timaigatsi poeboroquë; aroca inguisabacagaiguëma quero përosati itimaigui cara. Aisa icanta matsiguenga pongotsiquë; queroca iquengaiga, querootisati itiomotobaga përosati.

²⁶ Tesonori iromitocotina Satanás. Ipëgatina. Pinetse: arome iromitocoquiname Satanás cara nojoqueri jaanta camagari, ¿Queroco itsongabacaga iriati Satanás? ²⁷ Aisati irirome omitocoquinane cara nojoqueri camagari, ¿Iriatisatico camagari omitocotaiguëri pogomere cara ijoqueri camagari iriro? Iriro ogótacagaiguëmi pogomere cara pamatobita

obiati. ²⁸ Carari Iroonti Isëre Tosorintsi omitocoquina cara nojoqueri camagari, ¿Teco iroro pigóntaiguema ainta yaca Tosorintsi, icogabeta iragáante, icogui pintingomintimarime?

²⁹ Aintaca cogatsi ingositiri sintisiri, ¿Teco iritsita águërine, iraguëshotëqueri? Aique irágopitëri pairorapagueraca queronta ipëgatari casintaro. Querome nagobeiri Satanás, querome nojoquiri camagari. ³⁰ Ira te inguemisantina, iguisaneinquina, irianti iquemisanti Satanás. Aisati ira te iraguiatina, te iromitocotina.

Jesos icomantëgotëri ira cantëgotaguetasitaro Isëre Tosorintsi.

(Mr 3.28-30; Ir 12.10; 6.43-45)

³¹ Aisati icantaiguëri bariseopague Jesus:

—Tosorintsi ingábintsaiguëri antagaisati ira cantaguetiro te onganinate aisati omagaro ira nibataguetasitacha te ongomeite, irojocajineri, quero iguisasëretajiri. Carari quero icábintsiri ira cantëgotaguetasitaro Isëre Tosorintsi.

³² Nocomantaiguëmi cara nopaniaca Jonogaguetequë, nomatsiguengatapë cara niboguë yaca quibatsica, carari ingábintsaiguëri Pabati antagaisati ira nibatocotinane ora te ongomeite. Quero icábintsiri ira cantëgotaguetasitaro Isëre. Quero icábintsiri yamai, querootisati icábintsiri aiquenta. Iroonti iratsipiriacagaiguëri përosati.

³³ Aroca ocaninati anchato, aisati caninaro oguitso; teca onganinate anchato, querootisati ocaninati oguitso. Aroca piniaquero oguitso, ¿Teco pigóte ocaninatica ora anchato? ³⁴ ¡Obirojegui cantaquibi marangue! Te pingomeitaigue; tiguëti ongantima pigóte pinibataigue caninaro

inibatinta matsiguenga ora iquengasëretaca. Te onganinate pinguengasëretaiuguema, iroro te onganinataguëte ora pinibataigui. ³⁵ Ira caninari sërari iquengasëretapinintiro caninaro, iroro icantaguëtiro ora caninaro. Ira te ingomeite iquengasëretapinintiro ora te onganinate; iroro icantaguëtiro ora te onganinate. ³⁶ Aiquenta ingomantëgotaiuguëmi Tosorintsi: inguiancagaiguëmiro antagaisati pinibarepague ora pinibatasitaiga yamai. ³⁷ Ocaninatica ora pinibataigui, aro iraniacaninataiguëmi, carari teca onganinate pinibare, inganquemi: “Aiti pinibataguëti te onganinate, tojai pitsipiriaque”.

Jesos icomantëgotëri tsoengatsiri iraugui cogatsi iraniaiguëro itasorintsite.

(Mr 8.11-12; Ir 11.29-32, 24-26)

³⁸ Aique icantaigabitacari bariseopague aisati irapague ogomeantiro Sanguenari:

—Ogomeantatsiri, nocogaigui nanetsëmi pitasonguinaro pairoraca arota nogótimi Obiroca Quirisito.

³⁹ Yotabitanëri Jesus:

—Te pinganinataigue tojainta pitsoingaiguëri Tosorintsi. Quero nitasongomotaiguimi ora pigóontëname. Aiti ora icanque Jonás: pinguengasëretiro cara yosiguina nibega Naro, aro pinguemisantina. ⁴⁰ Jirai ainta iguibeguinte sima iniguëri ira Jonás omaganiro canianiro. Maba cataguiteri inë isegotoquë aique ijocajiri sotoquë. Aisa nanganquima Naro, nanga-maquenica, natiaquima, maba cataguiteri ninë omoroquë quibatsi, aique nangabiritanaima.

⁴¹ Aiquenta, cara ingomantëgotaiquëmi Tosorintsi, ingabiritaiguëma Nínebesati ingantocotaiguëmi inganque: “Aiti picantagueiguë obirojegui te onganinate. Jirai naquemisantaigabaqueri ira Jonás nopasiniatica nojocaigairo ora te onganinate, nacantaigaa yacaqueroca. Obirojegui, piniagabaqueri Agabisaicoontatsiri, tojai ibaqueri ira Jonás Irironta Atingomi, carari te pinguemisantaigabaqueri. Inguisasantaiguëmi Tosorintsi”. ⁴² Aisati jirai ainta tsinane itingomi omatsiguenga, Sebasati. Cara opaniaca parigoti, oquemocoqueri Saromón cara tojai igóque iriro, aro piátasiqueri jaanta oniopëri oquemisampëri. Yamai aintana Naro obirojeguiquë, nobaqueri Saromón carari te pinguemisantaiguena. Aiquenta, cara Tosorintsi ingomantëgotaiquëri antagaisati matsiguenga, ongabiritanaima ora tsinane Sebasato ongantocotaiguëmi: “Picantasantagueitaiguëro obirojegui te onganinate cara ipocasitaiguëmi Ira Agabisaicoontatsiri, carari te pinguemisantaigabaqueri Iriro. Inguisasantaiguëmi Tosorintsi”. ⁴³ Obirojegui jorío picantaigari ibega sërari inancari camagari quimingari. Ijocajiri camagari sërari, yogabisaicotaja iriati. Iátagueque igamagarite cara piriaguiteroquë quibatsi. Ico Gabeca iromagoriaque, carari tiguëti iromagoriaque. ⁴⁴ Aique iquianca; “Nopiganajima nobangoquë, cara sërariquë cara nopaniaca”. Ira sërari icantaro ibango camagari. Aro ipiganaja iniopëro ositaga otarogaga obetsicaga irisobicomento irisomaminto, antagaisati. ⁴⁵ Aro iátasitaiguëri basini camagari quimingarisonori icarati 7.

Icampëri: “Intsome antime nobangoquë”. Aro yagobiaiguëri icasëretaigapëri sërari. Jirai itsipiriaque sërari arosata; yamai inantasancari camagari. Yogatsitasantaca. Aisa picantaiga obirojegui. Jirai pitsipiriaigabitaca tenta pigóigue. Yamai piniabetobëna carari te pinguemisantina. Iroro pigatsitaguëtaiguëma, pitsipiriasanoiguë.

Jesos imatsiguengataigacari antagaisati quemisantaiguëri.

(Mr 3.31-35; Ir 8.19-21)

⁴⁶ Iroontita iquenguitsati Jesus, icomantaguëtaiguëri ira botoibiritaigapari cara pongotsiquë, aro pipocasiqueri iniro Jesus, aisati ireintiegui. Ainta sotoquë, ocaimagantaigapëri.

⁴⁷ Icomantëqueri Ira Jesus:

—Parepa piniro, aisati pirementijegui. Ainta sotoquë; ocoguini onibatimi.

⁴⁸ Yotabitanëri Jesus:

—¿Pairoroco inato? ¿Pairiroco igueegui?

⁴⁹ Aro ijigotaiguëri irogomere, icanqueri:

—Icaegui nogomere, irianti igueegui, aisati iroontiegui inato. ⁵⁰ Pairiraca cantatsi ora icocaqueri Tosorintsi Ira timatsi Jonogaguitequë, irianti nomatsiguengasonori: najitaiguëri igue, aisati tsio, aisati inato.

13

Icomantëgotëri ira panguitatsiri Jesus.

(Mr 4.1-9; Ir 8.4-8)

¹ Irooti cataguiteri isotocaji Jesus cara pongotsiquë, iáque cara onamijaquë angaare, isobiaque. ² Yoguiataiganaqueri irogomere, aisati yapatoibiritaigapari tojai matsiguenga. Iniaquero Jesus pitotsi otsatocotaga; aro yotetanacaro isobiaque. Iraegui matsiguenga përo cara inaiguë onamijaquë. ³ Aro tojai yosiacagantaguecaro quingabaguirentsipague. Icanque:

—Iáque panguitatsiri imiongaguitaguequero oguitsopague tirigo iritoganequë. ⁴ Opariguitagarantapë arosata oguitso abatsiquë; aique ipogopë tsimiripague, yapapëro oguitso. ⁵ Basini oguitso opariguitagarantapë mopësiquë cara te ine tojai quibatsi aropirigasata arosonorinta mopë osobibatsaquë. Omanaanti piabitanaca; ⁶ cara ijonogatapë paba yogasiguiricapëro tenta ine oparipague; aro ocamaguetanai. ⁷ Aisati basini opariguitapë cara totseisiquë; aro piabitanaca carari pomatobairo totsei, te ine oguitso tirigo. ⁸ Basini opariguitagueque cara caninabatsariquë quibatsi, iroro caninatënguitsi. Pianë piquibianë caninasati pinanë oguitsopague. Aiti panguirintsi oguitsotanë ocarati 100, aisati basini ocarati 60, aisati basini ocarati 30 oguitso. ⁹ Aitica piguemita ora piquemanta, pinguemisantiro ora nacantaiguëmira.

Pairo yogomebiriqwe Jesus
qingabaguirentsiquë.

(Mr 4.10-12; Ir 8.9-10)

¹⁰ Aique yosamitaigapëri irogomere:

—¿Pairo pogomebiriantaigari quingabaguientsi ira basinipague? Te inguemaiguemi ora picantaiguëri.

¹¹ Yotabitanëri Jesus:

—Nocogui pigóigue ati icanta Tosorintsi cara igáanti, carari ira matsiguengapague te nongogue irogóigue irirojegui. ¹² Aintaca igótabeca, aro nogótacagasantëri. Carari basinipague, te ingogue inguemisantina, quero iquemaiguina. Quero nogometiri iriro catingasati. Aisati nágabitsaqueri nobegopitëri ora igótabeca. ¹³ Iroro nogomeantaguëcari quingabaguientsi nosiacagantineri tenta iraninte irogóigue. Inetsabetaiga carari te iranee, iquemaigabitaca carari te ingueme, te irogótaigabaquero ora nacantaigabitacari. ¹⁴ Jirai isanguenaque Isaías comantantatsiri, isanguenatocotaiguëri icaegui matsiguengaca:

Icanque Tosorintsi: “Pinguemaigabitëmaro Nanibare, carari quero pigótobëro; pinetsabequima ora noniaguëmira carari quero piniasantaiguiro. ¹⁵ Te pinintaigue pigóigue aisatime pinganquima te ine pisëre; iroro quero piquengasëretaguëta. Tenta pinintaigue pinguemiro, iroro oshabitaiguëpëmi piguemita, quero pigóigui. Querootisati piniasanti tenta pinintiro. Queronta pipocasitina, quero nogabisaicotajimi”.

—Ocari oca icomantëgotaiguëri jorío jirai. ¹⁶ Carari obiro nogomere piniasantaiguiro ora noniagaiguëmira, piquemisantaiguina,

iroro yoganinasëretaguëtaiguëmi Tosorintsi.
¹⁷ Nangantaiguëmiro ora aisonori: icogaigabitaca
 jirai comantantatsirijegui aisati caninatatsiri
 iraniaiguërome oca piniaqueca obiro.
 Icogaigabitaca inguemiro oca piquemaiguëca
 yamai, carari te iraneina teatisati inguemaiguena.

*Jesos yoniagaiguëri ora ocanti
 quingabaguirentsi.*

(Mr 4.13-20; Ir 8.11-15)

¹⁸ Aisati icantaiguëri Jesus:

—Yamai noniagaiguëmiro quingabaguirentsi
 irasi panguitatsiri. ¹⁹ Nocomantëgotëro
 iragáantane Tosorintsi. Ainta quemaigabitacaró,
 carari te inguemobëro. Aro ipoque camagari
 yágabitsaqueri nanibare ora iquengaigabitaca.
 Iriro aisati icantaro pibega oguitso pariaque-
 nguitsi abatsiquë. ²⁰⁻²¹ Ainta basini tojai
 iquemabetobacaró ora nogometiri, icanin-
 abentabecaró, carari cara inguisaneintocoqueri
 imatsiguenga, te përo cara inguemisantiro
 nanibare, opomirintsitomotanacari, ijocajiro
 yomaguisantajiro ora iquemisantabeca
 tenta irogóasantiro. Aisati icantaro oguitso
 pariaquenguitsi mopësiquë. ²² Ainta basini
 tojai iquematsatabecaró nogomeantane,
 carari iquengasantiro pairoraca inaguetatsi
 yaca quibatsica, aisati inintasantiro ora
 yasinta. Iroro te inguemisantaguëtina. Iriro
 cantaca oguitso pariaquenguitsi totseisiquë
 ora te onintacaguiro ontojaigue, te ine
 oguitso. ²³ Aintasati basini matsiguenga
 arosatapague iquemisantasantobëro ora

nogometiri. Përosati iquemisanquina, icanque antagaisati nococaqueri. Icantaro pibega oguitso pariaquenguitsi caninabatsaroquë quibatsi, ora tojaiganaquenguitsi. Aiti openguiterei ora inënguitsi oguitso 100, aiti basini cara pinë 60, aisati basini cara ocarati 30 oguitso.

Ocari oca yoniagantaro Jesus quingabaguientsi irasi panguitatsiri.

Jesos icomantëgotëro tobari te ongomeite.

(Mt 13.36-43)

²⁴ Aisati yogomeanti Jesus basiniquë quingabaguientsi. Icanque:

—Nosiacagantaiguëmiro basini. Cara igáanti Tosorintsi ocantari ibega sërari panguitiro caninaro tirigoguitso. ²⁵ Aro tsitiniriquë isamë iriro aisati iratirite. Cara isamaiguë, ipocasiqueri basini quisaneintirira ira panguitatsiri, ipanguitaguequineri irootiquë iritogane oguitso tirigoniro ora cantabitaro tirigo. Aique iátaji. ²⁶ Aiquenta, cara oquibianë tirigo, onguitsotanë, aique ongonijatanë tirigoniro.

²⁷ Aro iniaiguëro iratirite casintaro tirigo, iátasitaiguëri, yosamitëri: “¿Teco caninaquiro tirigoguitso cara pitoganequë? ¿Nega opaniaca ora tirigonirora?” ²⁸ Yotabitaiguëri: “Irianti panguiquinaro ira quisaneintina”. Aique yosamitaiguëri iromeraro: “¿Pairoroco picogui nangantaigue? ¿Caninataqueco nasiajiro?”

²⁹ Icanque: “Quero yamai. Aiquenta. Aroca pisiajiro yamai pisiajatiguiro tirigo aisati.

³⁰ Ineta yamai. Ongantimata. Aiquenta, cara osamabinguique, nagátaiguëmi: ‘Irotsita

picarataguetaje tirigoniro, piguëshotiro páganëro pitaguïro. Aique pobibinguitobëro tirigosonori, poguinaroti cara pongotsiquë' ”.

Iroro yosiacagantaiguineri irogomere Jesus.

Yosiacagantëro Jesus oguitso mositasa.

(Mr 4.30-32; Ir 13.18-19)

³¹ Aiti basini quingabaguirentsi yosiacagantëneri matsiguenga Jesus:

—Aisati cara iragáantanequë Tosorintsi ocantaro pibega oguitso mositasa ora ipanguitë sërari cara togantsiquë. ³² Ora mositasaguitso iroonti quiripiquiseronori, carari oquibianë obaquero basini panguirintsi. Ipocaigapë tsimiripague, yogapëro imagosi otsegopaguequë.

Yosiacagantëro Jesus ora piponganta pan.

(Mr 4.33-34; Ir 13.20-21)

³³ Aisati basini, iquenguitsataiguëri Jesus:

—Cara itingomibintanti Tosorintsi aisati ocantaro ora piponganta pan. Cara obetsiquëro pan tsinane, águëro tojai opane tirigo, oconaguëro arosata piponganta pan. Aique oponganë antagaisati.

³⁴ Yameca Jesus yogomeantaigari quingabaguirentsi ira botoibiritaigapari. Iroonti quingabaguirentsi inibatantari. ³⁵ Imoncaracaro Sanguenari cara isanguenaque comantantatsiri:

Icanque Tosorintsi: “Tojai nosiacagantëneri matsiguengajegui nongomantaiguëri ora te irogóigue jirai cara nobetsiquëro quibatsi jiraisonori, irooti yamaica”.

³⁶ Aique ijocaiganaqueri Jesus ira botoibiritagacari, icanaque pongotsiquè cara yosamitaigapëri irogomere:

—Nocogaiguè pingomantinaro paio ocanti ora tirigoniro ora piquenguitsatomotaiguëna.

³⁷ Yotabitanëri Jesus:

—Nopaniaca Naro cara Jonogaguitequè, nomat-siguengatapë yaca quibatsica. Naro nosiacari ira panguitiro tirigoguitso. ³⁸ Ora togantsi ocancaro quibatsi cara atimaigui eiro. Ora oguitso caninaro ocantaigari ibegaiga ira quemisanqueri Tosorintsi. Ora tirigoniro osigari ira quemisanqueri camagari. ³⁹ Ira quisaneinqueri panguitatsiri, irianti icantari Satanás. Cara yobiguitanti aisati ocantaro cara otsonquema quibatsi cara nopocaje Naro. Iraegui obiguitatsi irianti ironomire Tosorintsi irisaanganetsite. ⁴⁰ Pinguenguema. Yap-atotaiguëro tirigoniro, itagaiguëro. Aisa ocanta nanganque aiquenta cara otsonquimaca quibatsi. ⁴¹ Nagátaiguëri tojai ironomire Tosorintsi, irap-atotaiguëri cara nagáantanequè antagaisati cantaguetatsi ora te onganinate aisati basini ira cantacaqueri quimingari. ⁴² Nojocagantaiguëri cara pamariquè Sharincabeniquè; tojai iratsipirigaiguè canta, tojai iratsitsiaguitetanè. ⁴³ Aique irosangueguitetaiguè antagaisati caninataigatsiri inganquimari ibega paba. Intsibataiguëmari Pabati cara igáanti Jonogaguitequè. Aitica piguemita ora piquemanta, caninataque pinguemisantiro oca nocomantëmica.

Jesus yosiacagantëneri ira quirequi irománaga, aisati imapënequi shaota (ira jitacha périra).

44 Përosati yogomeque Jesus:

—Cara igáanti Tosorintsi aisati ocantari ibega tojai quirequi irománaga quibatsiquè. Iniasipari sërari, aito cara iquiaque imánanontanaari iriro aisati, te ingomantëgotiri. Aro iáque, ipimantaguequero omagaro ora yasinta, yamanantë quibatsi cara inasegui quirequi. Yamai icaninabenqueri tojai quirequi. 45 Aisati iragáantane Tosorintsi ocantari sërari manantiri imapënequi shaota caninarisonori ira jitacha périra. 46 Iniopëri paniro, icaninatasanti ipënatasantaca. Inintasantiri, iroero ipimantaguëquero antagaisati ora yasinta, yamanantëri ira imapënequi shaota.

Yosiacagantëro Jesus siriamentotsi.

47 Aisati yoniagaiguëri matsiguenga Jesus. Icanque:

—Aisati cara itingomibintanti Tosorintsi ocantaro pibega irisiriamiento sërari yágantari sima. Ijocaiguëro angaarequë, inosiquëgotëri yobiriatëgotëri tojai simapague. 48 Iacaro, aro inosiquëgotaiguëri irisiriamientoquë cara onamijaquë, isobicaiguë, yágaguetaiguëri simapague caninari yoguëri cantiriquë. Ira te inganinate ijoguequeri. 49 Aisa ocanta cara otsonquima quibatsi cara nopocaje Naro. Nagáqueri ironomire Tosorintsi irisaanganetsite ingasiriconiatitaiguëri antagaisati matsiguenga caninataguetatsiri. Aique aisati ingasiriconiatiqueri ira te inganinataigue, 50 irojocaiguëri cara Sharincabeniquë cara përosati iratsipiriaiguë aisati iratsitsiaguitetanë. 51 ¿Piquemaiguëro oca nocomantaiguëmica?

Yotabitaiguëri irogomere:

—Jee, naquemaiguëro.

⁵² Aisati icanque Jesus:

—Aroca inguemisanquena ira ogomeantiro Sanguenari, irogótanëro tojai. Igóquero ora isanguenatagueque jirai, aisati inguemisanquenaca, irogóque ora nogomeanti Naro yamai. Irogóque ogomeantatsiri ati ocanta cara igáanti Tosorintsi.

Ipiganaja Jesus cara Nasarequë.

(Mr 6.1-6; Ir 4.16-30)

⁵³ Itsonque Jesus cara yogomeantaro quingabaguirentsi, aique iáiguë Iriro aisati irogomere, ⁵⁴ ipiganaja quibatsiquë cara ipaniaca. Icanaque pongotsiquë cara yapatoitaiga jorío, yogomeantapë. Iquenganeintasantaigabacari ira quemaignabaqueri. Yosaminatobaganaca:

—¿Ati icanta cara yogomeanti? ¿Nega opaniaca ora igóque Iriro? ¿Pairo itasongantagueta?

⁵⁵ ¿Cagarico Ica, itomi José obetsicaguetatsi mesa, sobicomentotsi? ¿Irorori iniro María? Aisati igóiguëri eiro ireintiegui: Santiago, aisati José, aisati Simón, aisati Joras. ⁵⁶ ¿Teco aisati ontime iritsiro eiroeguica? ¿Negaraca opaniaca ora igóque aisati ora icanque?

⁵⁷ Aro iguisaneintaiguëri, itsoingaiguëri. Iroro icantaguëtaiguëri Jesus:

—Ainta quemisantaiguëri quinguitsatiro Irinibare Tosorintsi ira paniacha parigotiquë, carari itsoingaiguëri imatsiguengasonori comantantatsiri.

⁵⁸ Te tojai iritosongaguete Jesus cara Nasarequë. Tojainta itsoingaguëri imatsiguenga.

14

Eroris ijiqueri Jesus irianti Joan.

(Mr 6.14-29; Ir 9.7-9)

¹ Aique iquemocoqueri Jesus Eroris, itingomi Garireasati. ² Icantaiguëri iromerarogui:

—Ira Jesus, iriantijengari Joan baotisantatsiri. Nógagantabitacari, carari najique icabiritaja aisati, iroso itasongantaguëque.

³⁻⁴ Aroqueque Eroris yágabitsaqueri iina ireinti jita-tacha Jeripe; iina ojita Erorías. Icantabecari Joan:

—Te ongomeite págabitsatiri iina pirenti.

Iroso yágagantaguëqueri Joan Eroris yomianqueri yoguëshotiaqueri sogatsaquë coshotsari. ⁵ Ico Gabeca Eroris iróguirime ira Joan, carari itsorogaiguëri matsiguengajegui. Igóiguë matsiguenga cara Joan icomantëgotëri Tosorintsi. Ijique Eroris: “Aroca nógagantëri, inguisëgotaiguëmari matsiguengajegui”.

⁶ Aique pareca cataguiteri isantone Eroris. Icaimaguetaiguëri tojai imatsiguenga, yoganinasëretaigapëri. Aro omaninquebintëri osinto Erorías. ⁷ Iniacaninatobëronta ora tsinane ira Eroris, aro icanquero negaca:

—Pairoraca pomanaguina, aro nomëmiro. Igóque Tosorintsi cara quero namatobitimi.

⁸ Aro ocomantatsaquero oniro, ocantacaquero negaca:

—Nocoguini pógagantiri ira Joan baotisantatsiri, aique pomapënarora iguito cara tsibetaquë

aique nomëro inato cara ogóque aisonorica icamaque.

⁹Yogasëreca itingomi cara icantasanotëro, aisati cara iquemaiguëri antagaisati igaimane ora icantasanotëro irisintotsari. ¹⁰Aro igáqueri soraro irobatëaquintiri Joan cara iromingamentoquë. ¹¹Aique yamapënero tsibetaquë iguito Joan, ipëro irisintotsari. Iroroque përo oniro. ¹²Ira irogomere Joan ipocaiguë, yágaiganaqueri cara iritijaigairi. Aique iáiguë, icomantaigapëri Ira Jesus:

—Yogamaguëri Joan Eroris.

Yoguibatëro Jesus itasonguëro pan, yomitojaiganaquero.

(Mr 6.30-44; Ir 9.10-17; Jn 6.1-15)

¹³Cara iquemaque Jesus aroque icamaque Joan, iátacagaiguëri irogomerejegui canta tenta ontimingani. Yotetanaca pitotsi. Aisati cara iquemocotaigabaqueri matsiguengajegui ijocaiganaquero ibeborotepague yoguiataiganaqueri cara onamijaquë. ¹⁴Cara yagatocotaigapë Jesus, iniaigapëri tojai matsiguenga ira aguaigaseguiri. Tojai icantaneintëgotaigapëri yoguibegaigairi janaitaguetatsiri. ¹⁵Aro ochapinitanë cara ipocasitaigapëri irogomere, icantabetaigaari:

—Yaca teca ontimingani, aisati aroque ochapinitanë. Yamai pigátaigueri icaegui matsiguengaca iriáiganaque poeboropaguequë iromananteta iraperi.

¹⁶Icantaiguëri irogomere Jesus:

—¿Pairo iratsipiriobitaiguë iriáigae? Pomaigueri obirojegui ora irapaiguë.

¹⁷ Yotabitanëri:

—Teri ine yaca ora nomaiguëri. Yaca aiti oca pan ocarati pabocorooti aisati pitenianti sima. Quero cotonguïboro.

¹⁸ Icanque Jesus:

—Pomenaro yaca.

¹⁹ Aique yogasobicaiguëri iraugui matsiguenga cara tobarisiquë. Aique yáguëro Jesus ora pan aisati sima. Inetsanaque jonoquë, icanqueri Iriri:

—Pabati, nacarasiatocoquemiro oca noperijeguica popaiguënaca.

Aro itibatsaaguequero pan Jesus, yot-satengaiguëri irogomere cara imauguëri matsiguengajegui ira aguiataiguëri. Aisati yotsatengaigacari sima. ²⁰ Yapaiguë antagaisati, iquemaigaca. Aique yobiitaguetajiro irogomere ora irangarataneegui, iagajiro 12 cantiri. ²¹ Tojai yapaiguë sërari icarati 5,000, aisati tsinanejegui, aisati ojaniquitejegui.

Yanëiatanë Jesus jonoicaa nija.

(Mr 6.45-52; Jn 6.16-21)

²² Aique icantaiguëri Jesus:

—Nogomere, potetaiguema pitotsiquë, pobataigue antatinta.

Aique igátaiguëri ira botoibiritaigari:

—Yamai pijáigue pobangojeguiquë.

²³ Aro itonganaque Jesus oguitojaquë cara yama-
naque, inibatëri Iriri. Ainta Jesus paniro inë cara otsitinitanë. ²⁴ Ora pitotsi aroqueque

pinë aganguijaquë, icomatabitacaro irogomere-jegui. Te iraretima iroontita omotoncaatan-tapa nija aisati poguipigapigatocoqueri coguentima. ²⁵ Cara igogaraaque iáque Jesus aiquero pitotsiquë, yanëiaapë jonoicaa angaare, te iritsitigüe. ²⁶ Iniaigabaqueri irogomere, te irogóigueri, itsorogasantaganaque, icaibaitanë icantobaca:

—¡Eeee! ¡Coraque camagari cara iráganacái!

²⁷ Carari yotabitaigapëri Jesus:

—Quero pitsorogaigui. Naanti bocapaatsi, pinganinasëretëgotina.

²⁸ Aro icabëri Peroro:

—Obiroca Natingomi, pingaimina najáque nanëiatanë jonoicaa nija irooti cara pinasegui Obiro.

²⁹ Yotabitanëri Jesus:

—Omana popogopë.

Aro yaguëtanë Peroro, yanëiatanë jonoicaati nija iáque aique cara inasequi Jesus. ³⁰ Pënibaque irarequimari cara iniaquero nija omotoncaatapa itsoroganë, iparintanaca itsitiganë. Icaibatanëri:

—¡Natingomi, págobaina!

³¹ Aito cara yacotasitobairi Jesus, yágobagotobairi ira Peroro, icanqueri:

—Arosata piquemisanquina, ¿Pairo pitsoingobiquina?

³² Aro yotetaigaaro pitotsi Jesus aisati Peroro. Aro osantocotanai coguentima. ³³ Aito cara iraegui inasegatsi pitotsiquë yobaticagueritotaisitaiganacari icantaigabaqueri:

—Aisonori, Obiro Itomi Tosorintsi.

Jesos yogaguibegajiri ira janaitaguetatsiri cara Jenesarequë.

(Mr 6.53-56)

³⁴ Aro imontiaiganaja, yaretaigapaa Jenesarequë. ³⁵ Ainta timaigatsi cara, igótobëri Ira Jesos, icomantëgotaguëri, yotsatengaiguëri imatsiguen-gajegui. Aro yamapëneri tojai janaitaguetatsiri. ³⁶ Yamanocopëri cara iranintacaqueri irot-sagataigapëri ogarasiquë iguitsagare. Aro yogaguibegaigairi omagaro ira otsagaqueri.

15

Ora yametaiga joríojegui.

(Mr 7.1-13)

¹ Aique iátasitaiguëri Ira Jesos bariseopague aisati ira ogomeantiro isanguenare Moisés. Ipaniaigaca Jerosarénquë. Yosamitaigapëri:

² —Eiroegui jorío. Ametaiga queroquerai api, anguibocoquima. Iro-ro yogometaigái omatsiguenga jirai. ¿Pairo te ingantobitaigue negaca pogomerejegui? Yapasitaiga te inguibocotima. Yoguimingataca iriati.

³ Yotabitaiguëri Jesos:

—Tojai pomoncaratasitaigaro ora ican-tasitagueta omatsiguenga jirai, iro-ro te pinguemisantaguëtiro ora yogometaiguëmi Tosorintsi. ¿Pairo picantobitaiga obirojegui negaca? ⁴ Icanque Tosorintsi:

Pinguemisantiri piri aisati piniro.

Aisati icanque:

Ingameta ira cantëgotaguetasitari iriri aisati iniro.

⁵ Carari obirojegui, pogometaiguëri pomatsiguenga: “Pingantiri ira casintimi:

‘Quero nomitocotimi. Nomëmime quirequi, nangantaneintëgotëmime carari aroque nacanqueri Tosorintsi nomëri Iriro naguireguite’ ”. ⁶ Pogometaguë quero picábintsairi piri. Cara picanque negaca, te pogometiri Irinibare Tosorintsi, teatisati pinguemisantiro. ⁷ Picantasitaigabita piquemisantasitabeta. Aisonori icomantëgotaiguëmi ira comantantatsiri Isaías cara isanguenaque jirai: ⁸ Icanque Tosorintsi: “Ica matsiguengaca inibat- asitëgotina ora caninaro, carari te inguen- ganeintina. ⁹ Yamanocotasitina cara yapa- totasitaiga; iroonti yogometa irinibare mat- siguenga”.

Ora aguimingasëretiri matsiguenga.

(Mr 7.14-23)

¹⁰ Aique Jesus icaimaiguëri ira botoibiritaigari, icantaiguëri:

—“Pinguemina, pigóiguero oca nocoman- taiguëmica: ¹¹ ora apaiguë, te oguimingatiro asere. Iroonti ora inibatasitagueta iroro aguimingasëretacái cara aquianquero quimingaro.

¹² Aique iátasiqueri Jesus irogomere, icoman- taigapëri:

—¿Teco pigóte iguisaneintobitaiguëmiro bariseoegui ora picanqueri?

¹³ Yotabitaiganaqueri Jesus:

—Iriro icantaigaro pibega panguirintsi. Aiquenta irisiabonguitiquëro Pabati jono- quënintaberi antagaisati ora te imanguitiro Iriro.

¹⁴ Aro irinaigueta bariseoegui, te irogóigue; aisati

icancari sërari comarajari ingatsatobaganëmaca ira basini comarajari. Pitirooti imarigaiganaque omoroquë.

¹⁵ Icanqueri Jesos Peroro:

—Teni nanguemimi; pingomantina ora ocanti oca picanquinaca.

¹⁶ Icanqueri Jesos:

—¿Teraiquerai pigóte? ¹⁷ ¿Teco pigóte pairoraca opë ojáque asegotoquë aique agabisairo? Te ongantiro pairoraca asërequë. ¹⁸ Cara pinibati pairoraca piquengasëreti; queroca piquenga caninasati, quero picaninasëreti, pinibati ora te onganinate. ¹⁹ Ora piquenga opaniaca paneingomentoquë: cara piquenganeintaguetiro te ongomeite, cara póganti, cara pintaguetiro tsinane cagaro pijina, aisa cara tsinane ontaguetiri sërari cagari ojime, cara picositanti, cara pitsoiguëgotantagueta, cara picantocotaguetasitari pomatsiguenga, omagaro oca paniacha paneingomentoquë. ²⁰ Omagaro oca aguimingasëretimi. Iroero te pinganinataguëtaigue, carari aroca popë queroquerai piquibocota querootisati poguimingasëretimi.

Oquemisanqueri Jesos tsinane Cananasato cagaro jorío.

(Mr 7.24-30)

²¹ Aique iáiguë Jesos aisati irogomerejegui cara Tiroquë aisati Sirónquë. ²² Piátasiqueri Cananasato, cagaro jorío. Ocampëri:

—Natingomi, Obiro imatsiguenga David itin-gomi jorío jirai. Nocoguini pingábintsena naro

aisati nasinto. Inancaro camagari, yogatsitas-antëro.

²³ Carari te irotopitiro, imairetanë. Aro ican-taiguëri irogomere:

—Pingantiro ojátaje, tojainta poguiatacái paseri-gacái.

²⁴ Icanquero tsinane Jesus:

—Igáquina Pabati nangábintsaiguëri joríojegui. Icantagari ibega oisha ibiaga.

²⁵ Aro pobaticagueritobiripari, ocanquero:

—¡Natingomi, pomitocotina!

²⁶ Yotabitobëro Jesus:

—Te onganinate irágopitiri janequi iraperi imaiguëri otsiti. Cagarimi obiro jorío. ¿Pairo nomitocobiriqumi?

²⁷ Potabitanëri:

—Aisonori, Natingomi, ora picanque, carari yapiro otsiti opetoqui ora pariaguetatsi imesanequë casintari.

²⁸ Aique icanquero:

—Tsinane, caninataque piquemisanquina. Yamai aroque nopabaquemiro ora pamanocoquina. Irooti pabisaicoontanaa osinto.

Jesos yogaguibegajiri tojai janaitaguetatsiri aronisati angaarequë.

²⁹ Aro yogagaiganaca Jesus aisati irogomere-jegui irooti onamijaquë angaare jitacha Garirea. Aique itongaiganaque, isobicaigapë.

³⁰ Ipocasitaigapëri tojai matsiguenga, yágaiganaquineri tojai janaitaguetatsiri: ainta carancaratsi, ainta comarajari, ainta ira patebocotatsi, ainta ira te irinibate, aisati

tojai basini. Yobaticagueritotaguëpari. Aro
 Jesus yogaguibegajiri omagaro. ³¹ Aro
 iquenganeintasantaigacari matsiguengajegui
 ira niaiguëri Ira Jesus cara inibatagajiri ira te
 irinibate, yosebatagaari ira emëngari, yanëitagairi
 carancaratatsiri, iniacagajiri comarajari.
 Icantaguë matsiguenga:

—Caninari Tosorintsi, Ira iquemisantaiguë
 joríojegui.

*Yogatsitairo Jesus itasonguëro pan,
 yomitojaiganaquero.*

(Mr 8.1-9)

³² Aique icaimaiguëri irogomere Jesus, ican-
 taiguëri:

—Tojai nacantaneintëgotaiguëri antagaisati ira
 botoibiritaiguëna. Ocarati maba cataguiteri itsi-
 bataiguëna, yamai te inae iraperi. Itasegasan-
 taiguë. Yamai aroca nagátaigairi iriáigae, iromago-
 tasantanë queronta yapi, quero yaretaiga iban-
 gopaguequë.

³³ Yotabitaiganaqueri irogomere:

—Pinetse, yaca teca ontimingani. ¿Nega
 nágaiguëneri pan ora irapaiguë? Tojaisonorinta
 matsiguenga.

³⁴ Yosamitëri Jesus:

—¿Ati ocarati pan inatsi?

Yotabitanëri irogomere:

—Ocarati 7, aisati ainta arosataanti sibai.

³⁵ Aro icantaiguëri matsiguenga Jesus:

—Pisobicaigue quibatsiquë.

³⁶ Aro yáguëro pan aisati sibai, icanqueri Iriri:

—Aro nega, Pabati, nacarasiaquemi popabaquinaro oca perintsica.

Aique itibatsaaguequero, yotsatengaiguëri irogomerejegui arota cara irotsatianquimaro ira botoitaigacha. ³⁷ Yapaiguë antagaisati, iquemaigaca. Aique yobiitaguetajiro ongarataga, iagajiro cantiri oquibe ocarati 7. ³⁸ Yapaiguë tojai sërari icarati 4,000. Aisati papaiguë tojai tsinane aisati janequi. ³⁹ Aique igátaiganaqueri Jesus, icanqueri:

—Yamai pijáigae pobangopaguequë.

Aique yotetaiganaja Jesus aisati irogomere pitotsiquë, imontiaiganaca irooti Magararaquë.

16

Icogabeca bariseo iritosongueme Jesus.

(Mr 8.10-13; Ir 12.54-56)

¹ Aique iátasitaiguëri bariseopague aisati saroseopague; icogaigabitapa iraniantimari Jesus irantacaquerime ora te onganinate. Icantabepari:

—Atsi yamai nocogaiguini nanetsemi cara pita-songanti, ora nogóontëmi aroca popaniaca Jonoga-guitequë.

² Yotabitaigabaqueri Jesus:

—Pinetsaigue, aroca ochapinitanë piniaquero onguiraaguitetë, ¿Teco pingantaiguë: “Quero oparigui angani”? ³ Aisati cara onguëtaguetanë, piniaqueroca onguiraaguetaimanë jonoquë, aisati aitica mingori tsitaro, pingantaiguë: “Yamai omariaque angani”. Pigóiguë ati ocanta jonoquë, omariaqueca angani, carari te pigóigue omoncaraca tojai Sanguenari

ora ocanti iribocapë Agabisaicoontatsiri.
 4 Te pinganinataigue tojainta pitsoingauguëri
 Tosorintsi. Picogabeca pineina cara
 natasonganque, carari quero noniaguimiro.
 Patiro piniaquero aiquenta nanganquimari ibega
 Jonás.

Aique iáque, ijocaiganaqueri ira bariseo aisati
 saroseo.

*Ora piponganta pan irasi bariseo aisati saroseo,
 iroonti irogomeantane.*

(Mr 8.14-21)

5 Aro yaretocotaigaa antatinta Jesus aisati
 irogomere. Aique irogomere iquengaiguëro
 pan; yomaguisanquero te iromapëro. 6 Aro
 icantaiguëri Jesus:

—Pigamaiguemaro ora piponganta pan irasi
 bariseoegui aisati irasi saroseoegui.

7 Aique yosamitobagaigaca irogomere:

—¿Pairo icantobicái: “Pigamema ora piponganta
 pan irasi bariseo”? Tentajengari nomapëro pan.

8 Igóque Jesus ora iquengaigaca, icantaiguëri:

—¿Pairo pijibiritaguë nacantocoquemiro pan?
 Patiro arosataanti piquemisantaiguëna. 9 ¿Terai
 pigóigue? Cani ocarati pabocorooti pan, carari
 napaagaiguëri 5,000 sërari. Págaigairo pobiitague-
 taji ro ora ongarataga. ¿Ati ocarati cantiri pinë?

Yotabitanëri:

—Ocarati 12.

10 —Aisati ocarati 7 pan, aisati nopaguetaiguëri
 pan sërari icarati 4,000. ¿Ati ocarati pobiitague-
 taji cantiriquë oquibe?

—Ocarati 7.

11 Icanque Jesus:

—¿Pairo te pigóigue? Te nanguincotiro pan ora peguënguichane cara nacanquemi: “Pigamema ora piponganta pan irasi bariseo aisati saroseo”.

¹² Aique igóiguë irogomere te ingantocotiro aisonori ora piponganta pan, iroonti ocantaro pibega irogomeantane bariseoegui aisati irasi saroseoegui.

Icanqueri Jesus Peroro: “Obiro Quirisito”.

(Mr 8.27-30; Ir 9.18-21; Mt 18.18)

¹³ Aique iáiganaque Jesus aisati irogomere cara poeboroquë jitacha Sesárea, ora yobetsiquë Jeripo. Aro yosamitaiguëri irogomere Jesus:

—Nopaniaca Naro Jonogaguitequë, nomatsiguengatapë, carari, ¿Pairiraca ijitaiguëna matsiguenga?

¹⁴ Yotabitaiguëri:

—Aintapague ijitaiguë Obiro Joan baotisanatsiri. Ainta basini ijitaiguëmi: “Ira Jesus Irianti Erías, ipocaji”. Ainta basini ijiquemi Obiro Jeremías. Aintasati icanque Obiro comantantsiri.

¹⁵ Aro yosamitaiguëri:

—¿Pairo pijitaiguëna obirojegui?

¹⁶ Yotabitanëri Simón aisati ijita Peroro:

—Obiro Quirisito Agabisaicoontatsiri ira noguiaiguë. Aisati Obiro Itomi Tosorintsi caniatagantatsiri.

¹⁷ Icanqueri Jesus:

—Aisonori picanti, Simón itomi Jonás. Te irogometimiro matsiguenga; Irianti oniaguëmiro Pabati cara Jonogaguitequë.

¹⁸ Najitimi Peroro ora popairo ocanti mopë.

Nococaquemi pinguemisantacagaiguëri basini matsiguenga tojai cara Naro Itomi Tosorintsi. Irapatoibiritaiguëna. Nangábintsaiguëri querota yagobeiri camagari, querootisati yobiacaguiri cara iquemisanquina. ¹⁹ Nomëmiro pinguemisantacaguiri matsiguenga aisa ocanta pisirecoquineri sitëcori arota ingasitapëri Tosorintsi cara igáanti. Queroca iquemisantimi matsiguenga yaca quibatsica, pingantiri cara quero iáti Jonogaguitequë. Aisati inganque Tosorintsi: “Aisonori picanqueri. Tenta inguemisantina, quero nomaguisantineri ora icantagueti te onganinate”. Carari antagaisati ira quemisanquero Irinibare Tosorintsi yaca quibatsica, pingantiri cara iriátë jonoquë cara përosati intiomoqueri Tosorintsi. Aro përosati inguenguemi Tosorintsi, inganque: “Aisonori. Nojocajineri ira quemisanquina ora icantagueti te onganinate, nomaguisantajineri”.

²⁰ Aique Jesus icantaiguëri irogomere:

—Quero picomantiri matsiguenga: “Iriro Jesus Irianti Quirisito”.

Jesus icomantaiguëri irogomere cara ingamaque.

(Mr 8.31-33; Ir 9.22)

²¹ Aique icomantaiguëri irogomere Jesus:

—Coraque cataguiteri cara najáque Jerosarénquë. Canta, tojai iratsipiriacagaiguëna ira antiasipari aisati itingomiegui saseriroti aisati ira ogomeantiro isanguenare Moisés. Aisati irógaiguëna, carari ongaraque maba cataguiteri, aro nanganiatanae aisati.

²² Aro yáganëri Peroro casiriconiati, ipëgatsacari:
 –Natingomi, te onganinate oca picanqueca. Nocoguini quero itsipiriacaguimi, querota picami.

²³ Aro yapisitasitanacari Peroro Jesus, icantasanotëri:

–Pijáte, picanquina aisati picantari ibega Satanás. Quero pintaguinaro ora te onganinate. Te pigóte ora icocaquina Tosorintsi, iroonti pigóque ora icogui matsiguenga.

Ora inganque ira quemisasantiriri Jesus.

(Mt 10.38-39; Mr 8.34-38; Ir 9.23-27; 14.27)

²⁴ Aique Jesus icantaiguëri irogomere:

–Iranintasantëca pairiraca aguiatanëna inguemisasantina, iranatanëro igorosite, quero icantanonta iriati, iroonti imomirintsibenquinaro pairoraca nongocaqueri Naro. Aroca iratsipiriacaqueri basini, përosati inguemisantanëna Naro. ²⁵ Ira cogabitacha ingábintsëma yaca quibatsica, tenta iraninte iratsipiriero, aiquenta iratsipiriasantë.

Irari quemisasantänane yaca quibatsica, irooti cara ingamobiquina Naro, aiquenta intiomoquina Jonogaguitequë, intimasantanë caninasati.

²⁶ Aintaca sërari irasintaguetimaro antagaisati ora inatsi yaca quibatsica, cara ingamaque iriátë Sharincabeniquë, ¿Pairo iráque? ¿Teco iratsipiriasiquimaro omagaro? Aroca iriátë Sharincabeniquë, tiguëtisonori ingantima iriátë Jonogaguitequë, inganiantanae. ²⁷ Nopaniaca cara Jonogaguitequë, nomatsiguengatapë cara niboguë yaca quibatsica.

Aiquenta nopigaima aisati yaca quibatsica, nongobeingatasantapë

aisati icanta Pabati icobeingatasanti;
 intsibataigapëna ironomirepague Pabati
 irisaanganetsite, aro nongomantëgotuiguëri
 antagaisati matsiguenga. Nomaiguëri omagaro
 icanquero ora nococagaiguëri; irianti ira quero
 iquemisantaiguina, natsipiriacaqueri. ²⁸ Aisonori
 nacantasantaiguëmi, nogomerejegui, aintapague
 obiroquë ira queroquerai icami iraniaigabajina
 cara nopocaje Naronta Itingomisonori;
 noniagaiguëmiro nosanguëguitere.

17

Ipasiniatitanë Jesus.

(Mr 9.1-13; Ir 9.28-36)

¹ Aro pabisanaque 6 cataguiteri cara Jesus
 itonganaque oquibequë oguitoja. Yágaiganaqueri
 casiriconiati ira Peroro aisati Santiago aisati Joan
 ireinti Santiago. ² Aro ipasiniatitomopëri Jesus.
 Yosanguëborotapë aisati icampari ibega paba.
 Aisati oquëtatasanotanë iguitsagare. ³ Aisati iconi-
 jatomopëri Moisés aisati Erías, inibatobagobaca
 Jesus. ⁴ Aro icanqueri Jesus Peroro:

—¡Natingomi, caninataque ninaigue yaca!
 Pinintiroca, nobetsiquëmiro yaca maba pongotsi
 otiomijani, patiro pasi, aisati basini irasi Moisés,
 aisati irasi Erías.

⁵ Iroontita inibatasegui Peroro, paguëtaguëpëri
 mingori poganguibotaigapëri posanguëgui-
 tetocopëri. Aro iquemaigabaquero Irinibare
 Tosorintsi cara mingoriquë, icanque:

—Iriro nanintasanti Notomi Ica. Tojai nacani-
 natasantobiqueri. Pinguemisantaiguëri Iriro.

⁶ Iquemaigabaquero oca irogomere, aro ipariaque yaquitomotaiganaca itsorogasantanë.

⁷ Ipocasitaiguëri Jesus. Yotsagataiguëri icanqueri:
—Pingabiritima, quero pitsorogaigui.

⁸ Aro icabiritanaa icogabetajari Moisés aisati Erías, te irinaje, Irianti panibani inasegui Jesus.

⁹ Aique cara yanongaiganaca, igáqueri irogomere Jesus icanqueri:

—Quero picomanti oca piniaiguëca. Aiqueta cara nangamaque aisati nanganiatanae, aro pingomantaigueri basini matsiguenga. Pingo-mantëgotina Naro omagaro ora pigótocoquina aisati cara nopaniaca Jonogaguitequë aisati nomatsiguengatapë.

¹⁰ Aique yosamitaiguëri irogomere:

—Ira ogomeantiro Sanguenari cantatsi: “Iri-bocapae iritsita Erías cara queroquerai ipoqui Quirisito Ira Agabisaicoontatsi”. ¿Pairo yogome-biriqueri oca? ¿Pairo te iribocobipë Erías?

¹¹ Yotabitaiganaqueri Jesus:

—Aisonori icantaiguë: “Ingonijapae Erías, irobetsicaguepë omagaro”. ¹² Yamai nocomantaiguëmi cara aroque ipocaji Erías carari te irogótaigabaqueri matsiguenga; tojai itsipiriacagaigabaqueri. Aisati nanganquima Naro, tojai iratsipiriacagaiguëna.

¹³ Aique igóiguë irogomere cara Jesus inibatëgotëri Joan baotisantantsiri.

*Jesus yogaguibegajiri janequi tingaraachari.
(Mr 9.14-29; Ir 9.37-43)*

14 Aro cara yanongopaa osobi, ainta arosonori matsiguenga yapatotaiga. Aro ipocasipëri Jesus sërari, yobaticagueritotaguëpari, icampëri:

15 –Natingomi, pingantaneintëgotinari notomi; tojai itingaraacani, tojai itsipiriaque. Iparigopiantë tsitsiquë irisacanëma; aisati iparigatapininque nijaaquë. 16 Namabitapari yaca pogomerequëca nacantabepari: “Pigaguibegajiri notomi”, carari tiguëti ingantiri iragabiari iragabisaicotajiri.

17 Yotabitanëri Jesus:

–¡Te pigóiguero Irinibare Tosorintsi! ¡Terai pinguemisantaiguero obirojegui, terai pingani-nataigue! ¿Ati ongantima nantsibataiguëmi nogometasitaiguëmi carari te pigóigue tojainta pit-soingauëna?

Aique icanqueri casintari janequi:

–Atsi pomapënari pitomi.

18 Aro Jesus iguisatsatëri ira camagari, ijoqueri, yogaguibegajiri ira janequi.

19 Aique yosamitaiguëri Jesus irogomere casiri-coniati:

–¿Pairo te nagabiobitiri nagátiri ira camagari?

20 Icantaiguëri Jesus:

–Teni pigabeiri tenta pinguemisasantina. Arosataanti piquemisantaiguëri Tosorintsi. Aisonori nacantasantaiguëmi: aroca piquemisantaiguëri pinganquero ca ora oguitoja, “Ogaganëmata canta”, aro ogaganëma. Aisa ocanta mositasaguitso otiomijanisonori oquibianë, aisa ocanta cara pinguemisantaiganaque. Pinguemisantasantaiguëca, pinganquero ca pairoraca nongocaquemi. 21 Carari pinintica

pijoguiri camagari cantacha ica, patiro pingantiro aroca pomanocotasantëri Tosorintsi aisati aroca pititima.

Yogatsitai Jesus icomantaigairi irogomere, icanqueri: “Pënibaque nangamaque”.

(Mr 9.30-32; Ir 9.44-45)

²² Iroontita yanëitaiganaque cara Garireaquë, Jesus icantaiguëri irogomerejegui:

—Nopaniaca Jonogaguitequë, nomatsiguen-gatapë cara niboguë yaca quibatsica. Carari irácagantaiguëna matsiguenga, ²³ irógaiguëna. Ongaraque maba cataguiteri aro nanganiatanae.

Iquemaiguëro irogomere oca nibarintsica, aro yogasëretaiganaca.

Ipënabentiro Jesus ora irobetsicantaguetimaro ibango Tosorintsi cara Jerosarénquë.

²⁴ Aique iáiguë Caperinaoquë Jesus aisati irogomere. Cara ainta ira coigotëri quirequi irobetsicantaguetimaro ibango Tosorintsi. Ipocasiqueri ira Peroro, yosamitapëri:

—¿Iripënabentapininquerinico Ira ogometimiri iguireguita arota iraganinatiro ibango Tosorintsi?

²⁵ Icanqueri Peroro:

—Jee, iripënabentiri.

Cara ipiganaja Peroro cara pongotsiquë, yosamitëri Jesus:

—Simón, ¿Pairo piquianca? Irapague itingomi, ¿Pairo icoicotopianti iguireguita? ¿Icoicoquerico imatsiguengasonori? Teca, ¿Iriantico icoicoqueri basiniati matsiguenga?

²⁶ Yotabitanëri Peroro:

—Icoicotaiguëri basiniati matsiguenga.

Aro icanque Jesus:

—Aisonori, te ingoicotiri imatsiguengasonori. Aisa nacanta Naro, te ingoicotina Pabati aro-
quenta nomatsiguengatacari. ²⁷ Carari te naninte
inguisaneintina ira coigotantatsi quirequi. Ya-
mai pijáte angaarequë, pimate sima. Ira iritsita
páguë, pintiguiranguiri, piniaqueri poro quire-
qui. Páganëri, pomeri ira coigotantatsi quirequi,
popënabentina Naro aisati popënabentima obiro.

18

*Icomantë Jesus pairi obaquenguitsine cara itin-
gomibintanti Tosorintsi.*

(Mr 9.33-37; Ir 9.46-48)

¹ Aique irogomerejegui Jesus iátasitaiguëri,
yosamitaiguëri:

—Cara igáanti Tosorintsi, ¿Pairi obaquenguit-
sine?

² Aro icaimëri janequi Jesus, yogobëri agan-
guisati, ³ icanque:

—Aisonori nongomantëmiro oca: pinguen-
gasërete basiniati, pingantiro yacaqueroca.
Queroca aisati pincanta ibega janequi,
quero pareta cara igáanti Tosorintsi. ⁴ Teni
inguenguema iriati caninari ica janequica.
Pairiraca cantëmarine ibega ica janequica
iriro obaquenguitsine cara iragáantanequë
Tosorintsi. ⁵ Pairiraca ágacaninatëri ira
cantari janequi iquemisanquinanta, aisati
yágacaninatëna Naro. ⁶ Pairiraca antaquerine
janequi quemisanquina ora te onganinate,
natsipiriacaqueri. Caninataqueme ingamaque
queroqueraí intaguiri ora te onganinate, aisa

onganquimame iragaguibeintsatsatëgotëneri
oquibe mopë itsonoquë, irojoquerime
angaarequë ingamaque. ⁷ Aiti tojai ora
quimingari yaca quibatsica, aisati ainta tojai
intaqueri basini ora te onganinate, carari
iratsipiriasantëro ira antaquerira.

*Pijoquiro pairoraca antaquimine ora te on-
gomeite.*

(Mt 5.29-30; Mr 9.41-48; Ir 17.1-2)

⁸ Aisati icanque Jesus:

—Yamai nosiacagantëmiro. Aroca ontaquimi
pobaco ora te onganinate, pijocajiro ora
picantaguëti quimingari. Aro pobetsiquiro
pisëre aisatime ongantima pitotirome pobaco
pijoquerome. Aisati piguiti ontaquemiroca te
onganinate. Caninataque pinë paboconirobi
queroca paguitinirobi cara Jonogaguitequë, arota
quero piáti Sharincabeniquë cara pini tsitsi ora
te otsibacanete. ⁹ Aroca ontaquimiro piroqui
ora te onganinate, pijocajiro ora quimingari.
Pobetsiquiro pisëre aisatime ongantima
páguirome pijoquerome piroqui. Caninataque
pijáte paoquinirobi cara Jonogaguitequë,
querota piátacaguiro pitirooti piroqui cara
Sharincabeniquë cara te otsibacanete tsitsi aisati
pitsipiriasantë përosati.

“Quero pitsoinguri janequijegui”.

¹⁰ Aitosati icanque Jesus:

—Aisati, quero pitsoinguri janequijegui,
aintanta ironomire Pabati jonoquë yomisan-
taiguëri janequi, aisati icomantëgobentaiguiri.

11 Nopaniaca Jonogaguitequë, nomatsiguen-gatapë. Nipocasiqueri nagabisaicotaigairi ira játaiguënguitsineme Sharincabeniquë.

Jesos yosiacagantëri oisha ibiaga.

(Ir 15.1-7)

12 Aisati icantaiguëri irogomere Jesus:

—Nosiacagantëmiro aisati. Aroca ini casintari 100 iroishate, imiaquimaca poro, ¿Queroco ijo-caiganaqueri 99 cara tongagariquë, iriátasitëri ingogajantiri iroishate ira peguënquicha poro?

13 Cara iranijirica, inganinabenqueri iroishate aroquenta iniajiri, pabisëro cara icaninabentaigu-iri iraegui te imeguima. 14 Aisa icanta Pabati, te iraninte iriáte Sharincabeniquë paniro janequi.

Icanque Jesus: “Pogometiri popiguemisantane cara quero icantagueti ora te onganinate”.

(Ir 17.3; Mt 16.19; Jn 20.23)

15 Aisati icantaiguëri Jesus:

—Aroca pigasërequima ingantaguetomoquim-inta popiguemisantane ora te onganinate, pijátasitiri casiriconiati pingantiri. Quero picomantiri basini. Aroca inguemisan-tobëmi, intimaque caninasati, caninataque, págacaninatobagajima aisati. 16 Queroca iquemisantimi, pijátasitajiri aisati páganëri basini popiguemisantane, paniro queroca pite. Intsibataiguëmi irogóontimarota pairoraca pinganqueri, aisati ingampëri iriro cara inguen-gasëretaquimari irapiguemisantane. 17 Queroca iquemisantaigabaquemi, pingomantëgotiri cara yapatotaiga quemisantatsirijegui. Aisati

ingamanaaiguëri. Queroca iquemisan-
taiguiri antagaisati irapiguemisantane,
aro pingueincotaiguëri ibega tsoengatsiri
aroque icantagueque te onganinate. Quero
pijitiri quemisantatsiri. Irianti cantacha
coigotantatsi quirequi ipagantineri cobeingari
Iromasati. ¹⁸ Pairoraca pingantaiguëri yaca
quibatsica, irootisati inganqueri aisati Tosorintsi
canta Jonogaguëta. Pingantaiguërica
popiguemisantane cara icantaguëti te
onganinate, iroero quero pomaguisantaguëtineri,
aro irooti inganqueri Tosorintsi. Aroca
irobetsicasërequima, pijocajineri pingantaiguëri te
ine icantaguëti yamai, aisa ocanta ora inganqueri
Tosorintsi inguengasëretëmi irojocajineri aisati.
¹⁹ Nagatsitaimiro: cara pomanaiguëri Tosorintsi
cara Jonogaguëta obiro aisati basini, aroca
pinguengasëretima, aro imaignëmi Tosorintsi
ora pomanaqueri. ²⁰ Aisonorinta atiraca
irapatotaiguema pite quemisanquinane queroca
maba, aisati aintana Naro nantsibataiguëmari.

*Pijocajineri basini ora icantaguetomoquimi te
onganinate.*

(Jn 20.23)

²¹ Aique iáque Peroro, yosamitëri Ira Jesus:

—Natingomi, nigóque cara ingantaguetomoquinaca te ongomeite nopiguemisantane, caninataque nangábintseri nojocajineri ora icantaguetomoquina, quero nipégatari. Carari iragatsitainaroca, ¿Ati ongarate nojocobentajiri? ¿Aroco ongarate 7?

²² Yotabitanëri Jesus:

—Nangantasanotëmi, quero patiro pijocobentajineri siete, carari tojaissonori pijogopiantaineri përosati; quero pipëgatari. ²³ Aisati ora iragáantane Tosorintsi ocantari ibega ibatorote cogatsi cara iripënabentairi iratirite. ²⁴ Icaimobëri paniro iromeraro, irebetiri tojaissonori quirequi. Icantabepari: “Popënabentajinari naguirequite”. ²⁵ Yotabitanëri: “Tiguëti ongantima nopënabentajimi yamai tenta irine quirequi”. Aro igáqueri basini: “Páganëri ica. Pomimantiri. Aisati pomimantiro iina, ianiquite, ora yasinta, omagaro; nágairi quirequi irebetëna”. ²⁶ Aique yobaticagueritocari iromeraro, yamanaqueri: “Nobatorote, quero popimantina. Aiquenta nopënabentajimiri antagaisati”. ²⁷ Aro icantaneintëgotanairi iromeraro ibatorote, icanqueri: “Nangábintsaimi, nojocajimiri ora pirebetëna nomaguisantocotajimiri. Quero nocoicotajimi”. Aro yomisotocajiri. ²⁸ Cara iáque iromeraro, iniopëri irapimeraro irebetiri iriro arosata quirequi. Yágatsonotobëri icanqueri: “Popënabentinari ora pirebetëna”. ²⁹ Aro yobaticagueritotabecari, yamanaqueri: “Quero picoicotinari yamai. Aiquenta nopënabentajimiri antagaisati”. ³⁰ Carari te ingábintsairi. Yomianqueri iromingamentoquë icanqueri: “Cara popënabentajina, aro nagáqueri cara iromisotocajimi”. ³¹ Cara iniaigabaqueri imatsiguenga, yogasëretaigaca. Iátasitaiguëri ibatorote, icomantaigapëri: “Naniaiguëri ira picábintsai cani, te ingábintsante iriro yamai. Yomianqueri irapimeraro irebetërinta iriro

arosata”. ³² Aro ibatorote icaimagantairi aisati iromeraro, icabëri: “Te pinganinate obiro. Picanquena: ‘Quero popimantina’, irooti nojogantaimiro ora pirebetëna. Nacábintsasantëmi, carari te pingábintseri irebetimi obiro arosata. ³³ Aisati ¿Caninataqueme pingábintserime obiro ira irebetimi arosata, aisati pingantiname naro cara nacábintsëmi?” ³⁴ Aro iguisanaca ipasatëri yomianqueri icanqueri: “Yamaica quero nomisotocajimi irooti cara popënabentajina antagaisati ira pirebetina”. ³⁵ Aisa ocanta queroca picábintsairi ira cantaguetomoquimine te onganinate, queroca pijocajineri, querootisati icábintsaimi Pabati Jonogaguitequë.

19

*Iáiguë Jesos aisati irogomere aiquero Joreaquë.
(Mr 10.1)*

¹ Aroque icomantagueque Jesus cara Garireaquë. Aique yogagaiganaja Iriro aisati irogomere cara Joreaquë, canta antatinta Joriránquë. ² Aisati yoguiataiganaqueri tojai matsiguenga. Aintasati tojai janaitaguetatsiri. Yoguibegajiri Jesus.

*Jesos yogometocoqueri ira joquërone iina.
(Mt 5.31-32; Mr 10.2-12; Ir 16.18)*

³ Aisati iátasitaiguëri Jesus bariseopague; ico-gabeca iraniantëmari irantacaquerime ora te onganinate. Yosamitaigapëri:

—¿Caninataqueco irojocajiro iina sërari aitica pairorapagueraca ora te iranintocotiro?

⁴ Yotabitobëri Jesus:

—¿Teco pinibatapinintabetimaro Sanguenari? Jirai Tosorintsi yobetsiquëri ira sërari aisati tsinane. ⁵ Aisati icanque Tosorintsi:

Cara iráquero iina sërari, irojocanëri iriri aisati iniro, irágasantëro iina, intimacaquero casiriconiati. Coshoni iroquero iina, pitirooti inganquima paniro ibatsa.

⁶ Jirai inabitaca sërari aisati iina; yamai coshoni irogobaquima, intimaiguë inganquima paniro. Iniaiguëri Tosorintsi irianti paniro ibatsa. Ipanirootitaiguëri. Iroero te onganinataguëte irojocobagajima. Querootisati ijocaguiri basini mat-siguenga.

⁷ Aisati yosamitaigapëri bariseo:

—¿Aisonori? ¿Pairo isanguenabirique Moisés jirai?

Pisanguenatinero pijina pomero ora pijogantaimaro, aro ocaninati pijocajiro.

⁸ Icantaigabaqueri Jesus:

—Te pinganinasëretaigue, aro icanquemi Moisés cara caninataque pijocajiro pijina. Carari te iranintacaguimi Tosorintsi pijocajiro. Icaquemi quero pijoquero. ⁹ Nacantaiguëmi Naro, aroca pijoquero pijina, aisati págae basini, aroque paguimintëmaro pijinasonori. Patiro aroca aguimintëmi, aro caninataque pijocajiro. Aisati ira agairone tsinane ora ijoque ojime aroque yaguimintacari ojime.

Icantocoqueri Jesus ira te iráque iina.

¹⁰ Aro icantaiguëri irogomere:

—Aique, queroca ocaninati ijocajiro iina, caninataque quero yáganti.

¹¹ Icanqueri Jesus:

—Tigueti ongantima inguemiro antagaisati sērari oca nacantaiguêmica. Paniro inguemaquero ira yogometasanti Tosorintsi. ¹² Ainta ira te irágobinte iina. Aintasati basini ira yágaguitsoiti, quero pini iina. Aisati ainta te iraninte iráguiro iina. Icoguini intimasitima arota inganquineri pairoraca ingocaqueri Tosorintsi. Aroca pinguianquero oca piquemaque, aro pinguengasëretëro.

Jesus yoguëneri janequipague ibaco.

(Mr 10.13-16; Ir 18.15-17)

¹³ Aique pamapëneri Jesus janequipague, ocan-taigapëri:

—Poguineri pobaco notomipague, po-manocotiri Tosorintsi arota ingábintseri.

Icantaigabaquero irogomere:

—Quero paseriguiri Atingomi.

¹⁴ Carari icanqueri Jesus:

—Quero picantiri. Nocoguini iribocasitaigapëna janequijegui. Igóiguë iroso intingomintina. Antagaisati icantaigari ibega ica intiomoquina cara itingomibintanti Tosorintsi.

¹⁵ Aro yoguëneri ibaco, yamanaque:

—Pabati, nanintini pingábintsaiguero icaegui janequipague.

Aique iáque Jesus.

Jesus icamanaaquero ira sērari casintasantachari.

(Mr 10.17-27; Ir 18.18-27)

¹⁶ Aro ipocasiqueri oboina sërari yosamitapëri:
—Ogomeantatsiri, picaninati. ¿Pairo caninatatsi nanganque naro arota nantimaque përosati canta Jonogaguitequënta?

¹⁷ Yotabitanëri Jesus:

—¿Pairo picantobiquina Naro caninari? Paniro ini caninari, Irianti Tosorintsi. Carari picoguica pijáte Jonogaguitequë, pingantiro omagaro ora isanguenaque Moisés.

¹⁸ Icanque oboina:

—Aiti tojai isanguenaque. ¿Pairo pininti nanganque?

Yotabitanëri Jesus:

—Quero póganti, quero pintiro tsinane cagaro pijina, quero picositanti, quero pitsoiguëgotari pomatsiguenga. ¹⁹ Pinguemisantiri piri aisati piniro quero pipëgatsatari; pinintiri pitimanamitane aisa ocanta cara pininta obiati.

²⁰ Icanqueri sërari:

—Aroque naquemisanquero omagaro oca cara ninë janequi irooti yamai. ¿Paironibani nanganque basini?

²¹ Icanqueri Jesus:

—Pinintica iraniacaninatimi Tosorintsi, atsi pijáte pomimantiro antagaisati ora pasinta, pomaguetiri ira coguitiaguetacha omagaro opënataga; aique imëmi Tosorintsi ora caninaro cara Jonogaguitequë. Cara pomimantëroca antagaisati, omana piguiatanëna Naro.

²² Cara iquemabecaro oca, iáque oboina yogasëretasantanaca irironta casintaguetasantacha, te iraninte imimantiro. ²³ Aro icantaiguëri irogomere Jesus:

—Aisonori nacantasantëmi: opomir-
intsitocari casintaguetachari iriátë cara
itingomibintanti Tosorintsi. ²⁴ Nagatsitaimiro
aitosati, opomirintsitocari cameyo ingue
otiomijaniquë omoro quitsapi. Carari
omomirintsitomotasantëmari casintachari iriátë
cara iragáantanequë Tosorintsi.

²⁵ Iquemaiguëri irogomere iquenganeintasan-
taigacari, yosamitobaca:

—¿Aisonorico? ¿Pairo inganque matsiguenga cara
irabisaicotajima?

²⁶ Jesus inetsaiguëri irogomerejegui,
icantaiguëri:

—Quero icantiro matsiguenga, carari Irianti
Tosorintsi inganquero antagaisati. Te omomir-
intsitomotimari Iriro.

*Quero itsipiriaro quemisantatsiri ira aguiatëri
Jesus.*

(Mr 10.28-31; Ir 18.28-30)

²⁷ Aique icanqueri Peroro:

—Pinguengaiguena naroequi, tojai
nocogasantaigui naguiataiganaquemi, iroro
nojocagaguëtanëro omagaro nasintaiga. ¿Pairo
nágaigae aiquenta?

²⁸ Yotabitanëri Jesus:

—Nangantasantaiguëmi aisonori: aronta
nopaniaca Jonogaguetequë nomatsiguengatapë,
aiquenta nopocaje aisati iroraiquë quibatsi
nagáantasatapë antagaisati. Cara nosobiaque
nagáantomentoquë, obirojegui aguiataiguëna
yamai, aisati pisobicaiguë pigáantomentoquë
ocarati 12. Pigáantaiguëri joríojegui. ²⁹ Aroca
piguiataiganaquina, quero pitsipiriaro. Aroca

pijocaiganaquero pobangopague, pirementipague, pitsiropague, piri, piniro, pitomipague, piguebatsitepague, pairorapagueraca, quero pitsipiriaro. Aroca pijogobitanênaro arosata piguiatêna, imaignuëmi Tosorintsi tojai. Aisati irágaiganaquemi cara Jonogaguitequë cara pintiomoqueri Tosorintsi përosati. ³⁰ Ainta yamai tojai itingomipague yaca quibatsica, carari quero igáanti canta Jonogaguitequë cara panironta Atingomi. Aintasati yamai tojai itsipiriaiguë yaca, imaintaignuëri matsiguenga carari aiquenta imaignuëri Atingomi iromitocoiguëri cara igáanti Iriro. Icaranti yamai carari aiquenta irobaque.

20

Jesos icomantëgotëri merantachari obasiquë.

¹ Aisati basini icanque Jesos:

—Aisati nongomantaiguëmiro ati icanta Tosorintsi cara igáanti. Ainta casintaro irobasite. Oquëtaguetanë iátasitamanëri sërariopague poeboroquë intarobacaatineri irobasitequë.

² Iniopëri iraegui cogatsi intarobacaatineri, icampëri: “Pintarobacaatina yamai irooti chopiniquë, aro nomaiguëmiri paniro quirequi ira jitacha tenario”. Icabëri: “Aro, caninataque”. Aique iáiguë itarobacaquineri irobasitequë.

³ Cara ijonogatapë paba, aisati iátaji casintaro obasi poeboroquë, iniaigapëri basini sobicaigatsi te intarobacaate. ⁴ Icampëri: “Pinintica pintarobacaatina yamai cara nobasitequë, nopënenbenquimi caninasati”. Yotabitanëri, ⁵ “Aro”, aique iáque itarobacaquineri. Aisati catinga

paba iátaji poeboroquë itarobacaatacaqueri basini. Aisati cara inëmatanë paba igáqueri basini intarobacaatineri. ⁶ Aisati pënibaque ochapinitanë iátaji. Iniopëri basini te irante. Yosamitapëri: “¿Pairo te pintarobacaabirite?” ⁷ Yotabitobëri: “Tenta pairi meratinane”. Icampëri casintaro: “Atsi pijáte pintarobacaatina aisati nobasitequë; pintsibatimari ira obataiguëmi”. ⁸ Cara ochapinitanë ira casintaro icanqueri ira omisantineri irobasite: “Popatotaigueri iraegui tarobacaataiguëna nobasitequë, popënabentiri. Piguibatëri popënabentiri ira carantënguitsi ipoque. Aique popënabenqueri basini irooti cara popënabentiri ira obapënguitsi naarai coniamaniquë”. ⁹ Aro ipoque ira tarobacaatënguitsi arosata, ipënabenqueri paniro tenario. ¹⁰ Aisa ocanta ipaiguëri ira parintënguicha catinga, aisati ira boquënguitsi cara ijonogatapë paba. Aique icaimaiguëri iraegui parintënguicha coniamaniquë. Iquengaigabitaca iriro iripënabentëri tojai, carari ipënabentaiguëri paniro tenario aisati. ¹¹ Yágaigabaqueri iguireguite, iguisatsatëri ira tarobacaatacaqueri. ¹² Icantaiguëri: “Ira carantënguitsi itarobacaataiguë arosataanti, carari pipënabentaiguëri iriatisati popaiguëna naro. Naanti niáigamanë cara oquëtaguetamanë, natarobacaatasantaiguë, icatsiringatasantë paba, tojai nomasobitaiguë. Caninataque náguëme basini quirequi”. ¹³ Paniro yotabitanë casintaro oba: “Nomatsiguenga, teni nomatobitimi. ¿Teco nangantimi naarai, ‘Nopënabenquemi paniro tenario’, picanquena, ‘Aro’? Aquengaigaca.

14 Yamai, páganëri pasiati, pijáte. Nocoguini nopë nabentaiguëri ira carantënguitsi aisa inganquima pibiaca obiro. 15 ¿Teco onganinate nopasitarico naguireguité? ¿Piguisaneinquanico obiro aroquenta nacábintsaiguëri basini?” 16 Nongomantaiguëmi yaca quibatsica iraegui imaintaiguë imatsiguenga, iraguibataiguëri Tosorintsi cara Jonogaguítequë. Irari aguibataigacha yaca quibatsica ingarantaiguë canta. Aintanta tojai matsiguenga icantaigabitari Tosorintsi: “Pinguemisantina”, carari arosataanti ira quemisantaiguëri. Tojai quero iáti Jonogaguítequë.

Mabataque icanque Jesus: “Nangamaque, aisati nangabiritajima nantimaje”.

(Mr 10.32-34; Ir 18.31-34)

17 Aique iáiguë Jesus aisati irogomere aiquero Jerosarénquë. Yáganëri casiriconiati irogomere, icomantaigairi:

18-19 —Yamai intsomaigue Jerosarénquë. Naro paniacha Jonogaguítequë, nomatsiguengatapë cara niboguë yaca quibatsica. Iroso cantënguicha cara Jerosarénquë irágaiguëna itingomipague saseriroti aisati iraegui ogomeantiro isanguenare Moisés. Ingantaiguëri ira Iromasati: “Páguiri Jesus, póguri tenta ingomeite”. Irisërontaiguëna, iripasataiguëna, iribëquëgotaiguëna corosiquë carari ongaraque maba cataguiteri nangabiritanaima nanganiatae.

Piátasiqueri Jesus iina Sebereo.

(Mr 10.35-45)

²⁰ Aique piátasiqueri Ira Jesus iina Sebereo, ot-sibatapari otomi, Joan aisati Santiago. Pobaticagueritotasipari ocampëri:

—Nocoguini pingábintsena.

²¹ Yosamitobëro:

—¿Pairo pininti?

Potabitapëri:

—Aiqueta, cara pigáantë pigáantanequë, no-coque irisobicomuimi notomi, paniro pobaconoriquë, ira basini pomatepacoquë. Iromitocotaiguemita cara pingingomibintanque.

²² Icabëro Jesus tsinane aisati otomi:

—Te pigóte pairoraca pomanaguina. Aiqueta natsipiriaque tojai. ¿Teco pintsorogue cara pitsipiriaiguë obiro?

Yotabitanëri Santiago aisati Joan:

—Teni nontsorogue, nangantaiguëro naro.

²³ Aro icanqueri Jesus:

—Aisonori pitsipiriaiguë, carari quero nopimiro cara pisobicomuina aiqueta. Paniro Pabati përine pairiraca tsipaquinane Naro cara nagáantë.

²⁴ Iquemaiguëri basini irogomere icarati 10. Aro iguisaneintobiqueri ira Santiago aisati Joan, aro-quentica icogabeca pitirooti irobataiguëtime.

²⁵ Iriro cantënguicha Jesus icaimaiguëri irogomerejegui, icantaiguëri:

—Pigóiguë ira itingomipague basiniati matsiguenga cagari jorío yametaiga imerataigari imatsiguenga. ²⁶ Carari quero aisati picantaigari ibegaiga iriro. Pinintaiguëca piguibatima obiati, pomitocotaiguëri pomatsiguenga pingábintsaguëtaiguëri, quero pimeratari.

²⁷ Pomitocotaiguëri pomatsiguenga pairoraca

ininti. Pingantimari ibega iromerataga.
²⁸ Nopaniaca Jonogaguitequë, nomatsiguen-
 gatapë arota nomitocotaiguëri matsiguenga,
 quero nimeratari. Aisati nipocasique
 nangamobitaiguëri antagaisati matsiguenga
 arota iragabisaicotajiri Tosorintsi cara
 inguemisantaiguëna Naro.

Jesos yogaguibegajiri pite comarajari.

(Mt 9.27-31; Mr 10.46-52; Ir 18.35-43)

²⁹ Cara yaretaiga Jesus aisati irogomere Jer-
 icóquë. Cara yogagaiganaca, yoguiataiganaqueri
 abatsiquë tojai matsiguenga. ³⁰ Ainta isobi-
 caigasegui pite comarajari onamiquë abatsi. Ico-
 mantaiguëri iriro:

—Coraque Jesus.

Aro icaibaitanë pitirooti:

—¡Natingomi, Obiro imatsiguenga David! ¡Pingan-
 taneintëgotaguëna!

³¹ Aro iguisatsataigabaqueri ira botoitaigacha
 icanqueri:

—¡Pomairetaigue!

Aiquero iáiguë icaimasantaiganaque:

—¡Natingomi, pingantaneintëgotina Obironta
 imatsiguenga David!

³² Iquemaigapëri Jesus, yaratingopë, icaima-
 gantëri, icanqueri:

—¿Pairo picogaiguë nanganquemi?

³³ Yotabitaiguëri pitirooti:

—Natingomi, nanintaiguini piniacagajina.

³⁴ Aro icantaneintëgotagapëri Jesus,
 yotsagataiguëri iroquiquë. Aito cara inianai
 aisati. Aro yoguiataiganaqueri ira Jesus.

21

Icanaque Jesus Jerosarénquë.

(Mr 11.1-11; Ir 19.28-40; Jn 12.12-19)

¹ Aro yaretaigacaro poeboro jitacha Betajajé Jesus aisati irogomerejegi. Pinë Betajajé osobiquë oguitoja jitacha Olibos ora oguitoja catingasatiquë Jerosarén. Aro Jesus igáqueri pite irogomere, ² icanqueri:

—Pijáigue catingasati poeboroquë. Cara, piniaquero tsinane boro otsatocotaga, otsibatari itiomijani. Pintaicotiro pomapëro yaca.

³ Aintaca matsiguenga irosomitobëmica: “¿Pairo pitsaicobiritiro boro?” aro pinganëri: “Icoguironi Atingomi”. Aro inganquemí: “Páganëro”.

⁴ Icanque Jesus negaca cara imoncaraquero ora isanguenatocoqueri jirai comantantatsiri jitacha Sacarías. Isanguenaque:

⁵ Pingomantiri Jerosaresati: “Coraque Pitingomi. Iriro caninarisonori, quero iquenga Iriati. Iqueicotanacari itiomijani boro”.

⁶ Aique iáque pite irogomere, ⁷ yamapëneri ira pite boro, antiasiporo aisati itiomijani. Yoguëneri iguitsagarepague imiticaraquë, aro iqueicotanacari Jesus. ⁸ Ainta inaigasegui tojai matsiguenga yoguiaiguëri Jesus. Yogaguetaiguëneri iguitsagarepague cara abatsiquë arota iragaticanëro boro. Aisati yogaguetaiguëneri otiomijani otsego anchato aisa icanta icantaigabaquineri itingomi. ⁹ Ibataiganaqueri tojai matsiguenga aisati yoguiataiganaqueri tojai. Icaimaiganaque:

—Ainta Agabisaicoontatsiri, imatsiguenga David. Intsome antingomintobëmari. Intsome

aniacaninatobëri. Igáqueri Tosorintsi aroquenta iniacaninatëri Iriro. Caninari Tosorintsi jonoquënintaberi.

¹⁰ Aro icanaque Jesus cara Jerosarénquë. Iquenganeintasantëgotobacari Jerosaresati, yosaminatobagaiganaca:

—¿Pai ica?

¹¹ Yotabitaiguëri basini:

—Irianti Jesus Nasaresati. Ipaniaca toonquë cara Garireaque. Iriro comantantatsiri Ira igáque Tosorintsi.

Jesus ijocaigapëri ira pimantaguetatsiri cara oquibequë pongotsi irasi Tosorintsi.

(Mr 11.15-19; Ir 19.45-48; Jn 2.13-22)

¹² Aro icanaque Jesus cara oquibequë pongotsi irasi Tosorintsi, iguisaigapëri antagaisati ira mantatsiri aisati ira pimantatsiri, ijocaigapëri sotoquë. Aisa icanqueri ira campiatiri quirequi aisati ira pimantiri paroma; yotëatapëri imesanepague aisati irisobicomentopague. ¹³ Icantaguëri:

—Ocanti Sanguenari:

Icanque Tosorintsi: “Caninataque pomanocotaiguenana yaca nobangoquë”.

Carari obirojegui te pomanocotiri, iroonti picositapinintaigabaqueri ira bocaigatsi iromanocotaigapëri Tosorintsi.

¹⁴ Aique ipocasitaiguëri Jesus tojai comarajari aisati tojai carancaratsiri. Yoguibegaigabaqueri. ¹⁵ Cara iniaiguëri itingomi saserirotipague aisati ira ogomeantiro isanguenare Moisés, iguisaneintaiganaqueri Ira Jesus, aroquenta itasorintsitagueque Iriro. Aisati Iriro icaimëgotaiguëri janequi cara oquibequë pongotsi, icantaguë:

—¡Intsome antingomintaiguemari imatsiguenga David!

Aro iguisaneintasantaigaca saseriroti, icantaiguëri:

¹⁶ —¿Piquemaqueroco oca icantocotaiguëmi janequi? Te onganinate ijitaiguëmi Itingomi.

Yotabitanëri Jesus:

—Jee, naquemaiguëri. Teco pinibatiro Sanguenari ora cantatsi:

Intingomintaiguëmari Ira Quirisito janequi aisati tsorori janequi ira tsotatsi. Irinibacani-nataigabaqueri.

¹⁷ Aro iáiguë Jesus aisati irogomere, iáiganaque cara Betaniaquë cara isamaigapë. Ora Betania iroonti poeboro otiomijani.

Jesus yogasiguiriquëro iguera.

(Mr 11.12-14, 20-26)

¹⁸ Cara oquëtaguetanai ipigaigaa Jesus aisati irogomere aiqero Jerosarénquë. Cara abatsiquë itaseguë Jesus. ¹⁹ Cara onamiquë abatsi iniopëro panguirintsi jitacha iguera. Iátasiquero. Ico-gabecaro ojito, carari te ine, iroonti osi. Icampë:

—Querota basini pinai ojito oca igueraca.

Aito cara pisiguiricanë iguera, ocamaque.

²⁰ Iniaiguëro irogomere, iquenganeintaigacaro, yosamitaiguëri Ira Jesus:

—¿Ati ocanca pisiguiricasitaca iguera omanapague?

²¹ Yotabitaiguëri Jesus:

—Nacantasantaiguëmini, aroca pinguemisanqueri Tosorintsi, pingantaiguëro aisa nacanta nacanquero iguera. Aisati pinganquerica Pabati: “Pigaganënaró oca oguitojaca, pijoquiro cara

angaarequë”, aro inganquimiro. Carari quero pitsoinguiiri. ²² Aisatica pinguemisanqueri, inganquimiro pairoraca pomanocoqueri.

*Yosamitaiguëri Jesus joríojegui: “¿Pairi agáquemi?”
(Mr 11.27-33; Ir 20.1-8)*

²³ Aitosati icanaque Jesus cara oquibequë pongotsi irasi Tosorintsi. Iroontita yogomeantasegui, aro iátasitaiguëri itingomipague saseriroti aisati irapague ogomeantiro isanguenare Moisés, yosamitaiguëri:

—¿Pairi agáquemi cara pijocaiguëri pimantaigatsiri? ¿Pairi uguëmi cara pijica itingomi?

²⁴ Yotabitaiguëri Jesus:

—Aisati Naro, patiro nosamitaiguëmi; aroca potabitaiguëna, aisati nongomantaiguëmi pairi agáquena Naro. ²⁵ ¿Pairi agáqueri Joan cara ibao-tisataiguëri tojai omatsiguenga? ¿Iriroco agáqueri Tosorintsi? ¿Iraco agáqueri matsiguenga?

Icantobagaiganaca jorío:

—Anganquerica: “Igáqueri Tosorintsi”, aro ingancái: “¿Pairo te pinguemisantobitaiguëri Joan?” ²⁶ Carari aroca anganqueri: “Igáqueri matsiguenga”, aro inguisaigacái omatsiguengapague ijitaiguënta cara igáqueri Joan Tosorintsi cara ingomantagueque.

²⁷ Aro yotabitaiguëri:

—Teni nogóigue pairi agáqueri.

Icanqueri Jesus:

—Aisati Naro, quero nocomantimi pairiraca agáquena nangantaguetete ocapague piniaguëca.

Ira saserirotipague aisati icantari ibega oboina te iriátsatiri iriri.

²⁸ Aisati icantaiguëri Jesus:

—Yamai nongomantaiguëmiro quingabaguirentsi: ainta sërari aisati piteni itomi. Igáqueri itomi obatatsiri: “Notomi, pijáte yamai pintarobacaate cara obasiquë”. ²⁹ Yotabitanëri: “Quero nantiro”, carari iquianca, aique iáque itarobacaapë. ³⁰ Aisati igáqueri basini itomi: “Notomi, pijáte yamai pinte cara obasiquë”. Yotabitanëri: “Aro, Apa, najáque”. Carari te iriátsatiri. ³¹ Yamai nosamitaiguëmi: ¿Pairi antasantëneri iriri ora icocaqueri?

Yotabitaiguëri:

—Ira obatatsi, aroquenta itarobacaaque obasiquë.

Aro icantaiguëri Jesus:

—Nangantasantaiguimini oca: irobataiguëmi iriáiguë Jonogaguitequë ira coigotantatsi quirequi aisati ora antapinintaguetiri sërari cagari ojime. ³² Ipoque Joan baotisantantatsiri, icomantapëmi ati pingantaiguëma cara pinganinataiguë, carari te pinguemisantobëri. Irianti quemisantaiguëri ira coigotantineri Iromasati piguireguite, aisati oquemisanqueri tsinanepague antaguetaiguiri sërari cagari ojime. Icantaigaa yacaqueroca cara iriáiguë Jonogaguitequë, carari te pomasiniatitima obiro, te piganinataiguema, quero piáti jonoquë.

Jesos icomantëgotëri ira omisantiro obasi.

(Mr 12.1-12; Ir 20.9-19)

³³ Aisati icantaiguëri Jesus:

—Aiti basini nosiacagantëmiro: pingue-maigabaquero. Ainta sërari panguiquero

obasi. Yotanquero. Aisati iquiaque omoro cara iragaticaguitëro oguitso aisati ora irágantëmaro oja. Aisati yobetsiquëro pongotsi oquibiantsa jonoquë ora iranetsantimaro. Aro yogaiguëri omisantineri irobasite, aique iáque jaanta basiniquë quibatsi. ³⁴ Cara omoncaraca cataguiteri cara oragatanë oguitso, igátabecari iromeraro: “Pijáigue, pingampëri ira omisantinero nobasite imagantaiguenaro nasiati”. Aro iáigabitaca. ³⁵ Carari ira omisantiro iniaigabaqueri, yágaigabaqueri. Paniro ipasataiguëri, basini yogamagaiguëri, basini ibasegaiguëri mopëquë yoguipigabitacari. ³⁶ Ira casintaro igátaigabitacari basini iromeraro tojai. Aitosati icantaigabaqueri. ³⁷ Aique iquengasëretaca ira casintaro: “Yamai nagáqueri notomi. Iraniacaninataigabaqueri iriro”. Aro igáqueri itomi. ³⁸ Irari omisantineri irobasite iniobëri itomi inibatobaganaca: “Coraque itomi casintaro. Cara ingamaquenica iriri, iriroquerai ágairone obasi. Intsome ógaigabaqueri, águero obasi asintaigaimaro eiroquerai”. ³⁹ Aro yágaigabaqueri, yáganëri sotoquë obasi, yogamagaigabaqueri. ⁴⁰ Cara iribocapë ira casintaro obasi, ¿Pairo inganqueri iraegui omisantaiguineri?

⁴¹ Yotabitaiguëri saseriroti:

—Cara iriboque, irágaigapëri ira catsimari omisantatsiri, iratsipiriacaqueri, irógaigapëri. Aique irogaiguëri basini omisantineri irobasite, irianti caninari, ira pagantirine iraisati oja oba.

⁴² Aro icantaiguëri Jesus:

—Teco pinibataiguero ora Sanguenari ocanti:

Jirai itsoingaiгуëro mopë ira obetsiquirori mopëpongo, ijoquero tenta irogóiguero cara icoiguëro Tosorintsi iroonti otingomi mopë, otingomi pongotsi, cantaca otingomipoa. Carari yágairo ora mopë, itingomiantacaro pongotsi. Icaninabenquero Atingomi, iniacaninatëro, icantacagajiri matsiguenga cara irogajiro otingomi mopë. Aisati naquenganeintasantëro naroeгуi.

⁴³ Iroro nocomantaguëtaiguëmi: quero piniaiguiri Tosorintsi cara igáanti. Irianti jáiguënguitsine Iriroquë basiniati matsiguenga ira quemisanquerine intingomintaiguëmari Tosorintsi. ⁴⁴ Pairiraca pariaquenguitsine yaca mopëca iricarapë itonguiquë; pairiraca otsinaque oca mopëca onganqueri cantaca pibega pojongabatsari. Naanti osigaro ora mopë otingomi nacantocotaiguëmiro; queroca pigótina, pitsipiriaque; queroca piquemisantina, pijáque Sharincabeniquë. Pairiraca comëtoбënane iripoguiriaquengani.

⁴⁵ Aro iquemaigabaqueri Ira Jesus itingomi saseriroti aisati ira ogameantiro Sanguenari, igóiguë cara Jesus iquenguitsatocotaiguiri irirojegui. ⁴⁶ Iguisaneintaigabitacari, icogaigabitaca irácagantërimе, carari yomitsorogaiguëri matsiguenga igóiguënta matsiguenga cara aisonori Jesus icomantëgotëri Tosorintsi.

22

Jesús icomantëgotëri ira cajemaiguëri

*imatsiguenga cara irágantë itomi.**(Ir 14.15-24)*

¹ Aisati icanque Jesus oca quingabaguirentsica.

² —Nongomantaiguëmi ati ocanta cara itingomibintanti Tosorintsi. Ainta itingomi yobetsiquëneri itomi cara iráquero iina. Icaimaiguëri tojai matsiguenga.

³ Igátabecari iromeraro, icaimagantaigabitacari igaimanejegui, carari te iribocaigue. ⁴ Aisati igátabetajari basini iromeraro icantaiguëri: “Pingantiri nagaimane: ‘Aroque pobetsicaca antagaisati. Yógaiguëri ibaacate aisati iroishate aneri. Popogopë pinganinasëretaigapë’”.

⁵ Carari te inguemaigabaqueri. Iáiguë atiraca. Iáque paniro cara iritoganequë, iáque basini cara imimantagueantë.

⁶ Ainta basini ágobëri iragátane icantaigabaqueri catsimari. Aisati yogamagaigabaqueri basini iragátane.

⁷ Cara igóque itingomi, iguisanaca, igátaiguëri isoraroteegui iboeborotequë. Yogamagaigapëri ira igaimane, aique itagaigapëro ibangopague.

⁸ Aique icanqueri iromeraro itingomi: “Aroque nobetsiquë omagaro, carari te ingomeite nagaimanejegui, te iriboque.

⁹ Pijáigue cara abatsipaguequë, pingaimiri matsiguengajegui, pingantiri: ‘Pijáigue ibangoquë atingomi, pinganinasëretëgotineri itomi águënguitsine iina’”.

¹⁰ Aique iáiguë iromeraropague, icaimaguequeri imatsiguengajegui. Yapatoitaigaca tojai, caninari aisati ira te inganinate. Iagaigaparo pongotsi.

¹¹ Aro iáque itingomi cara irobetsaiguëmari ira bocaigatsi. Iniopëri paniro sërari ira te ingue caninaro iguitsagare. ¹² Yosamitapëri:

“Nomatsiguenga, nopaguetaiguëri nagaimane caninaro quitsagarintsipague arota pinguitsagatima caninasati. ¿Pairo te pinguitsagabiritima obiro?” Te irotopitiri. ¹³ Aro icanqueri iromeraro: “Piguëshotiri ibacoquë aisati iguitiquë, pomisotoguiri sotoquë cara tsitiniriquë. Cara, iraraquma aisati iratsitsiaguitetanë”. ¹⁴ Pinguemina: ainta tojai icaimaigabita Tosorintsi carari te inguemisantiri; arosataanti ira icoigaiguë.

Yogomequeri bariseo Jesus cara inganquineri itingomi ora icoicoqueri.

(Mr 12.13-17; Ir 20.19-26)

¹⁵ Aique iáiguë bariseoegui, yosamitobagaigaca:

—¿Pairo anganqueri Ira Jesus aniantimari? Aroca angantacaqueri ora te onganinate, aro cara anguisëri.

¹⁶ Aro igátaiguëri irogomere aisati ira aguiataiguiri Eroris. Iáiguë icantaigapëri Ira Jesus:

—Ogomeantatsiri, nigóiguë aisonori pogomeantiro Irinibare Tosorintsi, aisati poniaguinaro catinasati atiraca ongantima naretaiguëmari Tosorintsi. Te pintsoroguiri pairiraca. ¹⁷ Yamai pingomantina pairoraca piquianca Obiro: ¿Caninataqueco omëri Sésar aguireguite? ¿Teco onganinate omagantëri cobeingari cara Iromaquë?

¹⁸ Igóque Jesus cara icogaigabitaca iromatobitirime, irantacaguiri ora te ongomeite. Yosamitaigabaqueri:

—¿Pairo picogobiti pomatobitina? Te pinganinate. ¹⁹ Poniaguinari quirequi ira pipëñabentiri Iromasati.

Aro yamaigapëneri quirequi, ira jitacha tenario.

²⁰ Yosamitëri Jesus:

—¿Pai casintaro oca irosiacagomentoca? ¿Pai ijita sanguenatëgotënguicha yaca tenarioica, iroonti iripajiro?

²¹ Yotabitanëri:

—Iroonti irasi Sésar nogobeingarite.

—Icantaiguëri Jesus:

—Aro, pomaigueri Sésar ira icoicoquemi, aisati pomaigueri Tosorintsi ora iraisati, ora icocaquemi Iriro.

²² Iquemaiguëri, iquenganeintasantaiganaca. Aique íaiguë, ijocaignaqueri.

Icantaiguëri saroseo Jesus: “Aisonori angabiritajima”.

(Mr 12.18-27; Ir 20.27-40)

²³ Irooti cataguiteri íatasitaiguëri Jesus saroseopague, ira ijitasitaiga cara quero icabiritaja igamagaegui. Aro yosamitaigapëri:

²⁴ —Ogomeantatsiri, jirai isanguenaque Moisés: Aintaca sërari, carari te irine itomi, aique ingamaqueca, caninataque ireinti irágajiro iina; aroca ontsomaaque itomi, irianti irosiguëma itomi ireintitomaco.

²⁵ Jirai ainta naroequiquë poro sërari, aisati ireinti icarati 6. Yágabitaro iina, carari te irine itomi. Aique icamaque iriro. Aro iina yágairo ireinti.

²⁶ Aisati icamaque iriro, te irine itomi. Aisati icantaigaca ireintiegui yágaigabitaro tsinane icamaiguë

omagaro, teni irinëmate itomi. ²⁷ Aique ocamaque tsinane aisati. ²⁸ Cara ingabiritaigaima, ¿Pairi ágairone? Pinetse, ijinantaigabitaro antagaisati ireintiegui.

²⁹ Aro yotabitanëri Jesus:

—Tojai pamatobitaigaca obiatiegui tenta pigóiguero Sanguenari, teatisati pigóiguero itasorintsite irasi Tosorintsi. ³⁰ Aisonori cara angabiritajima, antimaigae, quero ágai ajina. Antagaisati ira cabiritajachane ingantaiguëmari ibega ironomire Tosorintsi: quero yágai iina.

³¹ Ingabiritaiguëma omagaro camaigatsiri. ¿Teco pinibatiro ora icanti Tosorintsi jirai? Icanque:

³² Naro Tosorintsi. Iquemisantina Abaram.

Iquemisantina Isac. Iquemisantina Jacob. Te ingante: “Iquemisantabequina”. Aroca iquemisanquerini Tosorintsi Abaram, ainta icaniati Abaram. Aisati caniari Isac aisati Jacob. Tosorintsi Irianti Itosorintsite ira caniatatsi.

³³ Cara iquemaigabaqueri tojai matsiguenga, iquenganeintaigaca. Icanque:

—Caninasati yogomeanti Jesus.

Icomantëgotëro Jesus ora obatasti ora icocaqueri Tosorintsi.

(Mr 12.28-34)

³⁴ Ira bariseo iquemocotaiguëri saroseo, cara caninasati yotabitaiganaqueri saroseopague Jesus yoguimairenqueri. Iro ro itsorogaiganaque saroseo cara iraniantaiguëmari aisati. Aro ipocasitaiguëri Jesus bariseopague.

³⁵ Icogaigabitaca iramasitacaguimarime Jesus irinibarequë. Ainta paniro bariseo ogomeantiro Sanguenari, yosamitëri iriro:

³⁶ —Ogomeantatsiri, aiti tojai pogometague-
quina Sanguenari. ¿Pairo obatatsi ora
anguemisanque?

³⁷ Yotabitanëri Jesus:

—Pinintasantiri Atingomi, Irironta Pitosorintsite
pomasëretasantimari obiati, përosati
pinguengeri, pinguemisantantiri.

³⁸ Ocari oca iroro obatatsi cara Sanguenariquë.

³⁹ Ora otsibata, ocanti negaca:

Pinintiri pitimanamitane pibega cara pininta
obiati.

⁴⁰ Aroca pingantaiguëro oca, aro pomoncar-
ataiguëro antagaisati isanguenare Moisés aisati
omagaro isanguenataiguë comantantatsiripague.

Quirisito imatsiguenga David.

(Mr 12.35-37; Ir 20.41-44)

⁴¹ Cara përosati yapatoitaigasega bariseopague,
yosamitaiguëri Jesus:

⁴² —¿Pairo piquengasëretëgotacari Quirisito?
¿Pari imatsiguengataca?

Yotabitaiganaqueri bariseo:

—Iriro matsiguengatacari David.

⁴³ Icantaiguëri Jesus:

—Jirai Isëre Tosorintsi osanguenatacaqueri ira
David; ijiqueri Quirisito “Natingomi”. Isangu-
naque David:

⁴⁴ Ira Tosorintsi icanqueri Natingomi: “Pisobigue
yaca nobacosonoriquëca. Pintsibatina
nagáantomentoquë irooti cara nagabeiri
antagaisati ira quisaiguëmi, irajitaiguëmi
Itingomi”.

⁴⁵ Iriroca Quirisito Itingomi David, ¿Pairo pijitobitaiguëri Iriro imatsiguenga David? ¿Pairo te pijitobitaiguëri Pitingomi obirojegui aisati?

⁴⁶ Aro Jesus yoguimairentasantaiguëri bariseo irooti cara te pairi otabitirine. Itsorogaiganaque aro te irosomitaigairi aisati.

23

Jesus yogometaiguëri matsiguenga ati icantaiga ira ogomeantiro Sanguenari aisati bariseoegui.

(Mr 12.38-39; Ir 11.42-46; 20.45-46)

¹ Aique icantaiguëri Jesus ira imatsiguengajegui aisati ira irogomere.

² —Iraegui ogomeantiro Sanguenari aisati ira bariseoegui ijitasitaigabita aisati icantaigari Moisés: yogomeantaguequero isanguenare Moisés.

³ Caninataque pingantaiguero ora yogometaiguëmi, carari quero poguiatiri aroquenta icantasitaigacaro irinibare, tenta ingantiro iriati ora icomantaigabitëmira. ⁴ Tojai yobomirintsitaiguëmi cara picanquero ora yogometaiguëmi, carari te iromitocotëmatimi iriati.

⁵ Antagaisati icantagueti iriro, icantasitaigaro arota irianicaninataiguëri imatsiguenga. Yogasitaro arosata Sanguenari cara ichotaiquë aisati ibacoquë. Aisati

yobetsicasitaigacaro oquibesonori ogarasiquë iguitsagarepague arota irianicaninataiguëri matsiguenga, ingantocotaiguëri: “Caninari bariseo aisati ira ogomeantiro isanguenare Moisés, iquemisantasantaguëro”. ⁶ Aisati cara yapaigui icogasantaiguë intsibataiguëmari itingomipague,

aisati cara yapatotaiga jorío icogasanti irisobicomento caninaro. ⁷ Icogasantaiguë irobetsataiguemari matsiguengajegui cara opimantagani pairoraca, irobetsataiguemari: “Ogometinari”. ⁸ Carari obiuro, quero picantari. Quero picogui irajitimi “Ogometinari”, panironta ogometimiri, Naanti. Aisati picantobagaiga, pijitobagaiganaca: “Nopiguemisantane”. ⁹ Aisati yaca quibatsica, quero pijitasitari piri pairiraca, panironta Piri ini cara Jonogaguetequë. ¹⁰ Querootisati pinintacaguiri irajitimi “Natingomi”, panironta Pitingomi, Irianti Quirisito. ¹¹ Pingoqueca pintingomintima, aro caninataque pobatacaguiri ira basinipague, pomitocotaiguëri iriro. ¹² Pairiraca quingachane caninari, irajiquima obatatsi, aro Tosorintsi iraguipasiguitëri, inganqueri carantatsiri. Aisati ira carantatsi, inganqueri obatacagantatsiri cara inguemisantasantëri imatsiguenga.

Jesos isintsitsataiguëri ira ogomeantiro isanguenare Moisés aisati bariseo.

(Mr 12.40; Ir 11.37-48; 20.47)

¹³ Icantaiguëri Jesos:

—Obirojegui ogomeantiro Sanguenari aisati obirojegui bariseo, tojai ingasitígataiguëmi Tosorintsi tenta pinintacaguiri pairiraca iraretima cara iragáantanequë Tosorintsi, teatisati pijáigue obiuro. ¹⁴ Tojai pamatobianti. Aisati tojai ingasitígataiguëmi Tosorintsi aroquenta págabitsaquero obango ogamaimentaga iroontita pamanocotasantatsitari Tosorintsi arota iraniacaninataiguëmi pomatsiguenga.

Tojai iratsipiriacagaiguëmi. ¹⁵ Tojai ingasitígataiguëmi. Popomirintsibentaigari basini, pogometaguetaiguëri cara iromatobiantë aisa ingantaiguëmi pibega obiro. Yabisanaquemi iriro. Pamanocotasitaigari Tosorintsi obiro, carari te pingantiro caninaro; aisati yamanocotasantasitaigari pogomere, teatisati ingantiro caninaro. Aisa icantimi, icanquero ora iriátanquima Sharincabeniquë.

¹⁶ Ingasitígataiguëmi obirojegui. Aisa pingantimari ibega comarajari oniagasitari imatsiguenga comarajari negaraca pini abatsi. Picantasitaro: “Aroca inganque poro, ‘Iroontita pinë ibango Tosorintsi, pigóontimaro quero namatobitimi’, aro caninasati yamatobiantë. Carari aroca inganque, ‘Iroontita inë oro cara ibangoquë Tosorintsi, pigóontimaro quero namatobitimi’, aro aisonori iromoncaraquero irinibare”.

¹⁷ ¿Pairo picantobitaiga negaca? Te pininte pigóigue ora caninari. Ora ibango Tosorintsi ocaninatasanti, aisati ira oro caninari aroquenta poganinatëri ibango Tosorintsi. ¹⁸ Aisati picantasitaro: “Aroca inganque matsiguenga, ‘Iroontita pinë cara atagantëneri Tosorintsi obira, pigóontimaro quero namatobitimi’, aro caninasati yamatobiantë. Carari aroca inganque, ‘Cara ini obira omapëneri Tosorintsi arota ataquineri, aro pigóontimaro quero namatobitimi’, aro aisonori imoncaraquero irinibare”.

¹⁹ ¿Pairo picantobitaiga negaca? Te pininte pigóigue ora caninaro. Ocaninatasanti ora atagantëneri Tosorintsi ibatsa obira. Aisati icaninati ibatsa aroquenta poganinatëri ora atagantineri.

20-22 Pinetsaigue. Tojai picantaiguë: “¿Teco ine atagantineri Tosorintsi aisati ora inatsi jonoica?” “¿Teco ine ibango Tosorintsi aisati Iriro tso maguira?” “¿Teco ine Jonogaguite aisati Iriro sobicatsi cara iragáantomentoquë?” Picantasitaro pairorapagueraca pijitasita caninataque pomatobitaigueri pomatsiguenga. Pijitasita ¿Teco intime Tosorintsi? Aisonori itimi, igóque ora picantaguëti, ingasitígataiguëmi.

²³ Obirojegui ogomeantiro isanguenare Moisés aisati obirojegui bariseo, ingasitígataiguëmi Tosorintsi pamatobiantinta. Pinetse: picantaguëtaigabitacari. Aroca páguë quirequi 10, aro pomabaqueri paniro irasi Tosorintsi. Aroca páguë 10 osi pobanguirepague, aro pomabitëmari patiro osi. Carari te pinguengaiguero ora icocagasantaigabitimi Tosorintsi: icogabeca pintimeme caninasati, icogabeca pingantaneintëgotirime pomatsiguenga pingábintserime, icogabeca pinguemisantirime aisati pomoncaratirome pinibare. Caninataqueme pingantaiguerome antagaisati ocapague; aique aroca páguë pairoraca ocarati 10, patiro pomëri Tosorintsi.

²⁴ Te pigótëmataigue, carari picogabeca pogometaiguerime matsiguenga Irinibare Tosorintsi. Aisonori tojai popomirintsitasantabitacaro ora cagaro icocaquimi Tosorintsi, iroro cantënguicha te pinguengatëmataigueri ora icocagabequimi.

²⁵ Ingasitígataiguëmi obirojegui Tosorintsi tojainta pamatobianti. Piquibasantëro pitasane otisitaquë, carari te pinguibatetiro tso maguitinina; cara osititëti. Aisa picanta

obiro, poganinatasita arota iraniacandinataguemi matsiguenga, carari te piganinasëretima pisërequë. Përosati picositanti aisati pamtobianti. ²⁶ Te pigóigue. Aisati picantari ira te iranee. Obitsita quibatequerone tsoaguete, aique quero oquebatsitaji otisitaquë. Aroca piganinasëretëma, aro iraniacandinatëmi aisonori matsiguenga. ²⁷ Obirojegui, bariseo aisati ogomeantiro isanguenare Moisés, ingasitigataiguëmi Tosorintsi pamtobiantinta. Aisati picantaro yogantari camatsirini, ibotsotiro catari. Ocaninatabitaca sotoquëranti carari tsoaguete quimngaro isititi, jagaca itonguiporoqui. ²⁸ Iniacandinatabitacaro matsiguenga ora picantaguete carari te pinganinasërete: tojai pamtobianti aisati tojai pintapinintiro ora te ongomeite. ²⁹⁻³⁰ Ingasitigataiguëmi Tosorintsi tojainta pamtobianti obirojegui. Jiraissonori pomatsiguenga ógaiguëri ira comantabitari Irinibare Tosorintsi, Ira caninari. Yamai pobetsicaiguëro pongotsipague pinguengantëmari comantantatsiri. Aisati picantasitaiga obirojegui: “Nantimeme naati jirai, quero nóguirime, quero nacantarime nomatsiguenga ógueri”. ³¹ Picanque: “Nomatsiguengatacari jirainisati”. Aisonori picantaiguë, irootisatinta pintaiguë cantacha irasi jirainisati. ³² Aisati posigari pomatsiguenga jirai, obirojegui ógueri aisati. Ora iparintaca jirai, picantaiguë obiro yamai. ³³ Picantaigari marangue; pamasiqueri ira basini. Picantaguetasanoti tojaipague ora te onganinate, te pinganinatëmataigue. ¿Pijiqueco quero piáigui Sharincabeniquë? Aisonori pijáiguë canta.

*Icomantëri Jesus: “Ingasitígataiguëmi Tosorintsi”.
(Ir 11.49-54; 13.34-35)*

³⁴ Përosati icanque Jesus:

—Aiquenta nagáquemiri basini comantantatsiri, ogótatsiri, aisati ogomeantirone Irinibare Tosorintsi. Nigótaiguëmi, ainta ira pógagantaiguë, basini popëicotaiguëri, popasataiguëri basini cara papatotaiga, aisati pinguisaiguëri basini negaraca iriátagueque. ³⁵ Ainta picantaguëti, picogaiguinta pigamagaiguëri antagaisati caninatatsiri. Jirai póguëri Abel, aisati basini tojai. Aisati pogamaguëri Sacarías, itomi Berequías, iroontita iquemisantacagabecari imatsiguenga cara ibangoquë Tosorintsi. Pintimaigueme obirojegui jirai, aisati póguëtime. Pasi poguiro póganti. ³⁶ Aro Tosorintsi ingasitígatëri omagaro ira cogaigatsi iróguiri basini. Aisati ingasitígatëmi obirojeguinta óguëri. ³⁷ Joo, obiro Jerosaresati. Tojai pógapinintiri ira quinguitsatocotaiguimiri Tosorintsi, aisati pobasiaqueri mopëquë ira igáquemi. Aisa ocanta tiapa omisantiri ojaniquite itiomijani, ocábintsaiguëri, aisati nocogabeca Naro nangantimaro, nangábintsaiguemime, carari te pinintaigue pinguemisantobëna. ³⁸ Pijitasitaiga Jerosarén caninaro, carari nojocanëmi Naro, aisati irojocanëmi Pabati Tosorintsi quero inomotajimi. ³⁹ Quero piniaigaina aisati irooti cara piniaigabaquina nopocaje aisati nantingomibintaigapëmi, pingantocotaigabaquena: “Coraque Ira igáque Atingomi. Icaninatasanti Iriró”.

24

Icanque Jesus: “Aiquenta irogomeriguëtëro ibango Tosorintsi”.

(Mr 13.1-4; Ir 21.5-7)

¹ Aique isotocanë Jesus cara ibangoquë Tosorintsi, iáque. Ipocasitaiguëri irogomere, ijigotaiguëneri ibango Tosorintsi aisati pongotsipague otsibataro. ² Aro icantaiguëri Jesus:

—¿Piniaigabitacaró ora pongotsipague? Aisonori nongomantëmi oca: aiquenta irogomeriguëtëro antagaisati. Irogaguëtajiro. Quero pini yaca pite mopë otsibatobagaa.

³ Aique iáiguë itonganaque oguitojaquë jitacha Olibos. Isobigopë Jesus. Aro comanoroni yosamitaigapëri irogomere:

—Pingomantina: ¿Ati ongantima cara irogomeriguëtëro orapague pongotsi? ¿Pairo ogótacaquinane ati ongantima cara popogopae? ¿Ati ongantima omoncaraquima antagaisati oca picantaiguënaca?

Icomantaiguëri Jesus: “Aiquenta iribocaiguë tojai matobiantatsiri”.

(Mr 13.5-8; Ir 21.8-11)

⁴ Aique yotabitanëri Jesus:

—Arotasha pine quero yamatobitimi.

⁵ Iribocaiguë tojai, ingampë: “Naro Quirisito”. Iromatobitaigapëri tojai matsiguenga.

⁶ Pinguemopiantërota inganque: “Yomanátobacani canta”. Inganque basini: “Aiquenta iromanátobaguima canta jaanta”. Carari quero pogasëreta: tojai irógobaquima, carari queroquerai omoncarata omagaro nacantaiganaquemi.

7 Aiquenta inganquima matsiguenga inguisaiganaqueri basiniati matsiguenga, inguisëgotobagaiguëma irógobaquima. Aitosati iritasegaiguë tojaisonoru matsiguenga. Aisati ontojaiganaque janatigantsipague. Tojai osebataguetanëma omagaroguitequë quibatsi. Iratsipiriaiguë matsiguengapague, ⁸ iroro cantënguicha queroquerai yobomirintsitasantiri matsiguengajegui. Aiquenta coraque agabenisonori.

*Tojai inguisaguetëri quemisantatsiri.
(Mt 10.17-22; Mr 13.9-13; Ir 21.12-19)*

⁹ Aisati icomantaiguëri irogomere Jesus:

—Aroca irogóiguë matsiguenga piquemisan-taiguëna, ingantobitaiguëmiro catsimari, irógarantaiganaquemi, inguisaiganaquemi antagaisati matsiguenga. ¹⁰ Ainta tojai irojocajiro cara iquemisantabeca, aique inguisaiguëri ira quemisantatsirisonori, irácagantaiguëri. ¹¹ Ingonijapë tsoengantatsiri, ingantaigabitëma: “Nanguemisantacagaiguëmi”, carari iromatobitaiguëri antagaisati quemisantabetachari. ¹² Tojai ingantaguequero te ongomeite, aisati tojai irojocajiro cara inintobagaigaca. ¹³ Carari nagabisaicotajiri antagaisati ira quemisantaiguënane përosati. ¹⁴ Pijátagueque antagaisatiquë quibatsi, pingomantaguequetaigueri omagaro matsiguenga oca Caninaro Nibarintsica, cara nocogui intingomintaiguena; aique omoncaraquima antagaisati oca nacantaiguëmica.

*Aisati icanque Jesus: “Aiquenta imomirintsi-taiguë Joreasati”,
(Mr 13.14-18; Ir 21.20-24)*

¹⁵ Aisati icomantanque Jesus:

—Jirai isanquenaque comantantatsiri jítacha Daniel:

Aiquenta ingapë cara ibangoquë Tosorintsi ira quimingarisonori cantaguetasantatsi ora te ongomeite, iraguimingatëro antagaisati.

Pigóiguero Sanguenari. Cara piniaguërica ira nocomantëgoti yamaica inganaque ibangoquë Tosorintsi, ¹⁶ aroca pitimi cara Jerosarénquë pisigaiganaquima otisipaguequë. ¹⁷ Aintabica obiro jonoquë pobango, quero piápanënti tso magui págapanëntiro ora pasinta; iroonti pisigasantanëma. ¹⁸ Aroca pinë pitoganequë, quero pipigasitapanaantaro basini piguitsagare. ¹⁹ Tojai otsipiriaiganaquero tsinane ora pë nibatatsi aisati ora tsotagatsi ojaniquite queronta pisigasantanaca. ²⁰ Pomanocotiri Tosorintsi arota quero pisigaiga cataguitëriquë omarigantetetica angani, querootisati cara sábaroquë cara pamagoriaigui.

Icanque Jesus: “Tojai iratsipiriaiguë antagaisati ira timaiganaquenguitsine”.

(Mr 13.19-23; Ir 17.22-24)

²¹ Aitosati icanë Jesus:

—Aique tojai iratsipiriasantaiguë matsiguenga. Iratsipiriasanoiguë abisëro ora itsipiriaiguë matsiguenga jiraisonori irooti yamaica, aisati abisëro omagaro inanënguitsine aiquenta. ²² Aroca ongosamanitanëme cara iratsipiriasanoiguë

opoguiriaiguëri omagaro matsiguenga ingamaque, carari Tosorintsi ingábintsaiguëri antagaisati quemisanqueri iraegui icoiguë, arota quero ocosamaniti atsipiriagantsi. ²³ Aintaca paniro cantatsi: “Iriro Quirisito Ica”, quero piquemisantiri. Aisati inganquemica: “Intsome canta Quirisitoquë”, querootisati poguiatiri. ²⁴ Coraque iribocapë tojai matobiantatsiri ingampëmi: “Naro Quirisito”. Aisati iribocapë basini inganque: “Naro comantëmirine Tosorintsi”. Tojai iritosongantë, ingoque iromatobitaiguëri tojai matsiguenga, carari quero yamatobitiri ira quemisantasantatsi ira icoiguë Tosorintsi. ²⁵ Piquemaquena yamai nocomantaiguëmi atiraca ongantima aiquenta queroquerai ini. ²⁶ Aroca inganquemi: “Ainta Quirisito cara tera ontimingani”, quero piquemisantiri. Aitosati, aroca inganque: “Ainta tsomagui pongotsi”, quero piquemisantiri. ²⁷ Nopaniaca Jonogaguitequë, nomatsiguengatapë. Cara omabocapái tegotsitanatsi moretatsiri, osangueguitetanëro omagaro jonoquë, aisa nangampaima Naro cara nopogopae quibatsica. Nomabocaigapairi, carari iraniaigabaquina antagaisati. ²⁸ Atiraca ini igamaga, aito cara imarigasipëri tisoegui. Aisa ocanta tojainta itsoinganti joríojegui, iroro iribocasitaguëtaiguëri tojai matobiantatsiri.

*Ati ingampaima cara iribocapae Jesus aiquenta.
(Mr 13.24-27; Ir 21.25-28)*

²⁹ Aisati icomantaiguëri irogomere Jesus:

—Aro tojai iratsipiriasantaiguë antagaisati matsiguenga, omomirintsitomotaiguëri. Cara abisanaque atsipiriagantsi, aique intsitinitanë paba, aisati quero iconijaguitetanai manchacori. Aitosati imariaguepë jonogasati, aisati osebatanëma omagaro jonoquë.
³⁰ Aique nongonijapë Naro cara jonoquë, iragasëretocotaigabaquina antagaisati tsoengatsiri. Iraniaigabaquina cara nopogopë mingoriquë. Nosanguemitetaigapëri nongobeingatasanotapë nagáantaiguëri omagaro Naro paniacha Jonogaguítequë, nomatsiguengatapë.
³¹ Aisati nagátaigapëri nonamireegui intibotë catsiguesonori irapatoitaiguëri antagaisati quemisantaiguëna iraegui igoigane Tosorintsi atiraca itimagueti quibatsiquë.

*Yosiacagantaiguëneri iguera Jesus.
 (Mr 13.28-31; Ir 21.29-33)*

³² Aisati icantaiguëri irogomere Jesus:

—Yamai nosiacagantaiguëmiro anchato jitacha iguera: pinguengasantiro. Cara iroraini otsego, ositanae osi, aro pigóiguë pënibaque osariganaje.
³³ Aisa ocanta, cara piniaigabaquero oca nacantaiguëmica yamai, pigóiguë pënibaque orequima cataguitერიquë cara nopogopae. ³⁴ Nanganquemi aisonori: queroquerai icamaigui joríojegui tsoengatsiri cara queroquerai omoncarata oca nocomantaiguëmica. ³⁵ Omeganëma omagaro ora inatsi jonoquë aisati omeganëma oca quibatsica, carari quero opega nasi nanibare irooti cara omoncaraquima omagaro ora nacantaiguëmi.

*Te ogótengani atiraca ongantima cara iribocapae
Jesos.*

(Mr 13.32; Ir 17.26-30, 34-36)

³⁶ Aisati icanque Jesos:

—Te irogóte pairiraca atiraca ongantima nopocaje Naro. Te irogóigue ironomireegui Tosorintsi. Nipoque, nomatsiguengatapë carari teatisati nogóte Naro. Paniro igóti Pabati. ³⁷⁻³⁹ Jiraisonori, cara itimi Noé, yapapinin-taiguë imatsiguenga, isinguitapinintaigaca, yágapinintaiguëro iina, itimabeta aisa ocanta itimaigabitaca omatsiguenga yamai. Te inguemisantaiguëro cara icamanaaigabitacari Noé: “Coraque onangasantapëma”. Aro yotetanaca Noé pitotsiquë, yasitocoqueri. Aique omabocaigacari matsiguenga angani, ponangasantanaca, pitsongaiguëri, itsiticaiganaque. Aitosati inganquima yamai matsiguenga, atiraca ongantima nopocaje Naro, quero iquemisanti, nomabocaigapëmari. Aique iratsipiriaiguë antagaisati tsoengatsiri. ⁴⁰ Aintaca piteni sërari cara togantsiquë, paniro náganë nantsibatanëmari, irari itsipa quero náganëri. ⁴¹ Aintaca pite tsinane mitoquirori singui, náganëro paniro nantsibatanëmaro, orari otsipa quero náganëro.

Icanque Jesos: “Piguaiguena”.

(Mr 13.33-37; Ir 12.41-48; 21.34-38)

⁴² Përosati icanai Jesos:

—Piguaiguena, pinguenguena, tenta pigóigue atiraca ongantima cara nopogopae. ¿Nomabocaigapëmica? ⁴³ Aisa icanta casintaro

pongotsi, icositaguētiri. Aroca irogóqueme atiraca ongantima iriboquē cosirinti, ingaguitēme, quero inintacagūiri icositiri. ⁴⁴ Aisa nacanta Naro. Pinguenguena piguiaiguena. Queroca piquenguina, aro nopocaje nomabocaigapēmi. ⁴⁵ Pingantimari ibega caninari iromeraro casintari, igótasanti, igáanti basini iromeraro itsipa. Icanqueri ibatorote: “Obiro, pinganquineri basini arota popaagūiri caninasati”. Aique iáque. ⁴⁶⁻⁴⁷ Aroca iraniopēri iromeraro cantatsi caninasati, aro ingampēri ibatorote: “Caninasati picantaguētiro ora nococaquemi. Yamai nocogui pomisantasantiro omagaro ora nasinta, nigótinta yamai quero pamatobianti”. Aro inganinasēretē iromeraro. ⁴⁸ Carari quero picantari ibega basini iromeraro te inguemisantiri ira ibatorote, inganqueca: “Yamai játaque ira meratinari, querojengari ipigapaa omanapague”, ⁴⁹ aro inguisēri basini iromeraro itsipa, ingapojapinintiri, irisinguitopiantēma. ⁵⁰ Aro ira ibatorote iromabocapēmari iromeraro te ingomeite, tenta iragueiri. ⁵¹ Aro ingasitígatapēri, iragáqueri intsibataiguēmari matobiantatsiri. Canta, iragasēretasantēma, iraraquima, iratsitsiaguitetanē. Quero picantari ibega iriro, irari posiguima caninari iromeraro quemisanqueri ibatorote.

25

Icomantēgotiro Jesus 10 tsinane terai ágante.

¹ Aisati basini icantaiguēri irogomere Jesus:

—Yamai nosiacagantëmiro aisati ati ocanta iragáantane Tosorintsi. Aintaca 10 tsinane terai ágante. Ocogaiguë otonguiboquimari ojime otsipa aisati ontsibataiguëmari cara jiesitaquë. Aroque otsitinitanë, aro áganëro omicherotepague. ² Pabocorooti tsinane ogótatsiri; ora basini pabocorooti te ogóigue. ³ Oraegui te ogóte páganëro omicherote carari te áganë oja ora obotacagajimarone. ⁴ Oraegui ogótatsiri páganëro omicherote aisati páganë oja oboontaimaro. ⁵ Tenta iriboque omanapague ojime otsipa, opotsiquitaiguë pisamaiganaque. ⁶ Aro aganguite oquemaigabaqueri icaimaigapëro: “Coraque pijimetsari, pijáte pitonguiboguintimari”. ⁷ Omanapague ocaguitaiganaque 10 tsinane, pobetsicanëro omicheroeguite. ⁸ Aro ora te ogóte ocantabecaro ogótatsiri pabocorooti: “Pomabaquina arosata oja pasi; otsibaqueca nomicherotepague”. ⁹ Potabitaiguëro ogótatsiri: “Quero. Quero cotonguiboro oja naro aisati obiro. Aroca nomëmi naro, aisati otsibacanë nasi nomicherotepague. Pijáigue pomanantanontima pasi obiro”. ¹⁰ Iroontita piáigue omanantaiguë, yareca ojime otsipa. Otsibataigacari cara pongotsiquë iroro pabocorooti tsinane ogótatsiri aisati basini igaimane, icaigapë yapaigapë. Yasitocoigaca sitëcoriquë. ¹¹ Aique paretaigapaa ora tsinane te ogóte, ocantaigabitapaari: “Pisirenaro naro aisati, naniaigapaimi”. ¹² Carari yotabitobëro tsomagui: “Quero. Teni nogóiguemi pairiraca obiro. Te naninte popocasitina yaca”. ¹³ Pinguengasëretimaro oca nosiacagantëmica.

Pigamema, tenta pigóigue atiraca ongantima cara nopigaima.

Icomantëgotëri ira omitojaiguëneri iguireguite casintari.

(Ir 19.11-27)

¹⁴ Aitosati icanque Jesus:

—Aisati basini nosiacagantëmiro ati ocanta iragáantane Tosorintsi. Aisa ocanta sërari játénguitsine jaanta basiniatiquë quibatsi: queroquerai íáti icaimaiguëri iromeraroegui, icomantaiguëri: “Nanintini pomisantinari naguireguite”.

¹⁵ —Icanqueri paniro: “Jerica pabocorooti iguibe quirequi tojai iripënaró. Pomisantinari”. Icanqueri basini: “Jerica pite iguibe quirequi tojai iripënaró. Pomisantinari”. Aisati ipabaqueri basini iromeraro paniro iguibe quirequi tojai iripënaró iromisanquineri. Paniro ipëri tojai, irironta ogótasantsiri. Ira basini ipëri arosata tenta irogótasante. Aro ipaguetanëri, aique íáque canta jaanta basiniquë quibatsi. ¹⁶ Ira águëri tojai quirequi íáque yamanantë ipimantë. Yomitojaigasantëneri iguireguite ibatorote, icarati pabocorooti aisati. ¹⁷ Aisati itsipa águëri pite íáque, yamanantë, ipimantë, yomitojaigasantëneri, yáguë basini pite. ¹⁸ Irari águëri paniro, íáque iquiaquero omoro, imánaquineri iguireguite ibatorote quibatsiquë. ¹⁹ Aiquenta ipigapaa ibatorote, icaimaigapëri iromeraro: “Yamai pomapëneri naguireguite”. ²⁰ Ipoque ira águëri pabocorooti, yamapë aisati basini pabocorooti, icanqueri ibatorote: “Jerica

piguireguitte popanaquina jirai. Namanantë, nopimantë tojai, aro nomitojaiguëri. Jerica basini, aisati icarati pabocorooti”. ²¹ Aro icanqueri ibatorote: “Caninataque picantasantëro ora nococaquemi. Cani nopanaquemiri arosata pomisantënari caninasati, yamai nocogui pomisantinari tojai basini. Aisati naninti tojai pinganinatomotina naro”. ²² Aique ipoque ira águëri pite, yamapë aisati basini pite, icanqueri ibatorote: “Jerica piguireguitte popanaquina jirai. Namanantë, nopimantë, tojai nomitojaiganaqueri. Jerica basini, aisati icarati pite”. ²³ Aro icanqueri ibatorote: “Caninataque picanque ora nococaquemi. Cani pomisantënari arosata. Yamai naninti pomisantinari tojai basini. Aisati nocogui tojai pinganinatomotina naro”. ²⁴ Aique ipoque ira ágabitënguicha paniro, icanqueri ira ibatorote: “Nobatorote, nigóquimi obiro, te pingábintsante, notsoroguemi. Najique aroca nomitojaiganaquemirime piguireguitte, págabitsaquinari omagaro. Iroro te nomitojaigaguëtiri. ²⁵ Nitiaqueri antagaisati. Jerica naguipigaimiri ira pasi”. ²⁶ Yotabitëri ibatorote: “Te pinganinate. Tojai poperataca. Pigótabeca nocogabeca naro pomitojaiguenarime naguireguitte. ²⁷ ¿Pairo te pomabiritiri ira ogapinintiri quirequi? Pomairime iriro, iripënabentainarime nágantajimarime basini. Iraguipigainarime omagaro nasi”. ²⁸ Aro ibatorote icanqueri basinipague: “Págabitsatiri naguireguitte, pomeri ira omisantinari caninasati, aroquenta cani yomitojaiganaqueri pabocorooti

iguibe quirequi irooti cara yáguë basini pabocorooti. ²⁹ Iriro nomasantë inomotiri tojai, irari inatsi arosata iriro nágabitsaque. ³⁰ Yamai páganëri ica cara otsitinitasanti cara iraragasëretasantima aisati iratsitsiaguitetanë”.

Jesos icanque cara aiquenta ingomantëgotaiquëri omagaro matsiguenga.

³¹ Aisati icomantë Jesos:

—Nopaniaca Jonogaguitequë, nomat-siguengatapë. Aiquenta najátaje, nopigaima aisati. Intsibataigapëna tojai ironomire Tosorintsi irisaanganetsite. Nosobigopë nagáantomentoquë, nantingomibintaigapëri omagaro matsiguengajegui. ³² Nopatotaiguëri antagaisati matsiguenga, negaraca itimagueti. Naro aisati nanganquimari ibega ira casintari ibira inaguri casiriconiati iroishate aisati igábarate. Aisati Naro ninaqueri casiriconiati ira quemisanquina aisati ira tsoengaiguina. ³³ Nanganqueri ira quemisantaiguëna: “Popocaigapë yaca nobacosonoriquëca”. Nanganqueri ira tsoengaiguina: “Popocaigue yaca nomatepacoquëca”. ³⁴ Aique nongomantaigabaqueri iraegui nobacosonoriquëni: “Omana, inganinatagaiguëmi Pabati. Jiraisonori yobetsiquëmiro iragáantane arota pintiomotaiguëri. Yamai pijáigue pingarataiguëri. Caninataque irobabintaiguëmi. ³⁵ Cara nitaseguë, popëna noperi. Cara nomiretë, popëna nomire. Te pigótaigabitina iroro cantënguicha pobangopaguequë pogasomabaquina. ³⁶ Te ine nomanchaqui jirai, obiro paiguënaró.

Najanaitënti, obiro bocasitaiguëna. Yomianquina cara iromingamentoquë, pipocasitaiguëna picábintsaiguëna”. ³⁷ Aique irosomitaiguëna ira caninataigatsiri: “Natingomi, ¿Atiraca ocanta cara pitaseguë, cara napaagaiguëmi? Teni nanguengüero. ¿Atiraca ocanta cara pomiretë cara nopaiguëmi pomire? ³⁸ ¿Atiraca ocanta cara nacábintsaiguëmi nobangopaguequë? ¿Atiraca ocanta cara nopabaquemi pomanchaqui? ³⁹ ¿Atiraca ocanta pijanaitë, aisati yomianquemi, niátasitaiguëmi? Teni nanguengaiguero”. ⁴⁰ Aro notabitaiguëri: “Aisonori nangantasantaguëmi: cara picábintsëri paniro quemisanquina, aisati picábintsëna Naro”.

⁴¹ —Aique nangantaiguëri ira nomatepacoquëni: “Yamai pijáigue canta Sharincabeniquë, cara tsitsiquë ora te otsibague. Yobetsiquëro Tosorintsi jiraisonori; yobetsiquëneri Satanás, cara iriáiguë camagari, aisati antagaisati ira aguiataiguëri. Yamai pingarataiguëri canta iriro aisati obirojegui. ⁴² Jirai nitasegabitaca, te pomaiguena noperi. Nomiretabitaca, teatisati pomaiguena nomire. ⁴³ Naquenagueque, te pomena jatasintsi ora nasamantëma. Te ine nomanchaqui, carari te pomasitaiguenaro Naro. Najanaitë, te popocasitaiguena pinetsaiguena. Cara yomianquena iromingamentoquë teatisati popocasitaiguena”. ⁴⁴ Aique irosomitaiguëna: “Natingomi, ¿Atiraca naniaigabitëmi cara pitaseguë, cara pomiretë, cara te ine pomanchaqui, cara te ine negaraca pisamë, cara pijanaitë, cara yomianquemi, cara te

nomitocotaiguemi”? ⁴⁵ Aro notabitaiguëri: “Aisonori nangantasantaiguëmi: cara te pingábintseri ira quemisanquina, teatisati pingábintsena Naro”. ⁴⁶ Aique iraegui nomatepacoquëni iriáiguë cara Sharincabeniquë përosati ingasitígataiguëri Tosorintsi. Irari iraegui caninataigatsi iriáiguë cara Jonogaguitequë, intiomotaigapëna përosati.

26

Yosamitobaca jorío: “¿Ati anganqueri cara ágagantëri Jesus?”

(Mr 14.1-2; Ir 22.1-2; Jn 11.45-53)

¹ Tojai icomantanque Jesus, aique icanqueri irogomere:

² —Pigóiguë ongaraque pite cataguiteri omon-caraquima cataguiteri jitacha Pásicoa. Nopaniaca Jonogaguitequë nomatsiguengatapë, carari irácagantaiguëna iribëquëgotagantëna.

³ Aro yapatotaigaca itingomipague saseriroti aisati ira ogomeantiro isanguenare Moisés aisati jorío antiasiparipague. Yapatoitaigaca cara ibangoquë itingomi saseriroti, ira jitacha Caijás.

⁴ Yosamitobaca:

—¿Ati anganqueri cara ágagantëri Jesus agama-gaiguëri?

⁵ Aisati iquengaigaca:

—Quero águiri jiesitaquë. Iriro iniacaninataiguë matsiguenga. Aroca águëri inguisaigacái eiroegui.

Oshaguëantacari casangajengaro Jesus Betani-asato.

(Mr 14.3-9; Jn 12.1-8)

⁶ Aique yogaganaca Jesus canta Betaniaquë, Iriro aisati irogomere. Ainta ibangoquë Simón, ira iribatsasebaguitaga jirai. ⁷ Yapasiguini Jesus aro pipogopë tsinane. Pamëgotasitapëri asaiti casangajengaro ora pënatacha tojai; pinantaro pobetsicagani mopë sibitaro jitacha aribásitoro. Pisataicoquero oshaguëantacari Jesus iguitoquë. ⁸ Aro iguisëgotaiganacaro irogomere Jesus, icanque:

—¿Pairo paparaabiriquero casangajengaro?

⁹ Caninataqueme omimantërome casangajengaro águëtime tojai quirequi omëtime tojai ira coguitiacha omitocotaiguëtime.

¹⁰ Yotabitaiguëri Jesus:

—¿Pairo picantobibiriquero oca tsinaneca? Patiro ocanquinaro caninaro. ¹¹ Përo cara irine obirojeguiquë ira coguitiachari te irine iguireguita; cara pinintica pomitocotaiguëri iriro. Carari quero nini Naro përosati yaca.

¹² Ocabëna caninasati. Oshaguëantobënaro queroquerai iteina. ¹³ Aisonori nangantaiguëmi: aiquenta pinguenagueque omagaroquë quibatsi, pinguenguitsatomotaguëtaiguëri matsiguengajegui Caninaro Nibarintsi. Aitosati pingomantëgotiro oca tsinaneca arota irogótocotiro matsiguengajegui.

Joras iquianca irácagantëri Jesus.

(Mr 14.10-11; Ir 22.3-6)

¹⁴ Aique iáque paniro irogomere Jesus. Ijita Joras Cariotisati. Íatasitaiguëri itingomipague saserioti,

¹⁵ icantaigapëri:

—Aroca nágagantëri Jesus, ¿Aro popënabenquina? Yotabitëri:

—Jee, nomaiguëmi quirequi.

Aro ipaiguëri quirequi iguitso icarati 30.

¹⁶ Aique ipigapaa Joras, inetsasantëri Jesus arota irogóontimari atiraca ongantima irácagantëri.

Yobetsiquëneri Jesus cara icarantacaró yapë. Aisati Jesus icomantëgotëri ira ágagantërine.

(Mr 14.12-21; Ir 22.7-13, 21-23; Jn 13.21-30)

¹⁷ Pareca Pásicoa cara yametaiga joríojegui yapaigui pan te ingonaguero ora piponganta. Iátasitaiguëri Jesus irogomere, yosamitaiguëri:

—Natingomi, ¿Nega pininti nobetsiquëmiro cara popë Pásicoaquë?

¹⁸ Icantaiguëri Iriro:

—Pijáigue cara Jerosarénquë; cara, piniaigapëri matsiguenga, pingantiri: “Ícanque Ogometinari: ‘Pënibaque nomoncaraquero omagaro. Nanintini nopaiquë Pásicoaquë cara pobangoquë, Naro aisati nogomerejegui’ ”.

¹⁹ Aique íáiguë irogomere, iniaigapëri sërari. Yoniagaigabaqueri ibango cara yobetsiquëro perintsipague asi Pásicoa. ²⁰ Cara otsitinitanë, ipocaiquë Jesus aisati irogomere. ²¹ Cara yapaigasegui, icomantë Jesus:

—Aisonori nangantaiguëmi, ainta paniro yaca ira ágagantënane.

²² Aro yogasëretaigaca antagaisati, panirootipague yosamitëri:

—Natingomi ¿Naroco ágagantëmine?

²³ Yotabitaiguëri Jesus:

—Irianti ira pëcoquina cara napë noberatotequë.

²⁴ Nopaniaca Naro Jonogaguítequë, nomatsiguen-gatapë yaca quibatsica. Jirai isanguenatocoquina

Sanguenariquë, aroque nomoncaraquero omagaro. Irarí atsipiriasantërone ira ágagantënane ¡Caninataqueme querome ini iriro, querome it-sipireiro!

²⁵ Aique yosamitëri Joras, ira ágagantërine:

—Natingomi ¿Naroco ágagantëmine?

Yotabitëri Jesus:

—Jee, Obiro.

Yogomeantë Jesus cara irapapinintobiqueri quemisantatsiri aisati irógobitaiguëmari.

(Mr 14.22-25; Ir 22.14-20; 1 Co 11.23-26)

²⁶ Cara yapaigasegui, Jesus yáguë pan, icarasi-aqueri Tosorintsi. Aique itibatsaaguequero, yot-satengaiguëri irogomerejegui. Icantaguëri:

—Jeroca pan osigaro nobatsa. Popaiguero. ¿Teco nangamobitaiguëmi?

²⁷ Aique yáguë irógomento, icarasiaqueri Tosorintsi, ipaiguëri irogomere, icantaguëri:

—Pógaiquemaro obirojegui. ²⁸ Iroro osigaro naraa, ora naraatobitanëneri omagaro matsiguenga cara nangamobitaiguëri. Yamai naraa ocanti irorai Nibarintsi; iroro ingábintsantaiguëmari Tosorintsi cara icanque jirai. Cara irabentaiguëna matsiguenga inguemisanquina, Tosorintsi irojocajineri matsiguenga ora icantagueti te onganinate, quero iquengairo. Nacantaiguëmi yamai arota pigóigue ati ocanta iragabisaicotajiri Tosorintsi antagaisati quemisanquinane. ²⁹ Yamaica quero nógaaro oja oba irooti cara nantsibataiguëmi cara iragáantanequë Pabati. Cara iragáantë Iroro

omagaro omasiniatitanë. Aique nóguëmaro
iroraia aisati obirojegui.

*Jesos icantaiguëri irogomere: “Yamai tsitiniri
pijocaiganaquina”.*

(Mr 14.26-31; Ir 22.31-38; Jn 13.36-38)

³⁰ Aroqueque icántataiguë Jesos aisati
irogomere, íáiguë cara oguitojaquë jitacha Olibos.

³¹ Yaretaigaca. Aro icampë Jesos:

—Yamaica tsitiniri pijocaiganaquina, cara oco-
mantëgotëmi Sanguenari:

Nóguërica ira omisantiri oisha, aro irisi-
gaiganaquema iroishate, inguenagueque
porocague.

³² Carari nanganiatanae, nobataiguëmi canta
Garireaquë.

³³ Aro icanqueri Peroro:

—Aroca irojocanëmi antagaisati basini icaegui,
quero nojoquimi naro.

³⁴ Yotabitanëri Jesos:

—Aisonori oca nongomantëmi: yamaica tsitinir-
ica queroquerai icaïmi tiapa sërari, ongaraque
maba pinganque: “Teni nogótiri Ira Jesos”.

³⁵ Icanque Peroro:

—Aroca nantsibatëmi nangamobiquemi, quero
nacanti: “Teni nogótiri Ira Jesos”.

Aisati icantaigabitaca omagaro irogomere.

*Jesos yamanaqueri Iriri cara panguirintsisiquë
jitacha Jetsemaní.*

(Mr 14.32-42; Ir 22.39-46)

³⁶ Aique íáiguë Jesos aisati irogomere cara Jetse-
maníquë. Icanqueri:

—Pisobicaigue yaca; najáque Naro cara, no-manocoqueri Pabati.

³⁷ Yáganëri mabani casiriconiati: Peroro aisati piteni itomi Sebereo. Tojai yogasëretasantaca, iquenganeintasantaca. ³⁸ Icantaiguëri ira yoganë maba Jesus:

—Tojai nogasëretasantaca agabenisonori. Pisobicaigue yaca, pingaguite.

³⁹ Aique yogaganaca caraquerora yaquitomopa quibatsiquë. Yamanocopëri Iriri:

—Pabati, teni naninte natsipirie, carari quero nacantiro ora nocogabeca Naro, iroonti nanganque ora picocaquena Obiro.

⁴⁰ Aique ipigasitapaari irogomere. Iniopairi isamaigasegui. Yosamitëri ira Peroro:

—¿Teco pabebintsatiro pobotsiquine, te pabetiro pingaguitëmate arosata? ⁴¹ Pingaguite, pomaniri Tosorintsi iromitocotaiguemi arota quero pican-taguetiro ora te ongomeite. Picogabeta pingantiro me ora nococaquemira, carari te pingantiro.

⁴² Aro ipiganaja yamanaji aisati:

—Pabati, picocagasanotënaroca natsipiriero, aro caninataque. Nomoncaraquero antagaisati ora picocaquina.

⁴³ Ipigapaa aisati iniopairi irogomere aitosati isamaigasegui, tojainta ipotsiquitasantë. ⁴⁴ Aisati iátaji yamanocotajiri Iriri. Irootisati yogatsitairi ora icanqueri naaraiquerai. ⁴⁵ Ipigasitapaari irogomere, icampairi:

—¿Somatsibico? Yamai aroque omoncaraca. Jirai nopaniaca Jonogaguitequë, nomatsiguengatapë. Yamaica irácagantëna ira cagari caninataigatsi.

46 Pingabiritaiguema, intsome ajáte. Coraque ipoque ira ágagantënane.

Yáguëngani Jesus.

(Mr 14.43-52; Ir 22.47-53; Jn 18.2-11)

47 Cara inibatasegui Jesus, yarepa Joras ira yogometabeta Jesus. Icarataigapëri tojai matsiguenga. Yamaigapë isabirite aisati anchaqui cara igátaiguëri itingomipague saseriroti aisati antiasiparipague. 48 Aroque icomantaiguëri Joras icanque:

—Ira nasarapëma Irianti Jesus. Págaiganaqueri.

49 Aique iátasiqueri Jesus Joras, yasarapari, icanque:

—¿Aintabi, Ogometinari?

50 Yotabitanëri Jesus:

—Nomatsiguenga, ¿Pairo pipocasiti yaca?

Aique ipocasitaigapëri antagaisati, yágaiganaqueri. 51 Aro paniro irogomere yáguë isabirite, itoguimitatëri iromeraro itingomi saseriroti. 52 Jesus icanqueri:

—Pomingairo pisabirite cara poguiroriquë. Antagaisati ira carantobagaro isabirite, ingamantëmaro sabiri iriro aisati. 53 ¿Teco pigóte nongocaquerica Pabati, iragátaiguënarime tojaisonoru ironomire, inguisëcobentina? 54 Carari arome inguisëcobenquiname, iragabisaicotajiname, quero nomoncaratiro ora ocomantëgotëna Sanguenari.

55 Aique icantaiguëri ira bocasitaiguëri:

—¿Pairo pamasibiriquinero pisabirite aisati anchaqui? ¿Naroco cosirinti? Tojai piniaigabitëna cara nogometaiguimi cara ibangoquë Tosorintsi,

te páguina. ⁵⁶ Carari páguëna yamai aroquenta omoncaraca ora ocomantëgotëna Sanguenari.

Aique ijocaiganaqueri Jesus antagaisati irogomere, isigaguetaiganaca.

Yágaiganaqueri Jesus catingasatiquë itingomipague joríojegui icarati 71.

(Mr 14.53-65; Ir 22.54-55, 63-71; Jn 18.12-14, 19-24)

⁵⁷ Aro yágaiganaqueri Ira Jesus ibangoquë Caijás, itingomisonori saserirotipague. Cara, yapatobiritaigari basini itingomipague saseriroti aisati ira ogomeantiro isanguenare Moisés, aisati antiasipari. ⁵⁸ Yoguiatanëri Peroro icarantanë. Icapë tantotsiquë tsomagui itsibataigacari sorarojegui. Icoqui irogóte atiraca inganqueri ira Jesus. ⁵⁹ Aro itingomipague saseriroti, aisati antiasipari, aisati omagaro itingomipague jorío icarati 71 itsoiguëgotaigacari Jesus arota iróguiri. ⁶⁰ Ainta tojai tsoiguëgotacarira, carari te inguengaiguema. Aique ipoque pite basini tsoiguëgotantachari ⁶¹ icantaigapë:

—Naquemaqueri cara icanque: “No-gomeriguëtëro ibango Tosorintsi; ongaraque maba cataguiteri nobetsicairo aisati”.

⁶² Aro icabiritanaca itingomi saserirotipague, icanqueri Ira Jesus:

—¿Pairo te potapibiritiri? ¿Pairo ojita oca icantocotaiguëmica?

⁶³ Imairetopitëri Jesus, te irotopitëmatiri. Aique itingomi saseriroti igáqueri:

—¿Teco iraneimi Tosorintsi Ira catimanagerisonori? Pingomantasantina: ¿Obiroco Quirisito, Itomi Tosorintsi?

⁶⁴ Yotabitèri Jesus:

—Jee, Naro. Nopaniaca Jonogaguitequë, nomatsiguengatapë. Aiquenta piniagaina nosobigopë ibacasonoriquë Tosorintsi sintsirisonoriguinte, aisati piniagaina cara nopoque mingoriquë, nopigapaima yaca quibatsica.

⁶⁵ Aique iguisanaca itingomi saseriroti itisaraanëro imanchaqui, icanque:

—Piquemaigabaqueri. Ijitosorintsitasitaca Iriati. ¿Pairo onogobique basini comantëgotërine? Piquemaiguëri cara icantocotaguetasitari Tosorintsi. ⁶⁶ ¿Pairo piquianca obirojegui? ¿Pairo anganqueri?

Yotabitaiguëri joríojegui:

—Iriati cantagantënguicha, caninataque ingamaque.

⁶⁷ Aro ibasioquiqueri iroquiquë aique ijobaboroqueri iboroquë, icapojaboroqueri. Inchtangaborotëri ⁶⁸ icanqueri:

—Jaa, Quirisito, pingomantina: ¿Pairo capojëmi?

Icanque Peroro: “Teni nogótiri Jesus”.

(Mr 14.66-72; Ir 22.54-62; Jn 18.15-18, 25-27)

⁶⁹ Ainta isobiaque Peroro saaguiteroquë. Oniaqueri tsinane ironomire itingomi saseriroti, ocanqueri:

—Aisati obiro aguiatiri Jesus, Ira Garireasati.

⁷⁰ Iquemaiguëri antagaisati cara icanquero Peroro:

—Teni nogóte pairoraca picanquina.

⁷¹ Iátabeca cara icabitapa, oniaqueri basini tsinane ironomire itingomi, ocantocoqueri:

—Ica aisati yoguiatèri Jesus, Ira Nasaresati.

⁷² Aisati icanai Peroro:

—Teni nogótiri ira posamitëna. Igóque Tosorintsi cara nacanque catingasati. Aroca nontsoiguëma ingasitíginata.

⁷³ Aique ocosamanitanë arosata, ainta basini icantaiguëri:

—Aisonori poguiatiri Ira Jesus. Naquemaiguëmi cara pinibati; obiro Garireasati.

⁷⁴ Yotabitanëri Peroro:

—Tesonori nogótiri sërari ira picantocoquina. Igóque Tosorintsi aisonori nacanquemi. Queroqa ninibatimi catingasati, nocoguí ingasitíginata Tosorintsi.

Irooti cara icaimanë tiapa sërari. ⁷⁵ Aro iquen-gairo Peroro ora icanqueri Jesus: “Queroqueraí icaimi tiapa sërari, mabataque pinganque: ‘Teni nogótiri Jesus’”. Aro isotocanaí Peroro iáque iragasantaca.

27

Yáganëngani Jesus Piratoquë.

(Mr 15.1; Ir 23.1-2; Jn 18.28-32)

¹ Oquëtaguetamananaque, iquengaigaca iróguiri Jesus antagaisati itingomipague saseriroti aisati antiasipari jorío. ² Yoguëshotaiguëri yáganëri cara itimi basiniati itingomi cobeingari, ira jítacha Pirato.

Icamaque Joras.

(Irag 1.18-19)

³ Cara igóque Joras, ira ágagantëri Jesus, cara iquengaigaca iróguiri Jesus, iquengasëretabitaca. Yoguipigaineri itingomipague saseriroti aisati antiasipari ira 30 iguitso quirequisonori.

⁴ Icantaigapëri:

—Jerica piguirequite. Teni onganinate ora nacanque, tenta ingantëmate Jesus ora quimingaró. Notsoigëgotasitacari naro.

Yotabitobëri saseriroti:

—Jemita ora picanque, iroonti pasi.

⁵ Aique imionganaineri quirequi cara ibangoquë Tosorintsi, ipiganaja Joras. Aique iáque, yáguë sibitsa isiticanaca iriati. ⁶ Ira itingomipague saseriroti yágairi iguirequite, icantaiguë:

—Te inganinate angábintseri ica quirequica omeri Tosorintsi. Iriantinta ipënabenqueri eiro arota irócagantiri.

⁷ Aro yosamitobaca:

—¿Pairo anganqueri?

Iquengaigaca:

—Intsome omanantaiguero quibatsi atiantimari ira camatsine ira te aneiri paniacha parigotiquë.

Aro yamanantë quibatsi ora yágapinintaigui, inti cobiti.

⁸ Iroro irooti yamai ojitaguëca oca quibatsica: asi iraraa. ⁹⁻¹⁰ Aro imoncaraquero isanguenare Jeremías:

Yágaigairi ira 30 iguitso quirequisonori. Irianti quirequi ipënataca cara yágagantëri Quirisito. Irianti arosata cara yametaiga jorío jirai. Yamanantaiguë quibatsi

caninaro asi cobiti. Ira Atingomi agáqueri
iromanantëro.
Aro isanguenaquero Jeremías jirai.

Icomantëgotëri Jesos Pirato.

(Mr 15.2-15; Ir 23.3-25; Jn 18.33-19.16)

¹¹ Aro yaratingopë Jesos catingasatiquë
basiniati itingomi cobeingari jitacha Pirato.
Yosamitobëri iriro:

—¿Obiroco itingomi joríojegui?

Icanqueri Jesos:

—Jee, Naro.

¹² Aique cara icomantëgotëri itingomipague
saseriroti aisati antiasipari, imairetanë Jesos, te
irotopitiri. ¹³ Icanqueri Pirato:

—¿Teco pinguemiro oca icantocotaiguëmica?
¿Pairo te potapibiritiri?

¹⁴ Carari te irotopitëmatiri. Iquenganeintacari
Pirato, te irogóte pairo inganque. ¹⁵ Aro an-
tagaisati osarini omoncaraca jiesita cara iquen-
gaigaca joríojegui jiraisonori cara yabisobenqueri
ironomire Tosorintsi cara Ejípitoquë. Cara jiesi-
taquë yameta Pirato iromisotocajiri paniro ira
iromingane, ira icoigaiguë jorío. ¹⁶ Ainta tojai
iromingane. Paniro jitacha Barabás. Irianti ógueri.

¹⁷ Cara yapatotaigaca jorío, yosamitaigabaqueri
Pirato:

—¿Pairo picogaigui nomisotocajimi? ¿Picogaiguico
nomisotocajimiri ira Barabás, iraco Jesos nomiso-
tocajimi, aisati ijitaigui Quirisito?

¹⁸ Igótocoqueri Pirato cara iguisagantacari
Jesos joríojegui tenta iraninte inguemisantiri
imatsiguenga. Ijítabeca Pirato inganqueme
jorío: “Nocogaigui pomisotocajinari Jesos”.

19 Isobigasegui Pirato iragáantomentoquë cara yameta iquemaguetiri matsiguenga, ocomantabitapari iina:

—Quero pógagantiri Jesus. Icaninati Iriro. Naraningui naquisaniqueri, tojai naqueincoqueri.

20 Carari itingomipague saseriroti aisati anti-asipari jorío iquiancagajiri joríojegui iromanocoqueri Pirato iromisotocajiri ira Barabás aisati irócagantiri Ira Jesus. 21 Aisati yosamitairi Pirato:

—¿Paii picogaigui nomisotocajimi?

Yotabitaiguëri:

—Pomisotocajinari ira Barabás.

22 Aique yosamitaiguëri Pirato:

—¿Pairo nanganqueri Ira Jesus, aisati ijita Quirisito?

Icantaiguëri joríojegui:

—¡Popëicotiri!

23 Yotabitaiguëri Pirato:

—¿Pairoroco icantagueque te ongomeite ora nopëicobiriqueri?

Icaimaiganaque jorío:

¡Popëicotiri!

24 Aro igótanë Pirato itsipiriasica yosamitabitacari tojainta iguisaneinqueri Jesus joríojegui. Aro igáqueri ironomire:

—Pomapëna nija.

Yamapëneri, iquibococa irogótacaguiri jorío te iraninte irócagantiri Jesus. Icanque:

—Teni naninte naro nógagantiri. Pinintaiguica obirojegui, iroonti pasi. Teni naro agáantirine.

25 Yotabitaiguëri matsiguenga:

—Nocogasantaiguë ingamaque. Caninataque inguisenata naroegui Tosorintsi aisati caninataque inguiseri notomijegui.

²⁶ Aique yomisotocajiri Barabás. Aisati igáqueri soraro iripasataigueri Jesus, aisa iribëquëgotëri.

Isërontaigacari Jesus soraropague.

(Mr 15.16-20; Jn 19.1-3)

²⁷ Aique yágaiganaqueri cara ibangoquë cobeingari, icaimaiguëri tojai basini soraro.

²⁸ Aique yágabitsaqueri imanchaqui, ipëri basini inaga, quiraaquisaamagori. ²⁹ Imatseiqueri iroonti totsei. Aisati ipëri chocopi, icanqueri:

—Pomogotiro oca ocarapi chocopi.

Aique ishongaigapari soraro yobaticaguerito-tomemegapari, isërontaigacari, icantaiguëri:

—¡Obiro Natingomi! ¿Aisonorico Obiro itingomi joríojegui?

³⁰ Aisati ijobataiguëri, yágabitsaqueri chocopi ipasataiguëri iguitoquë. ³¹ Aroqueque

icabíntsátaiguëri, aisati yágabitsaqueri quiraaquisaamagori manchaguinsi, icaagobëri iraisati imanchaqui, yágaiganaqueri cara iribëquëgotaiguëri.

Ipëicotaiguëri Jesus cara corosiquë.

(Mr 15.20-32; Ir 23.26-43; Jn 19.17-27)

³² Aro yágaiganaqueri Jesus. Itonguibocari sërari Sirenesati, ijita Simón. Aro imeratobacari soraro, igáqueri:

—Páganëneri igorosite.

Aro yáganëneri.

³³ Yaretaigaca Górogotaquë ora ocanti osigaro iguito igamaga. ³⁴ Aro ipëtabecari Jesus oja

obaa ogonoataga isincana; iniantacaro Jesus, te iraninte iróguimaro. ³⁵ Cara aroque ipëicotaiguëri soraro corosiquë, aique imaguimpibintëqueri imanchaquipague Jesus ipabacaguecaro yotsatiancaro. Aro omoncaraca Sanguenari ora cantatsi:

Imaguimpibintaiguëro nomanchaqui ora irogóontëma pairiraca áganërone.

³⁶ Aique isobiaque osobiquë corosi inetsaiguëri.

³⁷ Aisati yoguëro jonoica corosiquë, isanguenare Pirato. Isanguenaquero pairoraca ipëicobiriqueri. Ocanti: “Iriro Ica Jesus Itingomi joríojegui”.

³⁸ Aisati ipëicotaiguëri pite cosirinti itsibatacari Jesus. Ainta paniro ibacosonoriquë Jesus, basini imatepacoquë. ³⁹ Ainta yabisanaqueri abatsiquë, iniopëri Jesus, icabíntsáigapëri, ipoteguitotaigapa, ⁴⁰ icantaiguëri:

—Pogomeriguetro ibango Tosorintsi, aisati ongaraque maba cataguiteri, pobetsicairo. Atsi yamai pigabisaicotajima Obiati. Obiroca Itomi Tosorintsi piguëtanae corosiquë.

⁴¹ Aisati isërontaigacari itingomipague saseriroti-jegui, aisati iraugui ogomeantiro isanguenare Moisés, aisati bariseoegui aisati antiasipari, icantobaganaca:

⁴² —Yogabisaicotaguëri imatsiguenga carari te iragabisaicotima Iriati. Iriroca Itingomi joríojegui, iraguëtanae corosiquë. Nanetsaiguëri, aro nanguemisantaiguëri. ⁴³ Itingomintabecari Tosorintsi Iriro. Icanque: “Naro Itomi Tosorintsi”. Nanetsaiguëri aroca iragabisaicoqueri Itomi yamai.

⁴⁴ Aisa icanqueri ira cosirinti ipëicotacaca icantocotagueticari, isërontaigacari aïsati.

Icamaque Jesus.

(Mr 15.33-37; Ir 23.44-46; Jn 19.28-30)

⁴⁵ Cara catinga paba otsitinitanë antagaisati quibatsi irooti cara ochapinitanë. ⁴⁶ Aro icaibatanë Jesus:

—Eri, Eri, ¿Irama sabacatani?

Ocanti: “Pabati, Notosorintsite, ¿Pairo pijocobitanëna?” ⁴⁷ Ainta matsiguenga cara iquemaiguëri icantaiguë:

—Pinguemiri. Icaimëri Erías comantantatsiri.

⁴⁸ Aro isiganaca poro, yáguë ichomicantaro, yoaquero obaaquë cochori. Yoguëneri chocopiquë itimagonaguitanaca ipëri Jesus iróguimaro.

⁴⁹ Ainta basini icanque:

—Irinita. Quero popiri. Atsi anetserita aroca iribocasitapëri Erías iragabisaicopëri.

⁵⁰ Aro icaimasantanai Jesus, irooti icamantaca.

Inibatëgotëri ira niaiguëri Jesus cara icamaque.

(Mr 15.38-41; Ir 23.47-49)

⁵¹ Cara icamaque Jesus, aito cara otisaraanaca aganguisati ora yotigantaro ibango Tosorintsi. Iroonti oquibepiriga tera yoguëro arota quero iqui pairiraca. Oparintanaca jonoquë, otisaraanaca irooti osobi. Aitosati posebatanaca quibatsi, moque moque moque, piquëtareaguetanë oquibe mopë. ⁵² Yasirecotanaca camatsiri, icaniatanai tojai quemisantatsiri. ⁵³ Aique cara icaniatanai Jesus icabiritanaca iáiguë camabetachari cara Jerosarénquë. Iniaigapairi matsiguenga tojai. ⁵⁴ Aro ira capitán

aisati isorarote inetsaigaseguiri Jesus, cara iquemaigabaquero posebatanaca quibatsi, iniaiguëro cara otsititanë, iniaiguëri igamaga cara icabiritanaca, iquenganeintasantaca icantaiguë:

—Aisonori, Iriro Itomi Tosorintsi.

⁵⁵ Ainta jaqueronta tsinanepague onetsaiguëri Jesus aisati. Opaniaca Garireaquë. Coshoni pogu-iataiguëri Jesus opapinintaiguëri tojai omitocotaiguëri. ⁵⁶ Ainta María Magararasato aitosati basini María iniro José aisati Santiago, aisati iniro piteni itomi Sebereo, aisati basini tsinane. Oniaiguëri Jesus cara icamaque.

Yomianquengani Jesus omoroquë.

(Mr 15.42-47; Ir 23.50-56; Jn 19.38-42)

⁵⁷ Cara ochapinitanë ipocasiqueri Pirato poro Arimateasati jitacha José. Iriro irogomere Jesus aisati, iquemisanqueri. ⁵⁸ Yamanopëri Pirato:

—Camaque Jesus. Nocoguini pinintacaguina náganëri nomianqueri omoroquë.

Aro igáqueri isorarote:

—Pinintacaguiri ica iráganëri igamaga Jesus.

⁵⁹ Aique iáque, yáganëri igamaga iponatancari tocoya irorai. ⁶⁰ Yoguëri omoroquë cara iro-raique yomoroque José. Ititiguëro mopë omoroquë, yasitocoontacari. Aro iátaji. ⁶¹ Ainta pisiaque María Magararasato aisati basini María, oniaiguëri cara yomianqueri.

Iáque soraro yomisantaigabitacaro omoro cara ini Jesus.

⁶² Pabisanaque cataguiteri ora jitacha Pásicoa cara ipëicoiguëri Jesus. Oquëtaguetamanë

iátasitaiguëri Pirato ira itingomipague saseriroti aisati bariseopague. ⁶³ Icantaigapëri:

—Nogobeingarite, naquengaigairo cara icanque cani ira matobiantatsiri: “Nangamaque, aique ongaraque maba cataguiteri, nanganiatanae”.

⁶⁴ Yamai nocogaiguë pigátinari soraropague iromisantiro omoro cara yoguëri igamaga. Iranetsasantiro maba cataguiteri arota quero iátasitiri irogomere yágairi igamaga inganque: “Icabiritanaa icaniatanai”. Jirai tojai yamatobianti; yamai aroca iráganëri irogomere, iromatobitasantaiguëri matsiguenga.

⁶⁵ Aro Pirato igáqueri isorarote:

—Atsi pijáigue, pomisantasanoiguero omoro.

⁶⁶ Aro iáiguë yasitocotasantëri, itsinetëgotëri yomisantasantëro omoro soraro.

28

Cara icabiritanaa Jesus icaniatanai.

(Mr 16.1-8; Ir 24.1-12; Jn 20.1-18)

¹ Pabisanaque cataguiteri comagoriantague. Oquëtaguetanai, iroonti tominco, tsitiniquerai piáque María Magararasato aisati basini María otsipa piátasiquero omoro cara yoguëri Jesus.

² Iroguito posebatanaca quibatsi aisati. Ainta ironomire Tosorintsi irisaanganetsite yamasobin-gopë canta Jonogaguitequënta irooti quibatsiquë, ititigapëro mopë ora yasitocoontabitacari, isobigopëro. ³ Tojai yobariaguiteti aisa ocanta moretatsiri. Oquëtatanotanë catarisonoriguinte iguitsagare. ⁴ Iniaigabaqueri soraropague, itsorogasantagabaqueri. Imogomogoatanaca

icanaca ingamanëni. ⁵ Icampëro tsinane ironomire:

—Quero pitsorogaigui. Nigóque pipocasitabecari Jesus, Ira ipëicotaiguë corosiquë. ⁶ Teni irinaje yaca. Aroque icaniatanai cara icanque. Jooque, pinetse cara yogabitacari. ⁷ Pijáigue omanapague pingomantaigapëri irogomere, “Icamabeca Atingomi, yamai aroque icaniatanai. Irobataiguëmi canta Garireaquë. Aro piniagairi canta”. Aroque nocomantaiguëmi.

⁸ Oquenganeintasantaca tsinane aisati ocaninatasantaiguë. Piáiguë pisigasitaiganacari irogomere arota ongomantaigapëri. ⁹ Cara abat-siquë, iriguito yoniagaparo Jesus, ibetsataigaparo. Piátasiqueri pobaticagueritotasipari opogopëri iguitiquë. ¹⁰ Icampëro Jesus:

—Quero pitsorogaigui. Pijáigue pingomantaigueri nogomere iriáigue canta Garireaquë. Aro iraniaigaina canta.

Ijitasitaigaca joríojegui yáganairi Jesus irogomere.

¹¹ Cara piátaigai tsinane, aisati iátagarantai soraro omisantëro omoro. Iáque poeboroquë icomantaigapëri itingomipague saseriroti ora iniaiguë.

¹² Yapatotaiguëri aisati antiasipari, yosamitobaca: —¿Pairo anganque yamai cara quero icomantëgotiri?

Aro icaimaiguëri soraro, icantaiguëri:

—Jerica quirequi nomaiguëmi.

¹³ Pingantasitimari matsiguenga: “Cara nisamaigasegui aganguite ipocaiguë irogomere Jesus yáganairi igamaga”. ¹⁴ Aroca inguemocotaiguëmi ogobeingarite, pingantiri:

“Nisamë”. Nongomantëri naro: “Quero piguisiri soraropague. Teni irisome. Naro cantëri: ‘Pintsoiguema’”.

¹⁵ Aro yágaiguëri quirequi soraro, icomantaitari matsiguenga carari itsoigani: “Nisamaiguë. Aique ipocaiguë irogomere Jesus yáganairi”. Aro icantobagaiga jorío negaca irooti yamai.

Iniaigairi Jesus irogomere canta Garireaquë.

(Mr 16.14-18; Ir 24.36-49; Jn 20.19-23)

¹⁶ Aro íaiguë irogomere Jesus cara Garireaquë. Icarati 11, panibani Joras. Íaiguë cara oguitojaquë ora icomantëri Jesus jirai. ¹⁷ Cara iniaigapairi yobaticagueritotasipari, carari ainta porocague ira tsoenguëri. ¹⁸ Aro ipocasitaigapëri Jesus, icampëri:

—Jirai icanquina Pabati: “Pobatacagasanotiri omagaro Jonogaguitesati pintingomibintasanoiguëri, aisati pobatacagasoiguëri antagaisati quibatsisati”. ¹⁹ Yamai pijátagueque omagaro poeboropaguequë, pinguemisantacagaiguëri matsiguengajegui, potsatiancagaiguëri imegaiguëma nogomerejegui. Aroca inguemisanquina Naro, pomaotisataiguëri. Ora icocaqueri Pabati imaotisabiritimari Iriro aisati Naro aisati Isëre Tosorintsi. ²⁰ Pogometaignuëri ingantaigue antagaisati ora nocomantaiguëmi Naro. Atiraca pijáte nantsibataiguëmi Naro, coshoni nogaiguëmi përosati irooti cara nopocaje nobatacagantapë.

Aro ocarati ora nasanguenaque. *Mateo*

**Irinibare Tosorintsi Ocomantë^{gotëri}
Antigomi Jesoquirisito
New Testament in Nomatsiguenga
(PE:not:Nomatsiguenga)**

copyright © 2008 Wycliffe Bible Translators, Inc.

Language: Nomatsiguenga

Translation by: Wycliffe Bible Translators, Inc.

Nomatsiguenga [not], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nomatsiguenga

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

cc057d06-df39-5d12-b492-cf028fb9485d